

Extract




6-42. f-49

C. 68. c.

6. 42. d. 49

~~6. 42. f. 49~~



SATYRE
MENIPPEE DE
LA VERTV DV CATHO-
LICON D'ESPAGNE,

ET DE LA TENVE DES
Estatz de Paris.



del Conu. A PARIS.

Nella Sala

M. D. XCIII.

Par mon destin Fesclaire

1872

1872

3
L'IMPRIMEUR AV
LECTEUR.

CE Discours de la senné des Estats de Paris, & de la vertu du Catholicon d'Espagne, fut fait en langue Italienne par un Gentilhomme Florentin, qui estoit à Paris pendant que les Estats s'y tenoyent, en intention (comme il est a presupposer) de le porter à son maistre le Duc de Florence pour luy représenter l'Estat admirable des affaires de France. Mais il advint comme il s'en retournoit en son pays, & passoit par Amiens pour aller en Flandre, que son palfrenier Breton de nation ne se voulant hazarder à si long voyage, & ayant reconnu que son maistre n'estoit pas autrement bon Catholique parce qu'il appelloit le Biarnoïs, Il Re di Francia, se separa doucement de luy sans luy rien dire qu'il le faschast, ne qu'il le troublast en son repos: mesme pour le soulager de la nourriure de deux cheuaux, en emmena le meilleur avec la valize en laquelle estoit l'original dudit Discours. Mais Dieu voulut qu'il fut pris par quelques Religieux du Chasteau verd, & mené deuant le Maire de Beauvais, où il eust esté déclaré de bonne prise, à cause de quelque sac de doublons qui se trouua dans la valize, sinon qu'il leur monstra vne once de Catholicon, reduict en pouldre, qu'il portoit en sa bourse, avec sept grains benists, & vne chemise de Chartres, qui auoit demeuré neuf iours, & neuf nuicts aux pieds de nostre Dame sous terre pour empescher les coups de canon & d'artillerie, & d'estre prins ny en guerre ny en Iustice. Tellement qu'il confessa librement qu'il auoit laissé son maistre apres auoir connu qu'il estoit heretique en ce qu'il appelloit le Biarnoïs Roy de France. Or entre les hardes de la valize dont inuentaïre fut fait, en presence du maire & du Docteur Lucain, superintendant des prises & rançons, se trouua l'original dudit Discours Ita-

lien que le Maire n'entendoit pas, & pria ledit Docteur Lucain de le traduire en bon François. Dequoy ledit Docteur s'excusa, disant qu'encor qu'il s'eust bien parler le langage de Rome, toutesfois il ne le sçauoit pas approprier à la naïueté François. Si bien qu'on fut contrainct de donner a un petit Moine Romipete, qui le lendemain se desroba pour la haste qu'il auoit d'estre à Paris à la benediction solemnelle & procession generale que deuoit faire le Legat pour la Sainte & Catholique entreprise que Pierre Barriere d'Orleans auoit faicte & iuree entre ses mains, d'assassiner sa Maiesté à Melun. Mais il aduint que ledit moine fut pris par quelques Gentiils-hommes, & trouué chargé dudict discours, Lequel leur sembla si plaisant qu'incontinent l'un d'entré eux le tourna en François, & de main en main la traduction st venue iusques à moy qui l'ay faicte i nprim r, tant pour r leuer de peine les curieux de voir toutes nouveantez, que pour picquer ceux qui languissent encor soubz le ioug de la tyrannie: Car il faudra qu'ils soyent pà faictelement ladres clauetez, s'ils ne sentent ce poignau esguillon, & n'ieulent pour le moins quelque sousspir de leur mourante liberteé. *A Dieu.*

L A

LA VERTV DV

CATHOLICON.

PArce que les Estats Catholiques n'agueres tenuz à Paris, ne sont point Estats à la douzaine ny communs, & accoustumez: Mais ont quelque chose de rare & singulier par dessus tous les autres qui ayent iamais esté tenuz en France, i'ay pensé faire chose agreable à tous bons Catholiques zelez, & seruir à l'edification de la foy, d'en mettre par escrit vn sommaire, qui est comme vn elixir & quinte-essence tirée & abstraicte non seulement des harangues, mais aussi des intentions, & pretentions des principaux personages qui jouèrent sur cet eschaffaut. Or d'autant que les Prouinces assignees à longs termes, & les assignations par plusieurs fois frustrées à cause des escharpes blanches qui traieroyent les chemins des deputez, ne se peurent assembler à iour nommé, veritablement l'assemblée ne fut pas si grande qu'on auoit esperé & désiré: toutes fois il s'y trouua de notables & signalez officiers, qui ne cedoyent rien en grandeur de barbe & de corsage aux anciens Pairs de France: & y en auoit trois pour le moins de bonne congnoissance, qui

portoyent calotes à la Catholique, & vn qui portoit grand chapeau, & rarement se deffubloit: ce que les Politiques, qui sont encores plus de seze dedans Paris, detorquoyent en mauuais sens, & disoyent que les trois calotiers estoient tigneux, & le grand chapeau auoit la teste comme le Poëte Æchilus: tellement que leur commun dire estoit qu'aux diëts Estats n'y auoit que trois tigneux & vn pelé: & si l'inquisition d'Espagne eust esté de bonne heure introduicte, i'en vey plus de cinq cens, que dy-je cinq cens? mais cinq mille qui ne meritoient pas leurs blasphemés rien moins que l'accollade du President Brisson. Mais le sort ne tomba sur aucun d'eux: ains sur vn pauvre malotru meneur d'asne, qui pous haster son miserable baudet tout errené de coups & du fardeau, dist tout haut en voix intelligible ces mots scādaleux & blasphematoires, **ALLONS GROS JEAN AUX ESTATS**: Lesquelles parolles ayans esté prises au bon par vn ou deux du nombre du Cube quarré, & desérées aux deux promoteurs de la foy, Machault & de Here, le blaphemateur fut sainëtement & Catholiquement cōdamné à estre battu & fustigé nud de verges à la queuë de son asne par tous les carrefours de Paris: qui fut vn pronostiq infalible &

auant

auant-jeu signalé pour tesmoigner à tous les peuples assëblez pour ceste solemnelle actiō, que les procedures de tous les ordres seroyent pleines de Iustice & d'equité, comme ledict iugement: qui fut l'eschantillon de la grande piece de la Iustice des Estats futurs.

Or pendant qu'on faisoit les preparatifs & eschaffaux du Loure, ancien temple & habitacle des Roys de France, & qu'on attendoit les deputez de routes pars, qui de mois en mois ce rëdoient à petit bruit sans pompe n'y parade de suite, cōme on faisoit anciēnement quand l'orgueil & la corruption de nos peres auoyent introduict le luxe & la superfluité vitieuse. Il y auoit en la court dudict Loure deux charlatans, l'vn Espagnol, & l'autre Lorrain, qu'il faisoit merueilleusement bon voir vanter leur drogues, & iouër de passe passe tout le long du iour deuāt tous ceux qui vouloyent les aller voir sans rien payer. Le charlatan Espagnol estoit fort plaisant & monté sur vn petit eschaffaut jouant des regales & tenant banque, comme on en voit assez à Venise en la place S. Marc. A son eschaffaut estoit attachee vne grande peau de parchemin escrete en plusieurs langues seellée de cinq ou six seaux, d'or, de plomb, & de cire, avec des tiltres en lettres

d'orportant ces mots. LETTRES DV
POVVQIR D'VN ESPAGNOL, ET
DES EFFETS MIRACVLEUX DE SA
DROGVE APPELEE, HIGVIERO
D'INFIERNO, OV CATHOLICON
COMPOSE. Le sommaire de toute ceste
pancarthe estoit, que ce triacleur petit fils
d'un Espagnol de grenade relegué en Afri-
que pour le mahumetisme, medecin du Cerif
qui se fit Roy de Marroque par vne espee de
Higuiéro, son pere estant mort, vint en Espa-
gne; se fit baptiser, & se mit à seruir à Tolledo
au college des Iesuites : où ayant apris que
le Catholicon simple de Rome n'auoit d'au-
tres effects que d'edifier les ames, & causer
salut & beatitude en l'autre monde seulemēt,
se faschant d'un si long terme, s'estoit aduisé
par le conseil testamentaire de son pere, de
sophistiquer ce Catholicon, si bien qu'à force
de la manier, remuer, alambiquer & calciner,
il en auoit composé dedans ce college vn
electuaire souverain qui surpasse toute pierre
philosophale, & duquelles preuues estoient
deduictes par cinquante articles tels qu'ils
s'ensuyuent.

I

Ce que ce pauvre malheureux Empercut
Charles le Quint n'a peu faire avec toutes les
forces

forces, vnies & tous les canons de l'Europe, son braue fils Dom Philippes moyennant ceste drogue l'a sceu faire en se iouant avec vn simple Lieutenant de douze ou quinze mil hommes.

I I.

Que ce Lieutenant ait du Catholicon en ses enseignes & cornettes, il entrera sans coup fe-
rir dans vn Royaume ennemy. Et luy ira l'on
au deuant avec croix & bānieres, Legats & Pri-
mats, & bien qu'il ruine, rauage, vsurpe, massa-
cre, & saccage tout: qu'il emporte, rauisse,
brusle, & mette tout en desert, le peuple du
pays dira, ce sont nos gens, ce sont bons Ca-
tholiques, ils le font pour la paix, & pour no-
stre mere sainte Eglise. Qu'un Roy cazannier
s'amuse à affiner ceste drogue en son escorial,
qu'il escriue vn mot en Flandres au pere Ignace ^a *Jeruſa*
cacheté de Catholicon, il luy trouuera hom-
me, lequel (*Salua conscientia*) assassinerà son en-
nemy qu'il n'auoit peu vaincre par armes en
vint ans.

III.

Si ce Roy se propose d'asseurer ses Estats à ses
enfants ^a après sa mort, & d'enuahir le Royaume
d'autruy à petis frais: qu'il en escriue vn mot à
Mandoze son Ambassadeur, ou au pere ^a *Jeruſa* Com-
molet, & qu'au bas de sa lettre il escriue avec

De l'Higuiero del l'infierno, yo el Rey, ils luy fourniront d'un religieux Apostat, qui s'en ira sous beau semblant, comme vn Iudas, assassin de sang froid vn grand Roy de France, son beau frere, au milieu de son cãp, sans craindre Dieu ny les hommes: ils feront plus, ils canoniseront ce meurtrier, & mettront ce Iudas au dessus de saint Pierre, & baptiseront ce prodigieux & horrible forfait, du nom de coup du Ciel, dont les parrains seront Cardinaux, Legats & Primats.

IIII.

Qu'une grande & puissante armee de piteux & horribles François soit prestee à bien faire pour la deffence de la Couronne & patrie, & pour venger vn si espouventable assassinat, qu'on iette au milieu de ceste armee vne demie dragme de ceste drogue, elle engourdira tous les bras de ces braues & genereux guerriers.

V.

Seruez d'espion au camp, aux tranchées, au canon, à la chambre du Roy, & en ses conseils, bien qu'on vous cognoisse pour tel, pourueu qu'ayez pris dès le matin vn grain de *Higuiero*, quiconque vous taxera, sera estimé Huguenot ou fauteur d'Heretique.

VI.

Tranchez des deux costez, soyez perfide &

bien que vous touchiez l'argent du Roy pour faire la guerre, n'aigrissez rien, pratiquez avec les ennemis, si vous collez vostre espee dedans vostre fourreau avec du Catholicō, vous serez estimé trop homme de bien.

VII.

Voulez-vous estre vn honorable rieur & neutre, faictes peindre à l'entour de vostre maison, nō du feu saint Anthoine, mais des croix de *Higuiero*, vous voila exempt du hoqueton & de l'arriereban.

VIII.

Ayez sur vous le poix de demy escu de Catholicon, il ne vous faut point de plus vallable passeport pour estre aussi bien venu à Tours qu'à Mante, à Orleans, qu'à Chartres, à Compiègne qu'à Paris.

IX.

Soyez recogneu pour pensionnaire d'Espagne, monopolez, trahissez, changez, vendez, troquez, des-vnissez les Princes, pourueu qu'ayez vn grain de Catholicon en la bouche, l'on vous embrassera, & entrera-on en desfiâce des plus fideles & anciens seruiteurs comme d'infideles & huguenots, quelques francs Catholiques qu'ils ayent tousiours esté.

X.

Que tout aille de mal en pis, que l'ennemy
aduan

aduance ses desseins , & ne se recule de la paix que pour mieux sauter , voyant le beau ieu qu'on luy faiët , que l'Esglise Catholique meſme coure risque, qu'il y ait peruertissement de tout ordre Ecclesiastique ou ſeculier , à faute de parler bon François, ſemez finement vn petit de *Higuiero* par le monde , personne ne s'en ſouciera, & n'en oſera parler, craignant d'eſtre reputé huguenot.

XI.

Cantonnez vous , & vous iſtalez tyranniquement dans les villes du Roy, deſpuis le Haur iuſques à Mezieres , & deſpuis Nantes iuſques à Cambray, ſoyez vilain, renegat ou perfide, n'obeiſſez ni à Dieu, ni à Roy, ni à Loy, ayez là deſſous en main vn petit de Catholicon , & le faiëtſes préſcher en voſtre canton, vous ſerez grand & Catholique homme.

XII.

Ayez la face honnie, & le front vlcéré, comme les infideles concierges du Ponteau de mer & Vienne, frottez vous vn peu les yeux de ce diuin electuaire, il vous ſera aduis que vous ſerez preud'homme & riche.

XIII.

Si vn Pape comme Xiſte cinquieſme, faiët quelque choſe contre vous , il vous ſera permis , *Illeſa conſcientia*, de l'exécrer , maudire,

tonner, blasphemer contre luy, pourueu que dedans vostre ancre il y ait tant soit peu de *Higuero*.

XIIII.

N'ayez point de religion, moquez-vous à gogo des prestres & des Sacremens de l'Eglise, & de tout droit diuin & humain, mangez de la chair en Carefme en despit de l'Eglise, il ne vous faudra d'autre absolutiõ ny d'autre char-donnerette qu'une demy dragme de Catholicon.

XV.

Voulez vous bien tost estre Cardinal? frottez une des cornes de vostre bonnet de *Higuero*, il deviendra rouge, & serez fait Cardinal, feussiez vous le plus incestueux & ambitieux Primat du monde.

XVI.

Soyez aussi criminel que la Mothe Serrant, *Cinq* foyez conuaincu de fausse monnoye comme *des sans* Mandreuille, Sodomite comme Senaut, Sclerat comme Bussy, Atheïste & ingrat comme *des portes* le Poëte de l'Amirauté, lauez vous d'eau de *Higuero*, vous voila agneau immaculé & pillier de la foy.

XVII.

Que quelque sage Prelat ou Conseiller d'Etat vray Catholique François s'ingere de s'op-
poser

poser aux vulpines entreprises des ennemis de l'Estat, pourueu qu'ayez vn grain de ce Catholicon sur la langue, il vous sera permis de les accuser de vouloir randis que Dieu s'endormira, laisser perdre la Religion, comme en Angleterre.

XVIII.

Que quelques bons predicateurs non pendants soyent sortis des villes rebelles, pour aider à desensorceler le simple peuple, s'il n'a vn brin de *Higuiero* dans son capuchon, il s'en peut bien retourner.

XIX.

Que l'Espagne mette le pied sur la gorge de l'honneur de la France, que les Lorrains s'efforcent de voller le legitime heritage aux Princes du sang Royal, qu'ils leur debattent, non moins furieusement que cauteleusement ils leurs disputent la Couronne, seruez-vous la dessus de Catholicon, vous verrez qu'on s'amusera plustost à voir hors de saison quelque dispute de la chape à l'Euesque, sur le perron du Plessis, qu'à trauailler à rames & à voiles, pour faire lascher la prise aux tyrans matois qui tremblent de peur. C'est à peu pres la moitié des articles que contenoit la pancarte du charlatan Espagnol, le temps vous fera voir les autres.

XX.

Quand au Charlatan Lorrain , il n'auoit qu'un petit escabeau deuant luy couuert d'une vieille seruiette , & dessus vne tirelire d'un costé , & vne boitte de l'autre , pleine aussi de Catholicon , dont toutesfois il debitoit fort peu , parce qu'il commençoit à s'esuenter, manquant de l'ingredient plus necessaire , qui est l'or , & sur la boitte estoit escrit , FIN GALIMATHIAS , ALIAS CATHOLICON COMPOSE POVR GVARIR DES ESCROVELLES. Cepauure charlatan ne viuoit que de ce mestier , & se morfondoit fort, combien qu'il fust affublé d'un caban fourré tout pele, à cause dequoy les pages l'appelloient monsieur Pelleue: & pour autant que le charlatan Espagnol estoit fort bouffon & plaisant, ils l'appelloient monsieur de Plaisance: à la verité la drogue de cestui-cy estoit souueraine. I'ay veu Monsieur d'Aumalle Comte de Boulougne , qu'elle aguary de la iaunisse safranée, dont il languissoit : le Poëte de l'Admirauté en a esté guary de la gratelle , dont il estoit rongé iusques aux os , le Greffier Senaut dela caquesangue , plus de dix mil zelez du haut mal de la corde , & un millier qui s'en alloient mourir en Chartre sans cest *Higuiero* : & si le Concierge de Vernueil eust eu en temps & lieu

*Desper-
tes*

& lieu de ceste droguc, il se fust bien passé, de
 leuer la fierté de S. Romain de Rouen. Mōsieur
 du Maine en prent tous les iours dans vn pos-
 son de laiēt d'asnessc, pour guarir du plus des-
 loyal & malin hocquet du monde. Le Duc de
 Sauoye en auoit aussi prins pour le guarir de la
 boulimie & gloutonnie, mais il reuomit tout,
 le pauvre homme, Il y a de pires saincts en Bre-
 taigne que le Catholique valet de Monsieur de
 Fontaines Gouverneur de S. Malo, qui coupa
 la gorge à son maistre en son liēt, moyennant
 deux mil escus pour nostre mere sainte Egli-
 se: le deuot Chrestien est par les bas Bretons
 estimé vn second S. Yves, pource qu'il n'est ia-
 mais desgarny de *Higuiero* & Catholicon: en
 somme tous les cas reſeruez en la bulle, *In caena*
Domini, sont absouz à pur & à plain par ceste
 quinte essence Catholique, Iesuite, Espa-
 gnole.

ABRE

*ABBREGE DES ESTATS
DE PARIS, CONVOQUEZ
au dixiesme de Feurier 1593. tiré des me-
moires de Madamoiselle de la Lande, aliàs
la Bayonnoise, & des secrettes confabula-
tions d'elle & du pere Commelaid.*

Monsieur le Duc de Mayenne, Lieute-
nant de l'Estat & Courõne de France, le
Duc de Guyse, le Connestable d'Aumalle, le
Conte de Chaligny Princes Lorrains, & les
autres deputez d'Espagne, Flandres, Naples
& autres villes de l'vnion, estans assemblez
à Paris, pour se trouuer aux Estats conuoquez
au dixiesme Feurier 1593. voulurent que de-
uant que commancer vn si saint œuure, fust
faicte vne procession, pareille à celle qui fut
iouee en la presence de Monsieur le Cardinal
Cajetan. Ce qui fut aussi tost dict, aussi tost
faict: Car Monsieur Roze n'agueres Euesque
de Senlis, & maintenant grand maistre du col-
lege de Nauarre, & Recteur de l'vniuersité, fit
le lédemain dresser l'appareil & les personna-
ges par son plus ancien bedeau: la procession
fut telle: ledict Recteur Roze quittant sa ca-
peluche rectorale prit sa robe de maistre és


arts avec le camail & le roquet & vn hausse-
 col dessous : la barbe & la testerazee tout de
 frais, l'espee au costé, & vne pertuisane sur l'e-
 paule : les curez Amilthon, Boucher, & Gin¹⁰
 cestre vn petit plus Bizarrement armez, fai-
 soient le premier rang : & deuant eux mar-
 choient trois petits moineçons & nouices,
 leurs robes troussées, ayans chacun le cas-
 que en teste dessous leurs capuchons, & vne
 rondache pendue au col ou estoient peintes
 les armoiries & deuises desdicts Seigneurs:
 Maistre Iaques Pelletier curé de saint Iaques
 marchoit à costé, tantost deuant tantost der-
 riere habillé de violet en gendarme scolasti-
 que, la corōne & la barbe faicte de frais, vne
 brigandine sur le dos, avec l'espee & le poi-
 gnard, & vne halebarde sur l'espaule gauche,
 en forme de sergent de bande, qui suoit, pouf-
 soit & haletoit pour mettre chacun en rang,
 & ordonnance. Puis suiuoyēt de trois en trois
 cinquante ou soixante religieux, tant Corde-
 liers que Iacobins, Carmes, Capuchins, Mini-
 me bons hommes, Feuillans, & autres tous
 couuers, avec leurs capuchons & habits, a-
 grafez armez à l'antique catholique, sur le
 modelle des Epistres de saint Paul : entre au-
 tres y auoit six capuchins, ayans chacun vn
 morrion en teste, & au dessus vne plume de
 coq

coq, reuestus de cottes de mailles, l'espee ceinte au costé par dessus leurs habits, l'un portant vne lance, l'autre vne croix, l'un vn espieu, l'autre vne harquebuse, & l'autre vne arbaleste, le tout rouillé par humilité Catholique: les autres presque tous auoyent des piques qu'ils bransloyent souuent, par faute de meilleur passetemps, hors mis vn Fueillant boiteux[^], qui armé tout à crud se faisoit faire place avec vne espee à deux mains, & vne hache d'armes à sa ceinture, son breuiaire pendu par derriere, & le faisoit bon veoir sur vn pied faisant le mouliner deuant les dames. Et à la queue y auoit trois Minimes tous d'une parure, sçauoir est, ayans sur leurs habits chacun vn plastron à corrayes, & le derriere descouuert, la salade en la teste, l'espee & pistolet à la ceinture, & chacun vne harquebuse à croq sans forchette. Derriere estoit le Prieur des Iacobins en fort bon poinct, traissant vne halebarde gauchere, & armé à la legere en mortepaye: le n'y vey ni Chartreux, ni Celestins qui s'estoyent excusés sur le commerce. Mais tout cela marchoit en moult belle ordonnance Catholique Apostolique & Romaine: & sembloient les anciens cranequiniers de France: Ils voulurent en passant faire vne salue, où escoupeteric: mais le Legat

leur deffendit, de peur qu'il ne luy mesaduint,
ou à quelqu'un des siens, comme au Cardinal
Cajetan : Apres ces beaux peres marchoyent
les quatre mendiants qui auoyent multiplié
en plusieurs ordres tant ecclesiastiques que
seculiers : puis les paroisses : puis les seize qua-
tre à quatre, reduits au nombre des Apostres,
& habillez de mesme, comme on les jouë à la
feste Dieu. Apres eux marchoyent les Preuost
des Marchans & Escheuins, bigarrez de di-
uerfes couleurs, puis la Cour de Parlement
telle quelle, les gardes Italiennes, Espagnoles
& Vallônes de Monsieur le Lieutenant : puis
les cent Gétils-hommes de frais graduez par
la sainte Vnion, & apres eux quelques vete-
rinaires de la confrairie saint Eloy. Suiuoyët
apres Monsieur de Lyon tout doucement : le
Cardinal de Peluë tout bassement, & apres
eux, Monsieur le Legat, vray miroir de par-
faicte beauté, & deuant luy marchoit le Doyë
de Sorbonne, avec la Croix ou pendoyent les
bulles du pouuoir. Item venoit Madame de
Nemours representant la Royne mere, ou
grand merc (*in dubio*) du Roy futur : & luy
portoit la queue Mademoiselle de la rue, fille
de noble & discrete personne Monsieur de la
rue, cy deuant tailleur d'habits sur le pont
saint Michel, & maintenant vn des cent

Gẽtils-hommes & Conseillers d'Estat de l'v-
nion, & la suiuyẽt Madame la Douairiere de
Montpensier, avec son escharpe verte fort
sale d'vsage, & Madame la Lieutenante de
l'Estat & Couronne de France, suiue de mesda-
mes de Belin, & de Busly le Clerc. Alors s'a-
uançoit, & faisoit veoir Mõsieur le Lieute-
nant, & deuant luy deux massiers fourrez
d'hermines, & à ses flancs deux Vvallons
portans hoquetons noirs, tous parsemez de
croix de Lorraine rouges, ayans deuant &
derriere vne deuise en broderie, dont le corps
representoit l'histoire de Phaeton, & estoit le
mot: IN MAGNIS VOLVISSE SAT EST.

Arriuez qu'ils furent tous en cẽte equipage en
la chapelle de Bourbon, Monsieur le Recteur
Roze quittant son haulse col, son espee, &
pertuisanne, monta en chaize, ou ayant prou-
uẽ par bons & valides argumens, que c'estoit
à ce coup que tout iroit bien, proposa vn bel
expedient pour mettre fin à la guerre dans
six mois pour le plus tard, ratiocinant ainsi.
En France y a dix sept cents mille clochers,
dont Paris n'est comptẽ que pour vn: qu'on
prenne de chacun clocher vn homme Ca-
tholique souldoyẽ aux despens de la paroisse,
& que les deniers soyent maniez par des Do-
cteurs en Theologie, ou pour le moins gra-



duez nommez , nous ferons douze cent mille combatans , & cinq cents mille pionniers. Alors tous les assistans furent veuz tressaillir de joye, & s'escrier , ô coup du ciel : puis exhorta viuement à la guerre , & à mourir pour les princes Lorrains , & si besoïn estoit , pour le Roy très-Catholique , avec telle vehemence qu'à peine peut-on tenir son regimēt de moines & pedans , qu'ils ne n'en courussent de ce pas attaquer les forts de Gournay , & saint Denis : mais on les retint avec vn peu d'eau benistē, comme on apaise les mouches & frelons avec vn peu de poussiere. Puis Monsieur le Cathedrant acheua par cette conclusion (*Beatipauperes spiritu, &c.* Le sermon finy , la Messe fut chantee en haute note par monsieur le reuerendissime Cardinal de Peluē, à la fin de laquelle les chantres entonnerent ce motet (*Quam dilecta tabernacula tua:*) Lors tous ceux qui deuoient estre de l'assemblée, accompagnèrent Monsieur le Lieutenant au Louure, le reste se retira en confusion qui çà qui là chacun chez soy.

*Les pieces de tapisseries dont la sale des Estatx
fut tendue.*

OR deuant que vous parler des ceremonies, & de l'ordre des seances desdicts Estats, il ne sera pas hors de propos de vous figurer la disposition de la sale où l'assemblée se deuoit faire: La charpenterie & eschafaudage des sieges estoit toute sēblable à celles des Estats qui furent tenus à Troyes, sous le Roy Charles sixiesme, à l'instance & poursuite du Roy d'Angleterre & du Duc de Bourgongne lors que Charles septiesme Dauphin, & vray heritier de la couronne de Frâce, fut par lesdits Estats, degradé, & déclaré incapable de succeder au Royaume, luy & tous les adherans & fauteurs excommuniez, agrauez, & reagrauez, cloches sonantes, & chandelles esleintes, puis bannis (*ad tempus*). Mais la tapisserie dont ladicte sale estoit tendue, en douze pieces, où enuiron, sembloit estre moderne, & faicte express, richement estoffee à haute lisse, & le daix de mesme, sous lequel deuoit estre assis Monsieur le Lieutenant. A vn des costez & parue du daix par le dedans estoit representé au vit vn Sertorius habillé à la Françoisse parmy des Espagnols, consultant vne biche fée, dont il disoit entendre la volonté des Dieux: En

l'autre pante estoit l'effigie de Spartacus harangant son armee d'esclaues qu'il auoit fait armer & reuolter contre l'Empire Romain: En la troisieme estoit le pourtrait dudit personnage ayant vn flambeau dans la main, qui venoit de mettre le feu en vn temple: & au bas de la pante y auoit escrit (*Si aqua non possum, ruina extinguam..*) La quatrieme ne se pouuoit veoir, à cause de l'obscurité contre son iour. Au dessus de la teste & au fond dudit daiz estoit vn crucifix à la stampe moderne de Paris, ayant la main gauche attachee à la croix, & la droite libre, tenant vne espee nue ou estoit entouré ce dictum. *Super te, & super sanguinem tuum.* Par le dehors des trois pantes de deuant estoient fort bien élaborées les cheutes d'Icare & de Phaëton: & faisoit fort beau veoir les sœurs de ce jouvenceau se metamorphoser en arbres de peupliers, dont l'une, qui s'estoit rompue vne hanche en courant pour secourir son frere, ressembloit naïuement à la Douairiere de Montpensier, toute descheuelee.

La premiere piece de tapisserie proche du daiz estoit l'histoire du veau d'or, comme elle est descrite en Exode 32. chap. où Moÿse & Aaron y estoient representez par le Roy defunct Henry troisieme, & feu Monsieur le
 Cardi

Cardinal de Bourbon: mais le veau d'or estoit la figure du feu Duc de Guyse haut esleué, & adoré par le peuple, & les deux tables raportoient la foy fondamētale des Estats de Blois: & l'Edict de Iuillet 1587. & au bas de la piece estoient escrits ces mots, *In die ultionis visitabo & hoc peccatum eorum.*

La seconde piece estoit vn grand paisage de diuerses histoires anciennes & modernes, distinctes & separees l'vne de l'autre, & neantmoins serapportans fort ingenieusement à mesme perspective: au plus haut se voyoit representee la belle entree de nuit que fit le Duc Iean de Bourgogne à Paris, & quand les Parisiens crierent Noël dès la Toussaincts.

A vn des coings estoit la Harelle de Roüen, où vn marchant appellé le Gras, estoit esleu Roy par la populace. A l'autre coing estoit la laquerie de Beauuoisin, avec leur Capitaine Guillaume Caillet: au coing d'embas estoient les pourcelets liguez de Lyon: & à l'autre coing, les faicts heroïques des anciens Maillorins, sous les Capitaines Simmonet Caboché, & Iacques Aubriot, Roys des bouchers & escorcheurs: Et le tout en personnages racourcis, ne seruant que de paisage: Mais au fond & milieu de la piece



estoyent figurees les barricades de Paris, où l'on voyoit vn Roy simple & bon Catholique, & qui auoit tant faict de biens, & donné tant de priuileges aux Parisiẽs, estre chassé de sa maison, & assiegé de toutes parts, avec tonneaux & barriques pour le prendre. Là estoient representez plusieurs braues stratagemes des Sires qui menoyent Tremont, Chaligneraye, Flauaucourt, & autres bateurs de paucé, au lieu d'honneur: & au bas de ladiete piece estoit escrit ce quatrain.

*Iuppiter de ses tonneaux
Le bien & le mal nous verse:
Mais par ceux-cy tous nouueaux
Il met tout à la renuerse.*

La troisieme piece contenoit l'histoire d'Absalon, qui barricada son pere, & le chassa de la ville de Ierusalem: ayant gaigné & corrompu par caresses indignes les plus abiects & faquins du menu peuple: puis se voyoit la punition qu'il en receut, & comme Archito-phel son mauuais conseiller finit malheureusement ses iours: tous les visages estoient approchant d'aucuns deldits Estats, & se recognoissoient aisement le president lanin, Marteau, Ribaut, & autres, à qui le feu Duc de Guise faisoit tant de bonadiés aux Estats de Blois; Aussi se voyoyent Choulier, la Rue, Pocart,

Pocart, Senault, & autres bouchers, maquignons, iusques aux cureurs de fosses, tous gens d'honneur de leur mestier, que ledit defunct martyr baisoit en la bouche pour zele de religion.

La quatriesme representoit en gros les faicts d'armes des anciens & modernes assassins, autrement appelez Bedouins & Arsacides, qui ne craignoyent d'aller tuer iusques à la chambre, iusques au liêt, ceux que leur Prince imagininaire, Aloadin, surnommé le vieil des six ou sept montaignes, leur commandoit. Entre autres, y auoit deux figures plus aparentes, l'vne d'un Comte de Tripoli, assassiné par un Sarrazin zelateur de sa religion, en luy baissant les mains: Et l'autre d'un Roy de France & de Poulogne, proditoirement frappé d'un cousteau, par un moine desbauché zelateur en luy representant à genoux vne lettre missiue, & sur le front dudit moyne estoit escrit en grosses lettres l'anagramme de son nom, Frere Iaques Clement
C'EST L'ENFER. QVI M'ACRE E.

En la cinquiesme se voyoit la bataille de Senlis, où Monsieur d'Aumalle fut faict Conestable, & luy estoient baillez les Esperons aillez & zelez, par Monsieur de Longueuille,
Prin

Prince Politique, & par la Nouë bras de fer,
& Giury son suffragât: autour d'icelle estoient
escripts ces vers par quatrains.

*A chacun nature donne
Des pieds pour le secourir:
Les pieds sauuent la personne,
Il n'est que de bien courir.*

*Ce vaillant prince d'Aumalle
Pour auoir fort bien couru,
Quoy qu'il ait perdu sa malle
N'a pas la mort encouru.*

*Ceux qui estoient à sa suite
Ne s'y endormirent point,
Sauuant par heureuse fuite
Le moule de leur pourpoint.*

*Quand ouuerte est la barriere,
De peur de blasme encourir,
Ne demeure point derriere:
Il n'est que de bien courir.*

*Courir vaut vn diadesme:
Les coureurs sont gens de bien:
Tremont & Balagny mesme,
Et Congis le scauent bien.*

*Bien courir n'est pas vn vice:
On court pour gaigner le prix:
C'est vn honneste exercice:
Bon coureur n'est iamais pris.*

Qui bien court, est homme habile:

*Et a Dieu pour son confort:
Mais Chamois & Mene-ville
Ne coururent assez fort.*

*Souuent celuy qui demeure
Est cause de son meschef:
Celuy qui fuit de bonne heure
Peut combattre de rechef.*

*Il vaut mieu des pieds combattre
Enfendant l'air & le vent,
Que se faire occire ou battre
Pour n'auoir pris le deuant.*

*Qui a de l'honneur en vie
Ne doit pourtant en mourir:
Ou il y va de la vie
Il n'est que de bien courir.*

Et au coing de ladiete piece, se voyoit Pigenat au liēt malade, furieux & enragé de cette fortune, & attendant la responce de la lettre qu'il auoit escrite en poste à Madame Sainte Geneuiefue, bonne Françoisse, s'il en fut iamais.

En la sixiesme estoit depeint le miracle d'Arques, ou cinq ou six cens desconfortez, prests de passer la mer à nage, faisoient la nique, & mettoient en route par les charmes du Biar-nois, douze ou quinze mil Rodomonts, fendeurs de nazeaux, & mangeurs de charrettes ferrees : Et ce qui en estoit de plus beaux estoien,

estoyent les dames de Paris aux fenestres, & autres qui auoyent retenu place dix iours deuant sur les boutiques & ouuroirs de la rue Saint Anthoine, pour voir amener le Biarnois prisonnier en triomphe, lié, & bague, & comment il leur bailla belle, parce qu'il vint en autre habit, par les faux-bourgs saint laques & saint Germain.

La septiesme contenoit la bataille d'Iury la Chaussée, où se voioient les Espagnols, Lorrains, & autres Catholiques Romains, par mocquerie ou autrement, monstrent leur cul aux Maheustres, & le Biarnois tout eschauffé qui à bride abatue cheuauchoit l'v-nion par derriere. Il y faisoit beau voir Monsieur le Lieutenant, maudissant le dernier, & laissant le Comte d'Ayguemont pour les gages, trompé d'outre moitié de iuste prix, s'en courir sur vn cheual Turc, pour prendre Mante par le guichet, & dire aux habitans en nore basse & courte haleine, **M E S AMIS SAVVEZ MOY ET MES GENS : TOVT EST PERDV, MAIS LE BIARNOIS EST M O R T.** Sur tout y auoit vn merueilleux plaisir d'y voir sagement inuentorier ses cofres & bahués, & d'en voir religieusement acindre l'estendart de la foy, ou estoit peinct

vn crucifix sur tafferat noir , avec l'inscrip-
 tion. AVSPICE CHRISTO: tel qu'on
 qu'on le voit pendant en l'Eglise de Mante.
 C'est celuy estendant , peuple Chrestien , qui
 deuoir seruir d'oriflamme à ses successeurs
 Roys , à l'aduenir , si la corde n'eust rompu.
 Au coing de ladiete tapisserie y auoit vne dan-
 se de bergers & païsants, & aupres d'eux com-
 me vn tableau, dedás lequel estoit escrite cet-
 te chanson.

Reprenons la danse,

Allons, c'est assez:

Le printemps commence

Les Rois sont passez.

Prenons quelque trefue:

Nous sommes lassez:

Ces Rois de la feue

Nous ont harasses.

Vn Roy seul demeure:

Les fots sont chasses:

Fortune à ceste heure

Iouë aux pots casses.

Il vous faut tous rendre,

Roysembarrasses,

Qui voulez tout prendre,

Et rien n'embrassez.

Vn grand capitaine

Vous a terrassez:

Allons

Allons Jean du Mayne:

Les Roys sont passez.

La huitiesme estoit la representation des Paradis de Paris (*inplurali*) dedans lesquels & par dessus le sain& ciboire, estoient les images de trois Sain&s nouvellement imprimez depuis le calendrier Gregorien: portans ieunes doubles: l'un d'iceux estoit habillé de noir & de blanc, en pied griaische, ayant vn petit cousteau en la main, comme vn coupeur de bourse, tout autre que celuy de sain& Barthelemy: L'autre estoit vestu d'une soutane rouge, & d'une cuirasse par dessus, & vn chapeau de mesme à longs cordons, ayant en la main vne coupe pleine de sâg, d'ot il sembloit vouloir boire, & de la bouche luy sortoit vn escreteau en ces mots:

STATE IN GALEIS, POLITE
LANCEAS, ET INDVITE VOS
LORICIS.

Le troisieme estoit vn sain& à cheual, comme sain& Georges, ayant à ses pieds forces Dames & Damoiselles à qui il tendoit la main, & leur monstroient vne coronne en l'air, à laquelle en soupirant il aspirait avec ceste devise, DIFFICILIA QVÆ PVL-
CHRA. Le peuple leur portoit force chandelles, & disoit de nouueaux suffrages, atten-
dant

dant qu'ils feissent miracles : mais le vent emportoit & souffloit tout : les bordures de ladicte piece estoient de processions blanches , & de sermons & Tedeums renforcez , où se voyoyent en petit volume les faces de Boucher, Lincestre , & le petit Fueillant , exhortant le peuple à la paix par vne figure nommee Antiphrase.

La neufiesme faisoit voir au naturel vne grande geante gisante contre terre , qui auortoit d'une infinité de viperes & monstres diuers, les vns intitulez Gautiers, les autres Catillonnois, Lipans, Ligueurs, Catholiques zelez, & Chasteau-verds : & sur le front de ladicte geante estoit escrit : C'EST LA BELLE LVTECE, QUI POVR PAILLARDER AVEC SES MIGNONS A FAICT TVER SON PERE, ET SON ESPOUX. Madame d'Espagne luy seruoit de sage femme & de nourrice , pour receuoir & allaiter son fruit.

En la dixiesme estoit fort bien historice la prise de la ville de saint Denis , par le Cheuallier d'Aumalle , & y paroissoit le sieur de Viq , & le saint Apostre de France , qui luy fortifioit sa iambe de bois : Et saint Anthoine des champs , qui mettoit le feu aux poul-

dres, pour espouuenter les Parisiens. Au dessus de la dicte piece estoit vn escriteau contenant ces mots.

*Sainct Anthoine pillé par vn chef des vnis
Alla comme au plus fort s'en plaindre à S. Denis,
Qui luy à de ce tort la vengeance promise.
Vn peu de temps apres ce paillard entreprit,
De prendre sainct Denis, mais sanct Denis le prit,
Et vengea dessus luy l'une & l'autre entreprise*

Et au bas estoit l'epitaphe dudiect chéualier d'Aumalle, comme il s'ensuit, fors qu'il ne faisoit nulle mention qu'il fust mangé des rats & des souris.

*Celuy qui gist icy fut vn hardy preneur,
Qui fit sur sainct Denis vne fine entreprise,
Mais sainct Denis plus fin que cest entrepreneur
Le prit & le tua dedans sa ville prise.*

En l'onzième se voyoit au plus pres la pitteuse contenance du pauvre president Brisson, & de ses diacre & sous-diacre, quand on leur parla de confession, en leur baillant l'ordre de l'vnion: ensemble leut esleuation en greue. Et parce que ladiete piece n'estoit assez large pour couvrir l'huys de l'entree, à icelle estoit attachee vne demie piece de l'apothecose, ou canonisation des quatre Euanghelistes & martyrs, Sainct Louchard, Ame-
line,

line, Anroux, & Aymonnot, faisans la longue lettre, & à leurs pieds estoit escript ce quatrain,

*Meschants pendants qui les Iuges pendez,
Impunité par là vous pretendez:
Mais vous deuez tout le contraire attendre:
Oncques pendent ne peut son iuge pendre.*

La douziesme & derniere aupres des fenestres, contenoit le pourtraict fort bien tiré de son long, de Monsieur le Lieutenant, habillé en Hercules Gallicus, tenant en sa main des brides sans nombre, desquelles estoient encheuestrez des veaux aussi sans nombre: Audessus de sa teste, comme en vne nue, y auoit vne nimphe qui auoit vn escreteau portant ces mots, G A R D E Z V O U S D E F A I R E L E V E A V. Et parla bouche dudiect Sieur Lieutenant en sortoit vn autre, où estoient escripts ces mots, I E L E F E R A Y. Voila au plus pres ce que ie peu remarquer dedans ladiecte tapissierie. Quant aux bancs & siege où se doyent asseoir Messieurs les Estats, estoient tous couuerts de tapis parsemez de croisettes de Lorraines, noires & rouges, & de larmes imparities de vray & de faux argent, le tout plus vuide que plein, pour l'honneur de la feste.

DE L'ORDRE TENU
pour les seances.

A Pres que l'assemblée fut entrée bien auant dedans la grande sale, approchant des degrez où le daiz estoit esleué, & les chaires preparees, la place fut assignee à chacun par vn heraut d'armes, intitulé courtoise saint Denis : qui les appella tout haut par trois fois ainsi: Monsieur le Lieutenant, Monsieur le Lieutenant, Monsieur le Lieutenant de l'Estat & Couronne de France, montez là haut en ce throsne Royal, en la place de vostre maistre. Monsieur le Legat mettez vous à lateré. Madame la representante la Royne mere, ou grand mere, mettez vous del'autre costé. Monsieur le Duc de Guise Pair de la lieutenance de l'Estat & Couronne de France, mettez-vous tout le fin premier pour ce coup, sans preiudice de vos droicts à venir: Monsieur le Reuerendissime Cardinal de Peluë, Pair *ad tempus* de la lieutenance, mettez vous vis à vis & n'oubliez vostre Calepin: Madame la Douairiere de Montpensier, comme Princesse de vostre chef, mettez vous sous vostre nepueu. Madame la Lieutenande, la Lieutenande de l'Estat, sans preiudice de vos pre-tensions, mettez-vous contre elle. Monsieur
d'Au

d'Aumalle, Conneftable & Pair de la Lieutenance, à caufe de voftré Comté de Boulongne, erigee en pairrie, mettez-vous cofte à cofte du Reuerendiffime, & gardez de defchirer fa chape avec vos grands eſperons. Haut & puiſſant Comte de Chaligny qui avez ceſt honneur d'auoir monſieur le Lieutenant pour cadet, prenez voftre place, & ne craignez plus Chiquot qui eſt mort. Mōſieur le Primat de Lyon, infalible futur Cardinal de l'Vnion, Pair & Chancelier de la Lieutenance, laſſez-là voftre ſœur, & venez icy prendre voftre rang. Monſieur de Buſſy le Clerc, iadis grand penitencier du Parlement, & grand œconome ſpirituel de la ville & chafteau de Paris, mettez-vous aux pieds de monſieur le Lieutenant, comme grãd Chambellan de la Lieutenance. Monſieur du Saulſay, Pair & grand maiſtre de la Lieutenance à faute d'autre, prenez ce baſton, & vous allez tout doucement ſeoir en ce ſiege mollet, preparé pour vous. Meſſieurs les Mareſchaux de la Lieutenance Roſne, Dom Diego, Bois-dauphin, & Signor Cornelio, voyla vn banc pour vous quatre, ſauue à augmenter ou dimiuuer ſi le cas y eſcheoit: Meſſieurs les Secretaires d'Eſtat, Marteau, Pericard, des Portes, & Nicolas, ceſte forme d'embas eſt pour vous quatre, ſi les feſſes de

monſieur Nicolas y peuuent tenir : Monſieur de Saint Paul, Comte de Retheloirs à tiltre de precaire, n'a prochez pas ſi pres de Monſieur de Guife, de peur de l'eſchauffer, & vous tenez au pres du Sieur de Rieux : Meſſieurs les Ambaſſadeurs d'Eſpagne, Naples, Lorraine, & comté de Bourgongne, ce banc à main gauche eſt pour vous, & le banc à main droiſte, deſtiné pour les Ambaſſadeurs d'Angleterre, Portugal, Veniſe, Seigneurs, Comtes, & Princes d'Allemagne, Suiſſe & Italie, qui font defaut, ſera pour les dames & damoiſelles ſelon le date de leur impreſſion.

Au demourant, que tous les deputez prennent place à raiſon de leurs penſions, Telle fut à peu pres la ſeance de Meſſieurs les Eſtats : le tout ſans diſpute pour les preſeances, horsmis que le gardien des Cordeliers, & le Prieur des Iacobins conteſterent quelque peu, à qui irroit deuant : mais madame de Montpenſier ſe leuant, bailla l'aduantage au Prieur des Iacobins, en commemoration, comme elle diſoit, de ſainct Iaques Clement. Il y euſt auſſi vn peu de garbouil entre meſdames de Belin & de Buſſy, à l'occaſion que l'vne ayant laſché quelque mauuais vent pſeudocatholique, madame de Belin diſt tout haut à la Buſſy, Allons procureuſe, la
queue

queuë vous fume , vous venez icy parfumer les croix de Lorraine : mais monsieur le grand maistre du Saulsay oyant ce bruiët , & en sçachant la cause , leur cria le baston en la main tout beau , mes dames , ne venez point icy conchier nos Estats , comme ma sœur fit n'a pas long temps le bal du feu Roy en ceste sale mesme , Le bruit , & la mauuaise odeur passez , monsieur le Lieutenant commença à parler en ceste façon , avec vn grand silence & attention de messieurs les Estats.

*Harangue de Monsieur le
Lieutenant.*

Messieurs , vous serez tous tesmoings , que depuis que i'ay pris les armes pour la saincte Ligue , i'ay tousiours eu ma conseruation en telle recommandation , que i'ay preferé de tres-bon cœur mō interest particulier , à la cause de Dieu qui sçaura bien se garder sās moy , & se venger de tous ses ennemis : mesmes ie puis dire avec verité que la mort de mes freres ne m'a point tant outré , quelque bonne mine que i'aye fait , que le desir de marcher sur les érrres que mon pere , & mon bon oncle le Cardinal m'auoyent tracees , & dedans lesquelles mon frere le balafre estoit

heurenſement entré: vous ſçauéz qu'à mon re-
 tour de mon expedition de Guyenne, que les
 politiques appellent incagade, ie n'eſſectuyay
 pas en ceſte ville ce que ie penſoy: à cauſe des
 traîtres qui aduertifſoyent le tyran leur mai-
 ſtre:& ne tiray autre fruit de mon voyage que
la priſe de l'heritiere de Gaumont, que ie de-
 ſtinoy pour femme à mon fils, mais le chan-
 gement de mes affaires m'en faiſt à preſent
 diſpoſer autrement. D'auantage vous n'igno-
 rez pas que ie ne voulu point engager mon
 armee à aucun grand exploit, ni ſiege diffi-
 cile (en quoy toutesfois Chaſtillon me trompa,
 que ie penſoy emporter en trois iours) à fin
 de me reſeruer plus entier, pour executer
 mes Catholiques deſſeins. Quant à mon
 armee de Dauphiné, ie luy ſey tousiours fai-
 re halte, & me tins aux eſcoutes, pour atten-
 dre ſi aux Eſtats de Blois, vous auriez affaire
 de moy. Mais les choſes y ayants pris le con-
 tre-pied de nos ſouhairs & attentes, vous
 veſtes en qu'elle diligence ie vous vins trou-
 uer en ceſte ville, & avec quelle dexterité
 mon couſin le Conneſtable d'Aumalle cy pre-
 ſent, fit prealablement deſcendre le ſainct
Eſprit en haſte ſur vne partie de meſſieurs de
Sorbonne. Car auſſi toſt dict, auſſi toſt faiſt:
 Et de là ſont procedez tous nos beaux ex-
 ploits

ploicts de guerre : de là ont pris origine ces
miliers de saincts martyrs François, qui sont
 morts de glaiue, de faim, de feu, de rage, de
 desespoir, & autre violence, pour la cause de
 la sainte vnion : De là est venu le chastiment
 de tant de piaffeurs, qui vouloyent faire les
 galants, & s'accompagner aux Princes : de là
 procedent la ruine & demolition de tant
 d'Eglises & monasteres qui nuisoyent à la
 feureté de nos bonnes villes : de tant de sac &
 pillage que nos bons soldats franc archers,
 & nouices ont faict en maintes villes, bourgs
 & villages, qui ont serui de curee pour la foy
aux deuots enfans de la Messe de minuiet. De
 tant de belles filles & femmes qui ont sans
 nopces, & malgré elles, esté saoullées de ce
 qu'en mariage elles ayment le plus. Et Dieu
 scait, si ces ieunes moines tout fraischement
 defroquez, & ces prestres desbanchéz y ont
 deuotement tourné les fueillets de leur bre-
 uiaire, & gagné planieres indulgences. Bref
 ceste est la seule cause du prompt & zelé de-
 cret de meilleurs de nostre mere Sorbonne
 apres boire, qui a faict en fin esclater force
coups du ciel : Et par nostre bonne diligen-
 ce, nous auons faict que ce Royaume qui
 n'estoit qu'un voluptueux iardin de tout
 plaisir & abondance, est deuenu vn grand &

ample cimetiere vniuersel, plein de force
 belles croix peintes, bieres, potences, & gi-
 bets. Arriué donq que ie fu en ceste ville,
 apres auoir enuoyé guetir la ville d'Otleans
 de trop d'aïse, & interdire le commerce de
 Loyre, qui entretenoit leurs delices, i'en
 voulu autant faire en ceste ville. Et bien m'en
 prit: en quoy madame ma mere, ma sœur,
 ma femme, & la cousine d'Aumale, qui sont
 icy pour m'en desmentir, m'assisterent fort
 catholiquement. Car elles & moy n'eusmes
 autre plus grand song & sollicitude qu'à faire
 fond pour la guerre, & en ce faisant soulager
 Et descharger tous les deuots habitans bons
 catholiques, de la pesanteur de leurs bourses
 & vaquer curieusement de piedz & de mains
 à rechercher, & nous faisir des riches ioyaux
de la Couronne à nous appartenans en ligne
 collateralle, & par forfaiture du Seigneur
 feodal: nous descourismes à peu de frais par la
 reuelation d'un catholique maçon, & la sain-
 te innocence de monsieur Machaut (que ie
 nomme icy par honneur) le beau & ample
 muguot de Molan nonobstant ses démons
 gardiens & ses esprits familiers, que ledit Ma-
 schaut sçait vertueusement conjurer, rem-
 plissant à cachette d'escus au soleil le fond
 de

un
 les seigneurs
 tresors
 de
 l'espérance

de ses chausses. Et sans ce diuin secours Messieurs, vous sçavez que ne sçauions encorde quel bois faire fleches: Dont la sainte vnion est grandement redevable au soigneux menagement dudiect Molan qui refusoit si honnestement son maistre & tous ses amis de leur aider d'argent pour nous le conseruer si à propos, & n'oubliez de luy en faire chanter vn salué, quoy que se soit luy promettre vne Messe la main leuee, quand on luy fera faire son testament tout debout. Je ne veux oublier les sumptueux meubles d'or, d'argent, tapisseries, & autres richesses que nous feismes prendre, vendre, & subhaister appartenàs à ces meschans politiques Royaux, dont ma cousine d'Aumalle feit fort bien son deuoir, fouillant elle mesme dedans les cabinets, & iusques aux fosses où elle sçauoit qu'il y eust de la vaisselle d'argent cachee. Teilement que dès lors nostre tres-cher cousin son mary & elle & son grand page feient grandement leurs besongnes, & furent gueris de la iau-
nisse catholique dont ils estoient ensaffranchez depuis les guerres de leur Comté de Boulogne, à eux catholiquement & legitiment deuoluë par le merite de leurs paternostres & deuotes processions, non point par vsurpation & larcin domestique, comme disent les

*le feu
Roy*

les heretiques relaps: Ce faict pour monst^rer
ma liberalité & magnificence, apres m'estre
asseuré de plusieurs villes, chasteaux & clo-
chers, qui aisement se laisserent persuader
aux bons predicateurs, ausquels i'auoys faict
part de mon butin: ie dressay ceste puissante
& glorieuse armee de vieux soldats aguerris,
tous fraichement esmoulus, que ie menay
avec vn grand ordre & discipline tout droit
à Tours, où ie cuiday dire comme vn Ce-
sar Catholique, *Je suis venu, i'ay veu, i'ay vain-*
cu. Mais ce fauteur d'heretiques feit venir
en poste le Biarnois, lequel ie ne voulu atten-
dre trop près, n'y le voir en face, de peur
d'estre excommunié: & puis vous sçauēz q^{ue}
la leuee du siege de Senlis où mon cousin cy
présent a bien faict parler de luy, ioincte à la
deffaicte de Saueuse, me donnerent couuer-
ture de tourner visage. Ce que ie fy aussi vo-
lontiers que vous Messieurs de Paris, le desi-
riez, & m'en requeriez ardemment. Depuis
vous sçauēz à quel poinct nous fusmes re-
duicts, quand ce tyran fortifié de l'heretique
vint à nostre barbe prendre Estampes & Pon-
toise: mais par les bonnes & deuotes prieres
des peres Iesuites, & l'intercession de mada-
me ma sœur, avec l'entremise de plusieurs
saincts & religieux confesseurs, nous trou-
uaf

uasmes ce saint martyr, qui feit esclater ce
coup du ciel, & nous deliura de la misere &
 captiuité où nous estions prests de tomber
 en peu de iours. Tellement qu'ayant pris ha-
 leine, & faict nouueaux desseins, & nouueaux
 marchez avec nostre bon Roy tres-Catholi-
 que & pere nourricier, ie leuay les cornes
 hautes, & avec vne gaillarde armee mipar-
 tie, m'en allay hastier d'aller les maheutres,
 qui suyuant les bons aduis qu'en auoit receuz
 madiete Dame & sœur s'enfuyoient outre
 mer à petit train: mais parce qu'ils ne trou-
 uerent leurs vaisseaux prests à Diepes où ie
 fu les visiter, ie me mis en deuoir de les vous
 amener tous prisonniers en ceste ville, &
 vous souuiendra bien avec quelle asseuran-
 ce ie le vous promy, & avec quels prepara-
 tifs vous les attendiez: Toutes-fois quand ie
 vey que ces heretiques nous faisoient barbe
 de foire, & ne se vouloyent pas laisser pren-
 dre sans mitaines, ie fus en Flandres pour en
 chercher: & leur laissay ce pendant faire cesté
 bourrasque aux faux-bourgs de ceste ville,
 puis leur permis d'aller se pourmener tout
 l'hyuer à Vendosme, au Mans, ~~Argentan~~, Argen-
 ran, Falceze, Alençon, Vernueil, Eureux &
 Honfleur, que ie leut laissay tout expres pren-
 dre, m'assurant bien que tost apres i'auroy
 mada

tout leur butin en gros quand ils se seroyent
 bien morfondus & laissé mourir de froidure.
 Et de faict ie leurfey brauement leuer le cul
 à Dreux, & s'en fussent fuis s'ils m'eussent
 voulu croire. Mais vous sçauetz que ceste ti-
 relaisse nous couste bon : car ces meschans
 politiques n'en vouloyent qu'à moy, & m'eus-
 sent viléné s'ils m'eussent peu ioindre? de quoy
 ie me sceu bien garder par le bon exemple de
 mon cousin de Nemours, & de mes ainez &
 feaux aussi cousins les Duc & Cheualier d'Au-
 male, qui n'auoyent oublié le chemin de Mā-
 te. Ie ne puis messieurs, ie ne puis parler de
 ceste renuerse de fortune sans sourspirs & sans
 larmes : car ie seroy maintenant tout à faict,
 vous sçauetz bien quoy. Au lieu qu'il me fa-
 lut aller querir & mendier vn maistre en
 Flandres, & ce fut là que ie changeay ma cou-
 uerture Françoisse en cape à l'Espagnole, &
 donnay mon ame aux demons meridion-
 naux, pour desgager ce que i'auoy de plus
 cher dedans ceste ville : Mais ie me fusse faict
 valet de Lucifer, aussi bien que du Duc de
 Parme pour faire despit aux heretiques. Ie
 ne veux ~~passer~~ sous silence les artifices, ruses
 & inuentions dont i'ay vsé pour amuser &
 retenir le peuple, & ceux qui nous cuidoyent
 eschaper : en quoy il faut recognoistre que
 ma

madame ma sœur cy presente & monsieur le Cardinal Cajetan ont fait de signalez seruices à la foy, par subtiles nouuelles & Te Deums chantez à propos, & drapeaux contrefaicts en la rue des Lombards, qui ont donné occasion à plusieurs de mourir alegrement de male rage de faim, plustost que parler de paix: & si on eust voulu croire Monsieur Mandoze zelateur de la foy, & amateur de la France s'il en fut onq, vous n'auriez plus ceste horreur de voir tant d'ossements aux cimetieres de S. Innocent & de la Trinité, & les eussent les deuots Catholiques reduicts en pouldre, beuz & aualez & incorporez en leur propre corps, comme les anciens Troglodites faisoient leurs peres & amis trespassez. Faut il que ie recite les villes & seruiles submissions que ie fey pour amener nos nouueaux amis à vostre secours: & toutesfois ie me suis tesmoin, que i'ay tousiours eu mon desseing à part, quelque chose que ie disse & offrissi à ce bon Duc, & me suis tousiours reserué avec mon conseil estroit de faire quelque chose de bon, pour moy & les miens, en gardant les gages si ie puis: & aduienne qui voudra ie n'en deffèray que par force: & trouueray tousiours assez de difficultez pour executer ce qu'on me demande: ny ne manque

queray pas de bulles & d'excommunications,
 mercé de monsieur le Legat qui en sçait tout
 le tu autem, pour embabouiner ceux qui y
 voudront croire: Nous auons desia pratiqué
 deux illustrissimes Legats pour nous aider a
 vendre nos coquilles. Nous auons eu des
pardons gratis, sans bourse deslier; & sçauons
 bien de quel biais il faut prendre nostre saint
 Pere en le menaçant vn petit de faire la paix,
 s'il ne nous accorde ce que luy demandons:
 Auons nous pas eu de Rome des fulmina-
 tions a tors & à trauers contre nos ennemis
 politiques? Les auons nous pas fait excom-
 muner & deuenir noirs comme diables?
 Nous auons fait continuer les Paradis à
 desseing: nous auons embouché des Predi-
 cateurs affidez & hipotequez sous bon til-
 tre: nous auons fait renoueller les serments
 aux confrairies du cordon & du nom de Je-
 sus: nous auons mesnagé des processions nom-
 pareilles, qui ont obscurcy le lustre des plus
 belles mommeries qui furent oncques venuës:
 nous auons fait semer sous main par toute
 la France du Catolicon d'Espagne, voire
 quelques doublons qui ont eu des effects
 merueilleux, iusques aux cordons bleux po-
 litiques. Qu'eussé-ie peu faire dauantage, sinõ
 me donner aux diables par engagement &
 auance

auancement d'Hyrie comme i'ay fait ? Lisez les liures de Iosephe de la guerre des Iuifs : car c'est quasi vn mesme fait que le nostre, & iugez si les zelateurs Simon & Iean ont eu plus d'inuentions & desguisemens de matieres pour faire opiniastrer le pauvre peuple de Ierusalem à mourir de rage de faim, que i'en ay eu pour faire mourir de la mesme mort cent mille ames dedans cette ville de Paris, iusques à faire que les meres ayent mangé leurs enfans, comme ils firent en cette sacree Cité. Lisez ceste histoire ie vous prie, & pour cause, & vous trouuerez que ie n'ay espargné non plus qu'eux les reliques les plus saintes & vtensiles d'Eglise, que i'ay peu faire fondre pour mes affaires. I'ay cent fois violé ma foy particulièrement iuree à mes amis & parens, pour paruenir à ce que ie desire sans en faire semblant, & mon cousin le Duc de Lorraine & le Duc de Saouoye en scauroyent bien que dire, les affaires desquels i'ay tousiours postposees à la cause de l'Eglise Gallicane, & à la mienne. Quant à la foy publique, i'ay tousiours estimé que le rang que ietiens m'en dispensoit assez: & les prisonniers que i'ay retenus ou fait payer rançon contre ma promesse ou contre la composition par moy faite avec eux, ne me

peuvent rien reprocher, puis que i'en ay absolution de mon grand aumosnier & confesseur: le ne parleray point des voyages, que i'ay fait faire vers le Biarnois pour l'amuser d'un accord où ie ne pensay iamais: les plus fins de mon party ont esté embarquez, & n'en ont senty que la fraicheur du rasoir, & cela ne doit desplaire à Ville-Roy qui n'y est allé qu'à la bonne foy comme pouuez croire. I'en ay bien apasté d'autres qui ne s'en vantent pas: & qui ont traicté pour moy à deux fins, tant pour haster nos amis de nous secourir, que pour amuser noz ennemis à la moustarde, & si le Biarnois eust voulu croire quelques vns de son conseil qui ont quelque grain de Catholicon sur la langue, & qui ont tousiours crié qu'il ne falloit rien aigrir, de peur de desesperer tout, nous aurions maintenant beau jeu, au lieu que nous voyons que les peuples se sont mis d'eux mesmes à souhaitter & demander la paix, chose que nous deuons tous craindre plus que la mort, & aimeroy cent fois mieux me faire Turc ou Iuif, avec la bonne grace & congé de nostre saint Pere, que de voir ces heretiques relaps retourner jouir de leur bien, que vous & moy possedons à iuste tiltre, & de bonne foy par an & iour, voire plus. He Dieu

mes amis , que deuiendrions nous s'il faloit tout rendre? S'il faloit que ie reuinſſe à mō ancien eſtat, comment entretiendroy-ie mon plat , & mes gardes? Il me faudroit paſſer par des ſecretaires , & threſoriers de l'eſpargne tous nouueaux, au lieu que les noſtres paſſent par mes mains : mourons mourōs pluſtoſt que d'en venir là : c'eſt vne belle ſepulture, que la ruine d'vn ſi grand Royaume que celui-ci, ſoubs lequel il nous faut enſeuclir ſi nous ne pouuons grimper deſſus : Iamais homme qui ait monté ou ie ſuis, n'en deuala que par force: il y a pluſieurs portes pour entrer à la puiſſance que i'ay : mais il n'y a qu'vne iſſuë ſeulement, pour en ſortir, qui eſt la mort : C'eſt pourquoy , voyant qu'vntas de politiques qui ſont parmi nous, nous rompoient la teſte de leur paix, & de leur monarchie Françoïſe, ie me ſuis aduiſé de leur preſenter vne mommerie d'Eſtats , & apres auoir differé tant que i'ay peu pour eluder & faire refroidir les inſtantes pourſuites de leurs deputez , ie vous ay icy conuoquez pour y donner ordre avecques vous , & fueilleter enſemble leurs cayers pour ſçauoir où le malheur tient , & qui ſont nos amis , & nos ennemis : Mais pour ne point vous en mentir , ce n'eſt que pour leur clorre le bec, & leur faire croire

que nous trauaillons fort pour le public, & entendons volontiers à faire accord. Car les bonnes gens pour cela n'en pifferont pas plus roide : le sçay qu'il n'y a icy que de noz amis, non plus qu'aux Estats de Blois : & par consequent ie m'asseure que voudriez tous, autant pour moy que pour chacun de vous, que moy, ou vn Prince de nostre maison fust Roy, & vous vous en trouueriez bien: Si est-ce que cela ne se peut faire si tost, & y a encor vne Messe à dire, & faudroit faire vne grande breche au Royaume, parce qu'il en conuiendroit donner vne bonne partie à ceux qui nous y auroient aydé. D'autre part vous preuoyez bien les dangers & inconueniens de la paix qui met ordre à tout, & rend le droit à qui il appartient : c'est pourquoy il vaut encore mieùx l'empescher que d'y penser : Et quant à moy, ie vous iure par la chere teste de mon fils aisné, que ie n'ay veine qui y tende, & en suis aussi esloigné que la terre est du ciel : car encor que i'aye fait semblant par ma derniere declaration, & par ma responce subsequente, de desirer la conuersion du Roy de Nauarre : ie vous prie croire que ie ne desire rien moins : & aymeroy mieùx veoir ma femme mon neueu & tous mes couïns & parens morts, que veoir ce Biarnoï à la Messe. Ce

n'est

n'est pas là où il me desmange. Je ne l'ay escript & publié, qu'a dessein, non plus que Monsieur le Legat son exhortatiō au peuple François. Et tous ces escripts que Monsieur de Lyon a faicts, & fera cy apres sur ce subiect, ne sont qu'à intention de retenir le peuple en attendant quelque bonne auanture (vous m'entendez bien) que les peres Iesuites nous procureront pour faire vn second saint martir : Et d'ailleurs, c'est autant de diuision, & d'arediement, & attiedissement à noz ennemis : & autant de preparatoires pour le tiers party ou nous auons bonne part, comme estant vn grand moyen, s'il esclate, pour faire bien noz besongnes, & l'auancement duquel ie vous prie tous d'employer voz alliances & intelligences comme ie fay les miennes : Non pas pour contraindre l'heretique de tourner sa robe : car ie ne le desire, ni ne l'entends : & m'assure qu'il n'en fera jamais rien : tant il a le cœur obstiné : qui est ce que ie demande, afin qu'il demeure tousiours en sa peau, ce qui nous acquerra force bons amis Catholiques Apostoliques & Romains, inspirez du saint Esprit, qui l'empescheront bien de leur costé, & le mettront en grand accessoire, & m'assure que le Roy qu'ils feront, ne me contrepeze pas à la balance

Quoy qu'il en aduienne , nous auons enuoyé
 coup sur coup nos agens à Rome , comme
 Monsieur le Cardinal de Peluë , mon bon pre-
 cepteur vous pourra tesmoigner , pour ren-
 uerser la negotiation du Cardinal de Gondy,
 qui ne s'y eschauffera pas plus qu'il doibt , &
 les pratiques du Marquis de Pisani , qui est
 trop bon François pour nous , qui sont al-
 lez à Rome chercher vn chemin de paix: mais
 nous auons suscité nos Ambassadeurs d'Es-
 pagne de protester contre l'audience , & con-
 tre ce que le Pape voudroit faire sur la pre-
 tenduë conuersion du Biarnois: Monsieur le
 Legat nous a aidez à faire nos memoires &
 instructions , & y employera de sa part ses ha-
 bitudes, & confederations du consistoire. Et
 si la Saincteté faict autrement , ie sçay bien
 comment il en faut auoir la raison , le mena-
 çant que nous sçaurons bien faire en ce cas
 nostre accord avec les politiques , aux des-
 pens , & désauantage de l'Eglise de Rome.
 Aussi ne me conseillerez vous pas , que pour
 vne Messe que le Roy de Nauarre pourroit
 faire chanter , ce qu'à Dieu ne plaise , ie me
 demisse du pouuoir que i'ay , & que de demy
 Roy que ie suis , ie deuinsé valet ; pour faire
 tomber l'orage de ceste guerre , sur la teste
 de ces bons Catholiques Espagnols nos amis ,
 qui

qui nous veulent aprendre à croire en Dieu.
 Bien est vray que si ladicte conuersion adue-
 noit à bon escient, ie seroy en grande peine,
 & tiendroy le loup par les oreilles : Toutes-
 fois Monsieur de Lyon, & nos bons predica-
 teurs m'ont appris, qu'il n'est pas en la puissan-
 ce de Dieu de pardonner à vn heretique
relaps, & que le Pape mesmes ne sçauoit
luy donner absolution, fust-ce à l'article de
 la mort : ce que nous deuons tenir pour tre-
 ziesme article de foy, & l'adiouster au Sym-
 bole des Apostres : voire que si le Pape s'en
 vouloit mesler, nous le ferions excommu-
 nier luy mesmes par nostre mere la Sorbon-
 ne, qui sçait plus de Latin, & boit plus catho-
 liquement que le consistoire de Rome. C'est
 donc sur quoy il nous faut principalement
 insister par quels moyens nous empesche-
 rons la paix, & rendrons la guerte immortel-
 le en France : Monsieur de Lyon sçait bien
 que le Roy d'Espagne & moy luy auons pro-
 mis sur nostre honneur vn chapeau rouge
 s'il peut tât faire par sa rhetoricue, d'en ve-
 nir à bout, & sa sœur à desia receu pour arres
 vn carcan de trois mil ducats, & vne ches-
 ne de perles catholiques, avec quelque mi-
 lier de doublons. Nous auons aussi certains
 politiques au Conciliabule, & Senatule des

ennemis, qui filent desia quelques cordons dudit chapeau rouge, & si nous leur enuoyons vn peu de soye cramoisie pour faire les resnes de leur mule, ils nous aideront bien, & empescheront bien que ces meschans Huguenots acariastres n'entrent aux Estats, & que rien ne se face, ni se passe au detrimement & deshonneur de nostre saint Pere, & du saint siege Apostolique voire quand les priuileges de l'Eglise Gallicane s'en deuoyent perdre. Il coniuere donc toute ceste Catholique assemblee, de tenir la main, & employer verd & sec pour empescher que les Parisiens & autres villes ne nous viennent rompre la teste de leur paix, mais qu'elles prennent la mort en gré, & souffrent leur totale ruine, plustost que d'y penser, & d'en ouurir la bouche. Il faut racler des prieres de l'Eglise ces fascheux mots (*Da pacem Domine,*) comme Monsieur le Legat, vous pourra tantost faire entendre qu'ils ne sont point de l'essence de la Messe, ni mots sacramentaux: faisons seulement semblant & bonne mine: Si Ville-roy s'en lasse, nous aurons Zamet, qui pour le plaisir queluy a fait mon bon cousin le Duc d'Elbeuf, ne plaindra ses peines & voyages, & se laissera aisément beffler sur l'esperance de ses greniers à sel. Quoy qu'il en soit
& ad

& aduienne qui pourra, si nous nous entendons bien, & continuons noz intelligences avec ce bien heureux tiers party. nous brouillerons si bien les affaires, que ceux de Bourbon ne se verront de trente ans ou ils pensent: car ie ne feray iamais plus decas d'eux que i'ay fait de leur oncle, que i'ay laissé mourir en prison & en necessité, sans me soucier gueres de luy apres qu'il nous eut seruy de pretexte, & de planche, que les Huguenots appelloyent planche pourrie, pour monter ou ie suis: Car ie scay bien, que tant qu'il y auroit de ceste race Bourbonnoise, qui fait meilleure preuue que moy de descendance de Sainct Louys: iamais ni moy ni les miens ne regnerions sans querelle: C'est pourquoy vous ne deuez doubter que ie feray tout ce que ie pourray pour m'en defaire. Pour le moins vne chose me console. c'est que si les ennemis tiennent Sainct Denis, où les vieux Rois sont enterrez, nous en tenons les ioyaux, reliques, & ornemens Royaux, qui sont fricassez pour eux, par la sainte deuotion de mon frere de Nemours, qui a fait fondre la Couronne. Mais qui plus est, la sainte Ampoule de Reims est en nostre puissance, quand nous en aurons affaire. Sans laquelle vous m'entendez bien. C'est vn

coup du ciel : Si prions tous bons confesseurs, predicateurs, curez, & autres deuots pensionnaires, de faire rage sur le subiect, afin que Dieu nous en sçache gré : Pour mon regard, ie tiendray tant que ie pourray les choses en balance, & apparence: comme i'ay tousiours faiët au gouuernement de ceste ville, ne souffrant que le party des politiques soit trop rabaislé, ni celuy des seize trop esleué & insolent de peur que l'vn des deux se faisant le plus fort, ne me voulust aussi faire la loy: Ce que mon cousin le Duc de Lorraine me reproche que i'ay appris de la Royne mere, que Dieu absolue. Au reste ie croy qu'il n'y a pas vn de vous qui ne se souuienne de la mort de Sacremore, apres m'auoir faiët plusieurs bons seruices : i'ay esperance que moy, & mon nepueu en ferons bien d'autres à l'honneur de ce bon Dieu, pourueu que vous autres messieurs nous seruiez de pareille affection, & attendiez pareille recompense en ce monde ou en l'autre. Quant à la pelade, que certains politiques m'ont voulu impropérer, m'accusant que la sainte Cere, ou la Louë(ie ne sçay laquelle des deux) me l'auoyët donnée, Ils en ont menty les meschans, ie n'y songeay iamais: ce n'est que certaine chaleur de foye que les medecins appellent alopecie,

pecie, à laquelle moy & les miens sommes subiects, & Monsieur de Lyon ſçait que les gouttes viennent bien ſans cela: Et ſ'il eſt autrement, que les loups me puiſſent manger les jambes, vous priant pour l'honneur de la ſainte vnion n'en croire rien, & regarder à vos affaires. Car nous auons vn ennemi qui ne dort pas, & qui vſe plus de botres que de ſouliers: vous y donnerez ordre, & vous garderez des eſcroüelles, & de tomber du haut, mal, ſi vous pouuez. I'AY DICT.

Monsieur le Lieutenant ayant acheué ſa harangue, avec grand applaudiſſement de l'aſſiſtance, où le Preſident de Nully, & Acharie laquays de la Ligue furent, veu plorer de joye, le Doyen de Sorbone grand Dataire du Legat ſe leua, & cria tout haut, *Humiliate vos ad Benedictionē, & poſtea habebitis haranguā*: Alors Monsieur le Legat, trois profondes & copieuſes benediſtions preallablement faiſtes, commença à parler ainſi.

H A R A N G V E D E M O N - S I E V R L E L E G A T.

IN nomine patris, † †. Io mi rallegro, & ſon
Iquaſi fuora di meſteſſo (ô Signori, & populi, più
Catholici che i medeſimi Romani) di veder vi qui
colle

santià, non gli mancano. Tanto piu grande & ri verità sarà sua santità, quanto voi altri homuncioni sarete piccoli & piccolini: Et non parlate piu di tanta beni, è tante fauori ch' i predecessori vostri hanno fatte a la sante sede apostolica, anco meno delle ricchezze, & paezi che gli Pape hanno del beneficio di Carlo magno, & di sui successori regi di Francia: questo è cosa fatta: le pardonanze che ha veterice vute da pochi anni in qua, con le gratuite indulgenze, & Iubilei, sono di molto piu pregio, basta che le corone, e gli settri del mondo sono à dispositione di sua santità, & si possono cambiare, transfullare, & torre & porre à suo modo. *Scriptum est enim, hæc omnia tibi dabo. Atque ut pergam latina lingua vobis loqui, ne forte aliquis non satis intelligabat Italianam, dicam vobis summam legationis meae quæ sumpta est ex Matthæi 10. capit. Nolite arbitrari quia pacem venerim mittere in hæc terram: Non veni pacem mittere sed gladium, Nihil enim habeo magis in mandatis, & instructione secreta quam ut vos perpetuò exhortem ad bellum & prelium, atque totis viribus impediam ne tractetis ullo modo de reconciliatione, & pace inter vos. Quod sanè magnum esset crimen & indignum Christianis & catholicis hominibus. Alterum vero punctum quod habeo vobiscum agendum, est de electione cuiusdam Principis boni catholici, in Regem vestrum, repudiata prorsus ista familia Borboniorum, quæ tota est hæretica, aut hæreticorum faulrix: Ego verò scio, gratissimam rem*

vos facturos domino nostro Papæ , & Sanctæ sedi
 Apostolicæ , nec non benefactori meo Christianissimo
 & Catholissimo Hispaniarum & tot regnorum Regi,
 si Britannia Armorica ducatum conseruetis illustris-
 simæ filie eius infanti : regnum vero conferatis alicui
 principi ex eius familia , quem illa maritum eligere
 voluerit , & dotali corona Franciæ dignabitur in so-
 lidum utrique competenti. Sed de hoc plura reuerendis-
 simus Cardinalis de Peluë vobis differet , & pro reli-
 quo supplebit : Cognoscit enim melius quàm me vestra
 negotia , quæ per viginti annos tam Lotharingice,
 quàm Hispanicè tractauit Romæ , adeò subtiliter , &
 fideliter , ut reduxerit res vestras ad punctum , ad quod
 illas nunc reductas videtis : Idcirco cùm crederet pius
 iste presul , & ciuis , Franciam matrem suam esse in
 agone mortis , & trahere vltima suspiria , venit nuper
 ad visitandam eam , tanquam bonus & deuotus con-
 fessarius & optimus compatriota ad vos iuuandum,
 in pompa funebri , & exequiis eius. Sed si velletis eli-
 gere aliquem in regem ex suis benefactoribus Lotha-
 ringiæ , & Guisii , sanè vos faceretis ei secundum cor
 suum : & ille alacriter vngeret & sacraret eum ex
 oleo sanctæ ampullæ quod habet Remis expressè reser-
 uatum , & bene seruatum sub custodiâ sancti Pauli
 Campaniæ , & Roteliæ ducis : Vos videritis : Ego de ex-
 presso mandato domini nostri , si quid in hoc feceritis
 contra leges & mores huius regni , vel contra concilia
 Ecclesiæ , vel etiam contra euangelium & decalogum
 saltem

Saltem secundum impressionem hæreticorum, vobis promitto plenam absolutionem, & indulgentiam, idque gratis, in secula seculorum. Amen.

Oi me, non mi ricordi va di vi far intendere una molto buona nuoua, ch'òrice vuta in fretta di Roma, pel mezo di Zametto: cio é che la sua Santità, scemmunica, agraua, anathematiza tutti Cardinali, Archiuescoui, vescoui, Abati, preti, & Monachi chi sono reali politici, quanto i catholici sianò: E per torre ogni differenza, & gelosia tragli Spagnuoli e Francezi, fara il santissimo padre, che i Francezi haranno le scrofole, come i Spagnuoli: & di ventanno anco bravadori, & bugeroni come essi. Oltre fa piene indulgenze à tutti quanti buoni catholici Loreni, ó Hispani Francezi i quali amazzarono padri, fratelli, cugini, vicini, podestate, principi reali, politici heretici, in questa Christianissima guerra, fine à trecenta milli anni di vero perdonno. E non dubitate ch'il spirito santo vi manca: per che il sacro consistorio lo fa descendere à alle braccia di Dio padre, à sua posta: comme sapete ch' à disnegato dopo molti anni di creare alcuno Papa che non fosse Italiano, ó Hispano: In fine, fate un Re, di gratia, per amor mio: E me non me ne curo che ci sia, fosse el diauolo, modo che sia seruitore e feudatario de la sua Santità, e del Re Catholico per mezo del qual son stato fatto Cardinale, merce al buon duca di Parma: Ben vi dirò il mio voto sarebbe volentieri per la Infanta di Spagna, per che ella e valente donna,

È amata molto di suo padre, Neante di meno farete quel che piacerà al Signor Duca di Feria, è a Monsour lo Loutenant. Ma guardate vi mentre d'aprir la bocca perragionar di pace ô trega: altramente il sacro collegio rinegara Christo. Ego me vobis commendo, Iterum. Valete.

Ces mots finis, le petit Launay cy deuant ministre passé en l'vniuersité de Geneue, & à present boute-cul de Soborne, apres auoir mangé les grands breuiaries & heures du feu-Roy à faire festins à Monsieur le Lieutenant, se mit à genoux avec Garinus Cordelier, & apostre apostat, & assistez de Cuilly Curé de Sainct Germain Lauxerrois, & d'Aubry, Curé de Sainct André des Arts, reuenant de confesser Pierre de Barriete, entonnerent à haute voix deuant la croix de Monsieur le Legat,

O crux aue spes unica Hoc passionis tempore
 Quelques vns de l'assemblee le trouverent mauuais: toutes fois chacun les suiuit en chantant de mesme, & le bransle finy, le sort toucha à monsieur le Cardinal de Pelué de parler, lequel se leuant sur ses deux pieds, comme vne oye, apres auoir fait vne tres-profonde reuerence deuât le siege de Monsieur le Lieutenant, son chapeau rouge aualé en capuchon par derriere, puis vne autre semblable deuant Monsieur le Legat, & vne autre bassissime de

uant

uât les dames: puis s'estât rassis, & touffy trois
bonnes fois, non sans excréation phlegmati-
que, qui excita aussi vn chacun à faire de mes-
me, il commença de dire ainsi, adressant sa
parole à Monsieur le Lieutenant, qui luy dist
par trois fois, couurez vous mon maistre.

*H A R A N G V E D E M O N -
sieur le Cardinal
de Peluë*

MOnsieur le Lieutenant vous m'excuse-
rez, si pour contéter ceste docte assen-
blee, & garder le decorum, & la dignité du
rang que ie tiens en l'Eglise par la prouiden-
ce de vous & des vostres, ie fay quelque dis-
cours en langage Latin, auquel vous sçaez
qu'il y a long temps que i'estudie, & en sçay
presque autant que mon grand pere qui fut
vn bon gendarme & vn bon fermier quant
& quât sous le Roy Charles huiëtiefme: mais
quand i'en auray dit trois mots, ie reuien-
dray à vous & à vos affaires: le m'adresseray
donq à vous, hommes illustres, *atque ex tota
Galliarum colluue electissimi, ut vobis intelligere
faciam multa quæ Gallica lingua satis non possunt
exprimari. Est enim opera pretium, ut nos præcipuè*

qui studuimus in celeberrima academia Parisius, &
 sapimus magis quàm fex populi, habeamus aliquid se-
 creti quod mulieres non intelligant: Volo igitur vos sci-
 re (& hæc dicantur tantum pijs auribus) quod exiit
 edictum siue mauultis rescriptum per breue à domi-
 no nostro Papa, per quod nobis permittitur eligere, crea-
 re sacrare, & ungere Regem nouum, talem qualem
 vobis placuerit, modo sit de stirpe vel Austriarum vel
 Guisacæ: habetis igitur ad providendum ex utraque gen-
 te mauultis principem: Nam de istis Borbonijs non
 sunt loquela neque sermones, quanto minus de isto hæ-
 retico relapso, quem idem dominus noster Papa, per
 idem rescriptum adfirmat esse iam damnatum apud
inferos, & animam eius propediem seruituram Luci-
 fero pro merenda pomeridiana. Sanè ego sum Gallus,
 nec renegabo meam patriam: Sed si ista electio vade-
 ret ad libitum meum, profectò pro bono meo & meorum,
 atque etiam vestro, libenter vos precarem, ut dare-
 tis vestras voces alicui ex familia Lotharena, quam
 scitis tam bene fecisse in republica catholica, & eccle-
 sia Romana: fortasse verò Dominus Legatus habet
 aliud intentum, ad placendum Hispanis: Sed non di-
 cit omnia quæ habet in serinio pectoris: Vos interea
 hoc tenete, firmum: nullo modo esse loquendum aut au-
 diendum de pace facienda cum istis damnatis politi-
 cis, quin potius armate & parate vos ad patiendum
 omnes extremitates vel etiam mortem, famem, ignem,
 & ruinam totius urbis vel regni: nihil enim potestis
 face

facere gratus & acceptabilius Deo, & Regi nostro Philippo Catholissimo. Non ignoro Luxemburgum & Cardinalem Gondium & marchionem Pisanum Romam profectos, ut præparent animum domini nostri Papæ, ad audiendum Legationem Biarnezi, tractaturam de conuersione sua: Sed quantum tuta est Luna à Lupis, tantum auersum est cor domini nostri à talibus negotijs: Estote fortes & securi sicut & ego: modo sim intra muros Parisius. Sanè paraueram aliquid boni ad dicendum vobis de Beato Paulo cuius conuersio heri celebrabatur: quia sperabam quod heri in ordine meo me contingeret loqui. Sed me fefellit longanimis oratio domini de Mania: & idè cogor remittere in vaginam gladium latinitatis mee: quem volebam stringere in conuersionem istam, de qua politici nonnulli nescio quid seminant in vulgum, quam tamen neque credo neque cupio: Quoniam beatus Paulus multum distabat ab isto Nauarra: erat enim nobilis, & cuius Romanus: & quod nobilis fuerit, & stirpe nobili cætus apparet, ex eo quod Roma fuit illi arputatum caput: Iste verò est infamis propter heresim, & tota familia Borboniorum, descendit de becario, siue mauultis de laño, qui carnem vendebat in laniena Parisina, ut asserit quidem poëta valde amicus sanctæ sedis apostolica, & idè qui nolisset mentiri. Paulus etiam conuersus est cum miraculo: iste non nisi forte dicat, obsidione se cinxisse hanc urbem menses circiter quatuor cum sex millibus hominum, dum

ntus essent plus quàm centum millia: & hoc esse miraculum, & cepisse tot vrbes, & arces fortissimas, siue murorum subuersione, sed per inuia foramina, & arctos cauos vix vni soli militi penetrandos: Ad-
dite, quod Paulus timuit, & magno terrore est affectus ex fulgure cœli; at iste est imperterritus, nec timet quidquam, nec fulmen, nec fulgura, nec imbres, nec hyemem & glaciem, aut æstum, immo nec acies nostras & exercitus nostros tam bene instructos: quos cum pauca manu audet expectare, & ante venire, & debellare aut fugare. Pereat male diabolus iste velox, & in somnis, qui nos tam laboriose fatigat, & impedit dormire ad nostrum libitum. Sed hætenus de Paulo, ne Polycarpus cuius hodie festum agitur fortasse inuideat, quem tamen prætermittam, quia de eo nihil prævidi, aut præmeditavi. Memini quidem cùm essem Roma in tempore Gregorij Papa, me proposuisse in consistorio quinque protesta, siue problemata disputanda, quæ tota respiciebant sanctissimam istam congregationem de eligendo Rege Francia: Nam ab eo tempore quo me Henricus deffunctus iste fautor hereticorum spoliauit meo episcopatu Senonnensi, & in sua manu posuit meos redditus & beneficia quæ habebam in suo regno, semper habui animam & intentionem me vindicandi, & feci omnia quæ potui, & faciam in æternum quando deberem animam meam traddere diabolo vt ista insignis iniuria cadat in caput Gallorum omnium qui passi sunt, nec se opposuerunt
oppro

opprobrio meo, Quod cum essem sapius protestatus, tandem effeci: & vos scireti bene quid dicere. Sed aliò me vocant principes isti, & ista totius orbis insignes vñones & gemma mirabiles, quos & quas alloqui nunc res postulât, cateràm que turbam deputatorum, & deputantium, quorum interest vt intelligant me differentem lingua Gallica, quam penè dedidici loqui, aded patriam meam sum oblitus.

Je retourneray donc à vous Monsieur le Lieutenant, & vous diray que si i'eusse trouué en France les affaires auoir reüssi selon les pratiques & intelligences que i'ay mences depuis vingt & cinq ans avec les Espagnols à Romme; ie verroy maintenant feu monsieur vostre frere en ce throsne Royal, & aurions occasion de chanter avec ce bon patriache, NVNC DIMITTIS: Mais puis que ce n'a pas esté la volonté de Dieu qu'ainsi fust, patience: assez va qui fortune passe: Si vous diray-je en passant que *fide mea*, il vous fait fort bon voir, ouy Monsieur le Lieutenant, il vous fait fort bon voir assis là où vous estes & auez fort bonne mine, remplissez bien vostre place, & ne vous aduient point mal à faire le Roy: Vous n'avez faute que d'une bonne cheuille pour vous y bien tenir: vous auez toute pareille façon, sauf l'honneur que ie doy à l'Eglise qu'un Saint Nicolas de vil-

lage, *à se di dieu*, il me semble que nous celebrons icy la feste des innocents, ou le iour des Rois. Si vous auiez maintenant vn plein verre de bon vin, & qu'il pleust à la Maiesté de vostre lieutenance boire à la compagnie, nous crierons tous, le Roy boit, aussi bien n'y a-il gueres que les Roys sont passéz: où nous empeschames bien qu'on ne feist des Roys de la febue de peur d'inconuenient, & de mauuais presage: mais si vous estes icy à ceste my-Karesme prochaine, nous cheuaucherons tous avecques vous par les ruës, & ferons la my-Karesme à cheual, si nous pouuons retenir iusques à lors toute ceste Catholique assemblee: à laquelle ie veux maintenant adresser mon propos en general, & que tout le monde m'entende: Messieurs ne me tenez pas pour homme de bien, & bon Catholique, si la maladie de France (ie n'entends parler *del male francioso*) ie veux dire vos miseres & pauuretez, ne m'ont faiët venir pardeça, où ie me suis comporté en vray hypocrite, ie vouloy dire Hipocrate, mais la langue m'a fourché. Ce grand medecin voyāt son pays affligé d'une maladie epidimique & peste cruelle, qui exterminoit tout le peuple, s'aduisa de faire allumer force feux par toutes les contrees pour purger & chasser le mauuais

air:

air: Et moy tout de mesme pour venir à bout de mes desseings Catholiques, & pour antidote à nostre Sainte Vnion qui est frappée de peste, i'ay esté vn des principaux autheurs (ie le dy sans vanterie) de tous ces feux & embrasemens qui brulent & ardent maintenant toute la France, & qui ont tantost mis & consommé en cendre le plus beau qui y fust de reste des Goths & Visigoths: Si le feu Cardinal de Lorraine mon bon maistre viuoit il vous en rendroit bon tesmoignage: car m'ayant tiré de la marmite des cappetes de Montagu, puis mis en la court de Parlement, ouie descouury bien l'eschole, quand il me fit Euesque, puis Archeuesque, & en fin Cardinal, ce fut tousiours à condition expresse d'acheminer cest affaire à sa perfection & obliger ma vie & mon ame à l'auancement de la grandeur de Lorraine, & détrimet de la maison des Valois & des Bourbons: Aquoy ie n'ay pas failly en tout ce que possible m'a esté, & que maceruelle s'est peu estendre: Et en ces iours derniers les presidents Vétus, & Ianin m'ont assisté de memoires & pratiques, & ont quasi empieté mon credit; & deuant eux encor mes collegues Daud, & Piles n'eussent pas fait grand chose sans moy, ni moy sans eux: Le pauvre Salcede scauoit

bien vn tantinet du secret, mais non pas tout:
 & n'eut pas bon bec: car il descourrit le por
 aux roses: dōt il faillit à nous prédre avecques
 luy: Toutesfois nous auons bien eu la raison
 de tous ces Valesiens: & l'aurons Dieu ay-
 dant de ces Bourbonnistes, si chacun de vous
 y veut faire *di galante huomo*, Quant à moy
 Messieurs me voicy à vostre commandement
 à vendre & despandre, pourueu que comme
 bons Catholiques zelez vous vous submet-
 tiez aux Archicatholiques princes Lorrains,
 & Supercatholiques Espagnols, qui aiment
 tant la France, & qui desirent tant le salut de
 vos ames qu'ils en perdent la leur par charité
 Catholique, dont c'est grand pitié, & vous
 prie y aduiser de bonne heure de peur que ce
 Biarnois ne nous iouë quelque tour de son
 mestier: car s'il alloit se conuertir & ouyr vne
 petite messe seulement (*cancaro*) nous se-
 rions affolez, & aurions perdu tout à vn
 coup nos doublons & nos peines. Mais encor
 que ces bonnes gens de Luxemboug & Pi-
 sani le promettent à nostre Sainct pere, il
 n'en sera peut estre rien. C'est puorquoy *in*
dubio, vous vous deuez haster de vous met-
 tre entre les mains des medecins ces bons
 Chrestiens de Castille qui scauent vostre ma-
 ladie, & en cognoissent la cause, & par con-
 sequent

sequent sont plus propres à la guerir si les
voulez croire : Car ceux qui disent que les
Espagnols sont de dangereux empiriques, &
sont comme le loup qui promettoit à la bre-
bis de la guerir de sa toux, cela est faux : ce
sont tous heretiques qui le disent : & tout
bon Catholique doit croire sur peine d'ex-
communication & de sensure eclesiastique
que le preux Roy d'Espagne voudroit auoir
perdu ses Royaumes de Naples, Portugal &
Nauarre, voire sa duché de Milan, & le Com-
té de Roussillon, & tous les droicts qu'il a aux
pays bas que les Estats luy gardét, & que tous
les François fussent bon catholiques, & vou-
lussent volontairement & de hait receuoir
ses garnisons avec la sainte inquisition, qui
est la vraye & vnique touche, pour cognoi-
stre les bons Chrestiens & Catholiques ze-
lez ; enfans d'humilité & obeissance. Ne
croyez donc pas que ce bon Roy vous en-
uoye tant d'ambassadeurs, & vous face en-
uoyer ces bons personages Legats du Saint
Pere à autre intention que pour vous faire
croire qu'il vous ayme sur toutes riens : Pen-
seriez vous bien que luy qui est Seigneur de
tant de Royaumes qu'il ne les peut compter
par les lettres de l'alphabet, & si riche qu'il
ne sçait que faire de ses thresors, voulust se

mettre seulement en peine de souhaitter si petite chose que la seigneurie de Frâce? Toutel'Europe, par maniere de dire, ne luy est pas vne contree de ces nouuelles isles conquises sur les sauuages : quand il suë ce sont des diadèmes : quand il se mouche, ce sont des couronnes, quand il rotte, ce sont des Sceptres, quand il va à ses affaires, ce ne sont que Comtez & Duchez qui luy sortent du corps tant il en est farcy & remply : Ce seroit donc bien à propos de soupçonner qu'il voulust estre Roy de France : *ma de si*. Ie ne dy pas que pour guerir des escrouelles dont ses pays meridionaxx sont fort infectez, il ne feist quelque chose à la priere des deuots habitans de la bonne ville de Paris, quil ont supplié par lettres expressees signees de leurs mains de les receuoir comme ses bons subiects & seruiteurs, & d'accepter le pesant fardeau de la Couronne de France : ou si son doz estoit si courbé & chargé d'autres Couronnes plus precieuses, que celle de France n'y peust trouuer place, pour le moins il en recompensast quelqu'un de ses hidalgos, qui luy en feroient foy, hommage, & reuerence : mais autrement ie vous prie pour l'honneur de Dieu, ne pensez pas qu'il y pense : Ses comportements aux pays bas, & aux terres neufues, vous doyuent
asseurer

aſſeurer qu'il ne penſe à nul mal , non plus
 qu'un vieil ſinge. Et quand ainſi ſeroit qu'il
 vous auroit tous faitz entretuer , & perir par
 feu , fer , & famine , ne ſeriez vous pas bien-
 heureux d'eſtre aſſis là haut en paradis au
 deſſus des confeſſeurs & patriarches , & vous
 moquer des maheutres , que vous verrez deſ-
 ſous vous roſtir & bouillir aux chaudieres de
 Lucifer ? Mourez quand il vous plaira , nous
 auons aſſez de Mores , Africains , Vallons &
 foruſcits pour mettre en voſtre place : tuez ,
 maſſacrez , & bruſlez hardiment tout : Mon-
 ſieur le Legat pardonnera tout : Monſieur
 le Lieutenant aduoüera tout : Monſieur
 d'Aumale vous adiugera tout : Monſieur de
 Lyon ſeclera tout , & Monſieur Marteau ſi-
 gnera tout : Je vous ſeruiray de pere confeſ-
 ſeur & à la France auſſi , ſi elle à l'eſprit de ſe
 laiſſer mourir bonne catholique , & faire les
 Lorrains & Eſpagnols ſes heritiers : comme
 ie vous en prie tous en general & particu-
 lier : vous aſſeurant apres Monſieur le Legat
 que vos ames ne paſſeront point par le feu
 de purgatoire , eſtans aſſez purgees par les
 feux que nous auons allumez aux quatres
 coings & au milieu de ce Royaume , pour la
 ſaincte ligue , & par la penitence , ieufnes , &
 abſtinence que nous vous faiſions faire en
 deuo

deuotion. Quant à l'election d'un Roy, ie
 donne ma voix au marquis des Chaussions:
 il n'est lipu ny camus; ains bon catholique,
 apostolique & Romain: Je le vous recom-
 mande, & moy de mesme. *In nomine patris &
 filij, & spiritus, Amen.*

Ces mots finis, tous les docteurs de Sor-
 bonne & maistres és arts la presens frapperent
 en paulme, & crierent V I V Á T par plu-
 sieurs fois: & si fort que toute la sale en reten-
 tissoit: & apres que le bruit fut un peu cessé
 se leua le Prieur des Carmes hors de sa place
 & monta sur son banq où il prononça tout
 haut de fort bonne grace ce petit quatrain
 comme s'il l'eust composé sur le champ.

*Son eloquence il n'a peu faire voir,
 Faute d'un liure où est tout son sçauoir:
 Seigneurs Estats, excusez ce bon homme:
 Il a laissé son Calepin à Rome.*

Et tout à l'instant un petit maistre és arts
 faillit aussi en pieds & tournant le visage vers
 mondict sieur le Cardinal de Pelué, repliqua
 de mesme en autant de carmes.

*Les freres ignorants ont eu grande raison
 De vous faire leur chef, monsieur l'illustrissime
 Car ceux qui ont ouy vostre belle oraison
 Vous ont bien reconnu pour ignorantissime,
 Tout le monde trouua ceste rime fort plai-
 sante,*

sante, & apres auoir faict vn second battement de mains, non toutesfois si long que le precedent, monsieur de Lyon se leua, & fit signe de la main qu'il vouloit parler, parquoy apres que tout le monde eut sonprement & rheologalement touffly, craché & recraché, pour l'ouyr plus attentiuement, à cause de la reputation de son eloquence, il discourut ainsi ou enuiron.

Harangue de Monsieur de Lyon.

MEssieurs, ie commenceray mon propos par l'exclamation pathetique de ce prophete Royal Dauid. *Quàm terribilia iudicia tua, &c.* O Dieu que vos iugemens sont terribles, & admirables. Ceux qui prendront garde de bien pres aux commencemens & progres de nostre sainte vnion auront bien occasion de crier les mains ioinctes au ciel; O Dieu si vos jugemens sont incomprehensibles, combien vos graces sont elles plus admirables, & de dire auecl'Apostre, *ubi abundauit dilectum, ibi superabundauit & gratia*. N'est ce point chose bien estrange, messieurs les zelateurs, deuoir nostre vnion maintenant si sainte, si zelee, & si deuote, auoir esté presque en toutes ses parties composee de gens
qui

qui au parauant les saintes barricades, estoient tous tarez & entachez de quelque note mal sollée, & mal accordante avec la iustice? Et par vne miraculeuse metamorphose voir tout à vn coup, l'atheyisme conuertý en ardeur de deuotion: L'ignorance, en science de toutes nouueautez, & curiosité de nouuelles. La concussion, en pieté & en ieunes, la volerie, en generosité & vaillance, bref le vice, & le crime transmué en gloire & en honneur? Cela sont des coups du ciel, comme dict monsieur le Lieutenant, de pardieu: le dy si beaux que les François doyuent ouurir les yeux de leur entendement pour profondement considerer ces miracles, & doyuent la dessus les gens de bien, & de biens de ce Royaume rougir de honte avec presque toute la noblesse, la plus saine partie des Prelats & du Magistrat, voire les plus clair voyans qui font semblant d'auoir en horreur ce saint & miraculeux changement. Car qui à il au monde de plus admirable, & que peut Dieu mesmes faire de plus estrange, que de voir tout en vn moment, les valets deuenus maistres, les petits estre faicts grands, les pauvres riches, les humbles insolents & orgueilleux: voir ceux qui obeissoient, commander: ceux qui empruntoient, prester

ster à vsure: ceux qui iugeoyent estre iugez:
ceux qui emprisonnoyent, estre emprison-
nez: & ceux qui estoyent debout estre assis;
O cas merueilleux! ô misterès grands! ô le-
crets du profond cabinet de Dieu, incognus
aux chetifs mortels: les aulnes des boutiques
sont tournées en pertuisanes: les escrivoires
en mousquets: les breuiaires en rondaches, les
scapulaires, en corselets, & les capuchons en
calques & salades? N'est ce pas vn autre
grande & admirable conuersion, de la plus
part de vous autres messieurs les zelez, entre
lesquels ie nommeray par honneur les sieurs
de Rosne, de Mandreuille, la motte Serrand,
le cheualier Breton, & cinquante autres des
plus signales de nostre party, qui me feroient
faire vne hiperbate & parenthese trop lon-
gue, (& que ceux que ie ne nomme point n'en
sçahcent gré:) N'est ce pas di-je grand cas que
vous estiez tous n'aguières en Flandres por-
tās les armes politiquemēt, & employans vos
personnes & biens cōtre les archicatholiques
Espagnols; en faueur des heretiques dēs pays
bas, & que vous vous soyēz si catholiquemēt
rangez tout à vn coup au giron de la saintte
ligue Romaine? Et que tant de bons matois,
banqueroutiers, saffranniers, desesperez,
hauts-gourdiers, sorgueurs, tous gens de
fac,

sac, & de corde se soyent iettez si courageu-
 sement & des premiers en ce saint party,
 pour faire leurs affaires, & soyent deuenus
 catholiques à double rebras, bien loing dé-
 uant les autres? O vrais patrons de l'enfant
 prodigue dont parle l'Euangile: ô deuots en-
 fans de la messe de minuiet: ô saint Catho-
 licon d'Espagne, qui es cause que le prix des
 messes est redoublé, les chandelles benistes
 rencheries, les offrandes augmentees, & les
 saluts multipliez, qui es cause qu'il n'y a plus
 de perfides, de voleurs, d'incendiaires, de
 faussaires, de coupegorges & brigans; puis
 que par ceste sainte conuersion, ils ont chan-
 gé de nom, & ont pris cet honorable tiltre
 de catholiques zelez, & de gendarmes de l'e-
 glise militante: O deïfiques doublons d'Es-
 pagne, qui auez eu ceste efficace de nous fai-
 re tous raieunir, & renoueller en vne meil-
 leure vie. C'est ce que dict nostre bon Dieu
 parlant à son pere en saint Matthieu, vnzié-
 me, *Abcondisti à prudentibus & sapientibus, &*
reuelasti ea paruulis. Certes meilleurs il me
 semble reuoir ce bon temps, auquel les
 Chrestiens pour expier leurs crimes se croy-
 soient, & alloient faire la guerre outre mer
 comme pelerins, contre les mescreans, & in-
 fidelles: O saints pelerins de Lansac, & ton
 bon

bon frere bastard, Euesques de Comminges, qui auez faict enrooler à la foule en vos quartiers tant d'honnestes gens, qui ressemblans aux menestriers n'auoyent rien tant en haine que leur maison. Je ne veux icy comprendre maints Gentils hommes & autres qui sont du bois dont on les faict: quoy que ce soit, qui en ont la mine, & se monstrent vaillans coque-plumets sur le paué de Paris, lesquels ayans esté pages à pied, ont serui les Princes catholiques, & leurs adherans, se sont obligez de gayeré de cœur à suyure leur party, voire se fussent ils rendus Turcs, comme ils disent: ayants mieux estre traistres à leur Roy, & à leur patrie, que manquer de parole à vn maistre qui luy mesmes est valet, & subiect du Roy. A la verité nous sommes grandement obligez à ces gens là, aussi bien qu'à ceux qui ayants receu quelque escorne ou dommage du tyran, ou des siens, se sont par indignation, & esprit de vengeance, tournez vers nous, & ont preferé leur iniure particuliere à tout autre deuoir: & deuons aussi beaucoup remercier ceux qui ayant commis quelque assacinat ou insigne lascheté & volerie, au party de l'ennemy, se sont catholiquement iettez entre nos bras, pour eiter la punitiõ de Iustice, & trouuer parmy nous,

toute franchise & impieté : car ceux là plus
 que nuls autres sont obligez à tenir bon ius-
 ques à la mort pour la sainte vnion : c'est
 pourquoy il ne se faut point deffier du baron
 d'Alegre, ni de Hacqueuille, gardien du pō-
 reau de mer, ni du concierge de Vienne, &
 autres qui ont faict de si beaux coups pour
 gagner Paradis avec dispence de leur ser-
 ment, ni pareillement de ceux qui ont cou-
 rageusement mis la main au sang, & à l'em-
 prisonnement des Magistrats politiques : en
 quoy Monsieur le Lieutenant a eu beaucoup
 de dextérité pour les engager, & leur faire
 faire des choses irremissibles, & qui ne mérit-
 tent d'auoir iamais pardon, non plus que ce
 qu'il a faict. Mais gardons nous de ces nobles
 qui disent qu'ils sont bons François, & qui
 refusent de prendre pensions, & doubloins
 d'Espagne : & font cōscience de faire la guer-
 re aux marchands & laboureurs : ces gens
 sont dangereux, & nous pourroyent faire
 yn faux bond : car ils se vantent que si le
 Biarnois alloit à la messe, iamais leurs espees
 ne couperoyent contre luy ni lès siens qu'il
 vous souuienne des entreueues, & parlement
 qu'aucuns font si souuent vers saint Denys,
 & des passeports qu'on reçoit, & qu'on en-
 voye si facilement de part & d'autre : ces
 gens

gens là messieurs : n'oyent la messe que d'un genou, & ne prennent de l'eau benistc en entrant en l'église qu'en leur corps deffendant. Ha pleust à Dieu qu'ils ressemblassent tous à ce saint pelerin confesseur & martyr cathorique zelé monsieur de la Mothe Serrand, lequel estant és prisons és Tours pour rendre tesmoignage de sa foy, refusa de disner & prendre sa refection de potage vn iour de vendredy, craignant qu'on eust mis de la graisse en sa soupe : & protesta ce champion de la foy, ce Macabee, ce deuotieux martyr de souffrir plustost la mort que de manger soupe autre que catholique. O illustres assistants choisis & tirez au volet pour la dignité de ceste notable assemblée, la pure cresse de nos prouinces, la mere goutte de nos gouuernements, qui estes venus icy auec tant de trauaux, les vn à pied, les autres seuls, les autres de nuit, & la pluspart à vos despens. N'admirez vous point les faiets heroniques de nos Louchards, Buffis, Senaulds, Oudineaux, Morrelières, Cruceux, Goudards, & Drouarts, qui sont si bien parutenus par la plume? Que vous semble de tant de Caboches qui sont trouuez, & que Dieu a suscitez à Paris, Rouën, Lyon, Orleans, Troyes, Toulouse, Amiens, où vous voyez les bouchers,

*3 Ces hui
sont des
saize*

les tailleurs, les chiquaneurs, bastelliers, cousteliers : & autres especes de gens de la lie du peuple auoir la premiere voix au conseil, & assemblees d'Estat, & donner la loy à ceux qui auparauant estoient grands de race, de biens, & de qualité; qui n'oseroient maintenant rousir n'y gommeler deuant eux? N'est-ce pas en cela que la prophetie est accomplie qui dict *de stercore erigens pauperem*? Seroit-ce pas crime de passer sous silence ce saint martyr frere Iaques Clement, qui ayant esté le plus desbauché de son couuent (comme scauent tous les Iacobins de ceste ville) & mesme ayant eu plusieurs fois le chapitre, & le fouët diffamatoire pour ses larcins & meschancetez, est neantmoins auourd'huy sanctifié, & maintenant est là haut a debatre la prescence avec saint Iago de Compostelle. O bien-heureux cōfesseur & martyr de Dieu que ie serois volontiers le paranimphe & encomiaсте de tes loüanges, si mon eloquence pouuoit atteindre a tes merites. Mais i'ayme mieux m'en taire que d'en dire trop peu: & continuant mon discours parleray de l'estrange conuersion de ma personne propre: encor que Caton die, *Nec te laudaris nec te culpaueris ipse*: Si vous confesseray-ie librement
que

que auparauant ceste sainte entreprise d'union, ie n'estoy pas grand mangeur de crucifix: & quelques vns de mes plus proches & qui m'ont hanté plus familièrement, ont eu opinion que ie sentoy vn peu le fagot: A cause qu'estant ieune escholier i'auoy pris plaisir de lire les liures de Calvin, & estant à Tholose m'estoy meslé de dogmatizer de nuit, avec les nouveaux Lutheriens: & depuis n'ay iamais fait grande conscience ny difficulté de manger de la chair en Karesme, mais depuis que i'eu signé la sainte ligue, & la loy fondamētale de cest Estat accompagnée des doublons, & de l'esperance du chapeau rouge, personnen'a plus douté de ma creance, & ne s'est enquis plus auant de ma conscience & de mes deportements: Veritablement ie confesse que ie doy ceste grace de ma conuersion, apres Dieu, à monsieur le duc d'Esprenon, qui pour m'auoir reproché au cōseil ce dont on ne douroit point à Lyon touchant ma belle sœur, fat cause que de grand politique, & vn peu Calviniste que i'estoy, ie deuins grand & coniuré ligueur, comme ie suis à present directeur & ordonnateur des affaires secretes, & importants de l'Estat de la sainte vnion: ne plus ne moins que le

benoist saint Paul , qui de persecuteur des Chrestiens , fut fait vaisseau d'election: C'est pourquoy il dit : *Ibi abundauit delictum ibi abundauit & gratia*. Ne doutez donc plus de demeurer fermes & constants en ce saint party , plein de tant de miracles , & de coups du ciel , desquels il faut que fassiez vne loy fondamentale: Quant aux necessitez & oppressions du Clergé , vous y aduiserez , s'il vous plaist: car pour mon regard ie mettray peine que ma marmite ne soit renuersée , & auray tousiours credit avec Roland & Ribault , qui ne manqueront de me payer mes pensions de quelque part que l'argent vienne: Chacun aduisera à se pouruoir si bon luy semble , & de ma part ie ne desire point la paix , que premierement ie ne soys Cardinal , comme on m'a promis , & comme ie l'ay bien merité: car sans moy monsieur le Lieutenant ne seroit pas au degré où il est: à cause que ce fut moy qui retins le feu Duc de Guyse son frere , qui s'en vouloit aller des estats de Blois se deffiant de quelque sourde embusche du tyrā: mais ie le fey demeurer pour attendre la depesche de Rome , qu'on me deuoit apporter dedans trois iours. & ce fut pourquoy madame sa mere cy presente , m'a reproché maintesfois, que i'estoy cause de la mort:

dont

dont monsieur le Lieutenant & tous les siens me doyuent sçauoir bon gré; par ce que sur ce pretexte, & pour vanger ceste belle mort, nous auons excité les peuples, & pris occasion de faire vn autre Roy, Courage donq courage, mes amis: ne craignez point d'exposer vos vies, & ce qui vous reste de biens, pour monsieur le Lieutenant, & pour ceux de sa maison: ce sont bons Princes & bons catholiques, & qui vous aiment tout plein: ne parlez point icy de luy abroger sa puissance, qu'aucuns murmurent ne luy auoir esté donnée que iusques à vne prochaine tenuë d'estats: ce sont des comptes de la cigogne. Ceux qui ont gousté ce mourceau ne demor-
dent iamais: demanderiez vous vn plus
beau Roy, & plus gros, & plus gras qu'il
est? C'est, par saint laques, vne belle piece
de chair, & n'en sçauriez trouuer vn qui
le peze. Messieurs de la noblesse, qui tenez les villes & chasteaux au nom de la sainte vnion, estes vous pas bien aises de leuer toutes les tailles, decimes, aydes, magazins, fortifications, guet, coruees, impôts, & daces de toutes denrees, tant par eau que par terre, & prendre vos droicts sur toutes prises & rançons, sans estre tenus d'en rendre compte à personne? Souz quel

Roy trouueriez vous iamais meilleure condition , vous estes barons vous estes comtes & ducs en proprieté de routes les places & prouinces que vous tenez. Vous y commandez absolument & en rois de cartes: Que vous faut-ils mieux : laissez & oubliez ce nom specieux de monarchie Françoisse, & ne vous souuienne plus de vos ancestres ni de ceux qui les ont enrichis & anoblis : bref, *qui bien sta, non si moue* : Quant à vous messieurs les Ecclesiastiques, à la verité i'y perds mon latin, & voy bien que si la guerre dure , il y aura moult de pauvre prestres: mais aussi n'esperez vous pas vostre recompense en ce monde caducq, ains au ciel, où la couronne de gloire eternelle attend ceux qui patiront & mourront pour la sainte ligue. Se sauue qui pourra: quant à moy ie suis capable de porter vn bonnet rouge , mais de remedier & obuier aux necessitez & oppressions du Clergé , il n'est pas en ma puissance , & mes gouttes ne me donnent pas le loisir d'y penser. Toutes fois ie crains vne chose : c'est que si le Roy de Nauarre reuoque les passeports , & les mainleuees qu'il a donnees aux monasteres & chapitres , il y aura danger que vous ne criez tous au meurtre apres le saint Pere & monsieur le Legat , & le reuerendissime Cardinal cy presents

sents, qui pourroyent bien laisser les portes en France, s'ils ne se sauuent de bonne heure de-là les monts. Je laisse à messieurs les Predicateurs de tenir tousiours en halaine leurs deuots parroissiens, & reprimer l'insolence de ces demandeurs de pain ou de paix: Ils sçauent les passages de l'escriture pour accommoder à leurs propos, & les tourner, virer aux occasions comme ils en auront besoin. Car iâmais ne fut dit pour neant que l'E-uangile est vn cousteau trenchant, qui coupe des deux costez. *Iuxta illud, & de ore eius gladius utraque parte acutus exibat:* & comme dit l'Apostre saint Paul, *Viuus est sermo Dei, & efficax & penetrabilior gladio ancipiti.* Or ce qui importe pour le present le plus à nos affaires, c'est de bastir vne loy fondamentale, par laquelle les peuples François seront tenus de se laisser coiffer, embeguiner, encheuestrer, & mener à l'appetit de Messieurs les cathedrants: voire se laisseront escorcher iusques aux os, & curer leurs bourses iusques au fond sans dire mot, ny s'enquerir pourquoy. Car vous sçauiez Messieurs que nous auons affaire de nos pensions. Mais sur tout, faictes souuent renouveler les serments de l'vnion sur le precieux corps de nostre Seigneur, & continuez les confrairies du nom de Iesus & du cordon.

Car ce sont de bons colliers pour menues gens : dequoy nous chargeons l'honneur & conscience de nos bons peres les Iesuites : & leur recommandons aussi nos espions , à fin qu'ils continuent de faire tenir seurement de nos nouuelles en Espagne , & reçoient aussi les mandats secrets de sa Majesté Catholique, pour les fares tenir aux Ambassadeurs, agens, curez, conuens, marguilliers & maistres des contrairies : & qu'en leurs particulieres confessions ils n'oublient pas de deffendre sur peine de damnation eternelle de delirer la paix, & encore plus d'en parler, ains faire opi-
maistrer les deuots Chrestiens au sac, au sang &
au feu, plustost que se soumettre au Biarnoïs,
quand bien il iroit à la messe, comme il a don-
né charge à ses Ambassadeurs d'en asséurer le
 Pape : mais nous sçauons bien la contrepoison si cela aduient, & donnerons bien ordre que la Sainteté n'en croira rien, & le croyant n'en fera rien, & le faisant que nous n'en receurons rien, si ie ne suis Cardinal : Pourquoi ne le feray-ie pas, si maistre Pierre de Frontac estant simple Aduocat à Paris du temps du Roy Iean le fut bien, pour auoir diligemment deffendu les causes de l'Eglise? Et moy qui ay quitté mon
maistre, & trahy mon pays pour soutenir la
 grandeur du saint Siege Apostolicque, ie ne
 le

le seroy pas ? Si feray, si, ie vous en asseure, on
mes amis me faudront. l'ay dit.

Après que ledict Sieur Archeuesque eut
finy son epiphoneme en grande emotion
de corps & de voix, il demanda permission
tout bas à madame de Monpensier de se re-
tirer pour changer de chemise, parce qu'il
s'estoit eschaufé en son harnois : Le bedeau
de monsieur le Recteur qui estoit à ses pieds
luy feit fendre la presse, puis s'estant escoulé
par dessus les bancs des deputez, mondict
sieur le Recteur Roze reuestu de son habit
rectoral sous son roquet & camail d'Eues-
que portatif, ostant son bonnet par plusieurs
fois, commença ainsi.

*H A R A N G V E D E M O N -
sieur le Recteur Roze, iadis
Euesque de Senlis.*

TRes-illustre, tres-auguste, & tres-catholi-
que synagogue, tout ainsi que la vertu
de Temistocles s'eschaufoit par la conside-
ration des triumphes, & trophées de Mil-
tiades. Ainsi me sens ie eschauffer le coura-
ge en la contemplation des braues discours
de

de ce torrent d'eloquence, monsieur le Chancelier de la lieutenance, qui vient de triompher de dire. Et à son exemple, ie suis meud'une indicible ardeur de mettre en auant ma rethorique, & estaler ma marchandise en ce lieu, où maintefois i'ay faict des predications qui m'ont par le moyen du feu Roy, faict de meusnier deuenir Euesque, comme par vostre moyë ie suis d'Euesque deuenu meusnier: mais ie pense auoir assez monstré par mes actions passées, que ie ne suis point ingrat, & que ie n'ay faict que ce que i'ay veu faire à plusieurs autres de ceste noble assistance, qui ont receu encores plus de biens que moy du Roy defunct, & neantmoins l'ont brauement chassé de son Royaume, & faict assassiner pour le bien de la foy Catholique, sous esperance d'auoir mieux comme nous nous estions genereusement promis. Or ie ne veux icy refriquer les choses passées, ni capter vostre beneuolence par vn long exorde, mais sommairement vous diray, meslieurs, que la fille aînée du Roy, ie ne dy pas du Roy de Nauarre, mais du Roy que nous èsllrons icy, si Dieu plaist, & en attendant ie diray la fille aînée de monsieur le Lieutenant de l'Estat & Couronne de France. L'vniuersité de Paris, vous remonstre en toute obseruan

seruance que despuis les cunabules, & primor-
des, elle n'a point esté si bien morigence, si mo-
deste, & si paisible qu'elle est maintenant par
la grace & faueur de vous autres messieurs.
Car au lieu que nous souliions voir tant de fri-
pons, friponniers, iuppins, galoches marmit-
tons, & autres sortes de gens mal-faisans, cou-
rir le paué, hanter les bourdeaux, tirer la laine,
& quereler les rotisseurs de petit pont, vous ne
voyez plus personne de telles gens par les Col-
leges: tous les supposts des facultez & nations
qui tumultoyent pour les brigues des licences
ne paroissent plus: on ne iouë plus de ces jeux
scandaleux, & satires mordantes aux eschau-
faux des Colleges, & y voyez vne belle refor-
mation, s'estans tous ces ieunes regens retirez,
qui vouloyent monstrier à l'enuy, qu'ils sça-
uoyent plus de Grec & de Latin que les au-
tres: Ces factions des maistres és arts, où l'on se
batoit à coups de bourlet, & de chaperon, sont
cessées: tous ces escoliers de bonne maison,
grands & petits ont faict gille: les Libraires,
IMPRIMEURS, Relieurs, Doreurs, & autres
gens de papier, & parchemin, au nombre de
plus de trente mil, ont charitablement fendu
le vent en cent quartiers pour en viure, & en
ont encor laissé suffisamment pour ceux qui
ont

ont demeuré apres eux. Les Professeurs publics, qui estoient tous royaux, & politiques, ne nous viennent plus rompre la teste de leurs harangues, & de leurs congregations aux trois Eueques, ils se sont mis à faire l'alquemie chacun cheux soy: Bref, tout est coy, & paisible, & vous diray bien plus: iadis du temps des politiques & heretiques Ramus, Galandius, & Turnebus, nul ne faisoit profession des lettres qu'il n'eust de longue main & à grand frais estudié, & acquis des arts, & sciences en nos Colleges, & passé par tous les degrez de la discipline scholastique: Mais maintenant par le moyen de vous autres messieurs, & la vertu de la saint-union, & principalement, par vos coups du ciel, monsieur le lieutenant, les beurriers, & beurrieres de Vanues, les ruffiens de Montrouge, & de Vaugirard, les vigneronns de saint Cloud, les carreleurs de Ville juifue, & autres cantons Catholiques sont deuenus maistres és arts, bacheliers, principaux, Presidens, & bourriers des Colleges, Regs des Classes, & si argus Philosophes que mieux que Ciceron maintenant ils disputent *de inuentione*, & apprennent tous les iours, *astrodidactos*, sans autre precepteur que vous monsieur le lieutenant, apprennent dy-ie à mourir de faim *per' régulas*: Aussi

n'oyez

n'oyez vous plus aux classes ce clabaudement latin des Regens qui obtrondoyēt les aureilles de tout le mōde: au lieu de ce jargon, vous y oy ez à toute heure du iour l'harmonie argētine, & le vray idiome des vaches & veaux de laiēt, & le doux rossignolemēt des asnes & des truies qui nous seruent de cloches, *pro primo, secundo, & tertio*: Nous auons desiré autrefois sçauoir les langues Hebraique, Grecque, & Latine: mais nous aurions a present plus de besoing de langue de bœuf salée, qui seroit vn bon commentaire, apres le pain d'auoine: Mais le Mans, & Laual, & ces infallibles voitures d'Angers, avec leurs chapons de haute graisse, & gelinotés nous ont failly, comme les langues; & n'auons plus qu'vn amer souuenir de ces messagers academiques quī descendoient à l'arbalēste, & autres fameuses hosteleries de la ruē de la harpe, à iour & poinēt nommé, au grād contentement des escoliers attendans, & de leurs Regens friponniers, vous estes cause de tout cela, monſieur le lieutenant: & tous ces miracles sont œuures de vos mains: il est vray que nos predications & decrets n'y ont pas nuit. Mais tant y a que vous en estes le principal motif & instrument, & pour vous dire en vn mot, vous nous auēz perdus & esperdus: Excusez moy, si

ie parle ainsi: le diray avec le Prophete Dauid:
loquebar in conspectu regum, & non confundar: vous
 auez, *inquam*, si inquiné, diffamé ceste belle fil-
 le aisnee, ceste pudique vierge, ceste fleurissan-
 te pucelle, perle vniue du monde, diamant de
 la France, escarboucle du Royaume, & vne des
 fleurs de lis de Paris la plus blanche, que les
 Vniuersitez estrangeres en font des sornettes
 Grecques & Latines & *versa est in opprobrium*
gentium. Cependant messieurs nos Docteurs ni
 trouuent que frir: car ils n'ont pas les que-
 stions quolibetaires si frequentes: plus ne se
 passent Bacheliers, licenciés, ni Docteurs où
 ils souloyent auoir leurs propines, & festins &
 se saouloient *vsque ad guttur*: le vin d'Orleans
 ne vient plus, encore moins celuy de Gascon-
 gne: tellement que les ergots sont cessez: & si
 quelqu'un des plus espagnolisez a quelques
 doublons, & reçoit quelques pension du Le-
 gat a catimini, ce n'est pas à dire que les autres
 s'en sentent. Au reste, monsieur le Lieutenant,
 vous auez fait pendre vostre argentier con-
 zelateur Louchard, & auez declairé par con-
 sequent pendables tous ceux qui ont assisté
 à la ceremonie de l'ordre de l'vnion qu'on a
bailliee au President Brisson. Or est-il que
 tous les ieunes curez, prestres, & moines de
 nostre

nostre vniuersité , & nous autres docteurs pour la pluspart auons esté promoteurs de ceste , tragedie , *ergo gluc* : & vous dy que si ne vous fussiez hasté de venir , nous en eussions bien fait d'autres , & n'eussions pas demouré en si beau chemin : & tel parle auourd'huy bien hault à qui les dents ne feroient point de mal , si vous eussiez encor tardé trois iours à venir : Mais pour reuénir à mon premier theme : i'argumente ainsi : Louchard & ses consorts ont esté iustement pendus , parce qu'ils estoient pendarts. *Atqui* la pluspart de nous autres docteurs estions consorts & adherants , & conseillers dudit pendu : *ergo* pendarts & pendables. Et ne sert de rien d'alleguer l'abolition qui nous a esté faite , touchant ce Catholique assassinat. Car *remissio non dicitur nisi ratione criminis* , ne pouuant la dicte abolition abolir la peine meritee , voire quand vous la destramperiez cent fois en Catholicon d'Espagne , qui est vn saumon qui efface tout. Il faut donc necessairement argumenter ainsi , *in barroquo*. Quiconques fait pendre les Catholiques zelez , est tiran & fauteur d'heretiques : *Atqui* Monsieur le Lieutenant a fait pendre Louchard , & consorts Catholicissimes , & zelatissimes : *Ergo* Monsieur le Lieutenant est tiran , & fauteur d'hereti-

ques pire que Henry de Valois qui auoit pardonné à Louchard, Haste, & la Morliere, dignes du gibet plus de trois ans deuant les baritades : Qu'ainſi ne ſoit, *probo minorem : à maiori ad minus* : Le Biarnoïs a tenu entre ſes mains priſonniers les principaux chefs de la Ligue, comme Boiſdaulphin, Peſcher, fontaine Martel, Flauacourt, Tramblecourt, les Cluzeaux, & pluſieurs autres qui me doiuent ſçauoir gré, ſi ne les nomme, leſquels il n'a pas faiſt prendre, le pouuant & deuant : *quia non vult mortem peccatoris, ſed vt reſipiscat*, comme aucuns ont faiſt : Et neantmoins eſt heretique, ou tenu pour tel, *Ergo* Monsieur le Lieutenant eſt pire qu'heretique, qui a faiſt pendre ſes meilleurs amis, leſquels luy auoyēt mis le pain en la main. De dire que cela ſoit faiſt *ad maiorem cautelam*, pour raualer l'orgueil & insolence des ſeize, cela eſt bon, mais ce pendant on s'eſtrangle, & ne peut ce dicton empêcher que nous ne ſoyons touſiours iugez & reputez grands badaux, & caillettes, ſots en Latin & en François, de l'auoir enduré, & qui pis eſt, que les Politiques ne concluent, *in modo & figura*, que la Sorbonne peut errer, choſe qui me feroit derechef deuenir inſenſé, & courir les ruës, Car ſi cela auoit lieu, nous ne ſçaurions prouuer par tou tes
les

les fleurs de nostre rhétorique, ny par toutes les loix fondamentales du Royaume, dont Monsieur de Lyon à fait si grand cas, que tant de milliers de pauvres Chrestiens que nous auons fait, & faisons mourir de faim, de fer, & de feu, par nostre précipité Decret, deussent estre iugez vrayz martyrs, si tant est que nostredit Decret ne les a peu absoudre du serment de fidelité, & obeissance naturelle que les subiects doiuent à leur Prince, Parquoy messieurs, ie vous supplie au nom de nostre Academie, de pallier ce fait icy le plus catholiquement qu'on pourra, comme Monsieur le Legat fait les intétions du Pape Sixte, qui n'aimoit pas tant la Ligue qu'on disoit. Au reste ie vous fourniray tant de passages de l'escriture que vous voudrez, car i'en ay à reuendre. Mais sur tout, messieurs, ie vous recommande nos pensions, & de messieurs nos condocteurs de la sainte faculté de Theologie, comme aussi de Messieurs les Curez & predicateurs, pour lesquels ie parle, Car vous avez affaire de nous, & ne vous en sçauriez passer. Et Madame de Montpensier a bien sçeu dire qu'elle gaignoit plus de villes, & faisoit plus de besongne avec vn peu de doublons qu'elle distribuoit aux Predicateurs & Docteurs, que le Roy de Nauarre ne

faisoit avec toutes ses tailles & armées. Je vous aduerty de bonne heure que si ne fournissiez à l'apoinctement, il y a danger que nous ne nous mettions tous à prouuer, qu'il n'est que d'auoir vn Roy legitime, *etiam discole*, pourueu qu'il nous laisse le pain de chapitre, & le purgatoire, sans rien innouer iusques au futur concile. Mais en attendant, aduisez si nous ferons vn Roy ou non : Je sçay que Monsieur le Lieutenant voudroit bien l'estre : aussi feroit son nepueu : & encore son frere le Duc de Nemours, & ie ne doute pas que les Ducs de Sauoye & de Lorraine n'en ayent autant d'enuie : car à la verité ils y ont autant de droict l'vn que l'autre. Quant au Duc de Mercur, ses agents y feront autant que luy : S'il eust pris de bonne foy le Roy de Portugal dom Anthoine, & l'eust liuré à son bon amy le Roy tres-Catholique, comme il luy auoit promis, ie croy qu'il se fust contenté des droicts qu'il a au Duché de Bretagne, pareils à ceux qu'auoit son ayeul Iean par sa femme. Mais icy, qui n'y est, n'y prend. Premièrement ie vous conseille de ne vous arrester pas au Duc de Sauoye, ni au Duc de Lorraine : ce ne sont, en parlant par reuerence, que des couilles qui ont assez affaire à leur maison : Je m'assure qu'ils se contenteront de peu :

Si vous voulez laisser au Sauoyard le Dauphiné & la Prouence, avec vne partie du Lyonois & du Languedoc, pourueu que vous luy faciez prendre Geneue, ie voudroy gager ma vie qu'il ne vous demandera plus rien, que la confiscation d'Esfiguières: Quant au Duc de Lorraine, ostez luy le Duc de Bouillon, & luy baillez Sedan, Mets, toute la Champagne, & partie de Bourgonne qui est à sa bienséance, vous l'appaiserez par apres pour vn morceau de pain: Je viens maintenant à vous, Monsieur de Guise, fils de bon pere & de bonne mere, que les propheties ont de lōg temps destiné aux Royaumes & Empires, & vous ont surnommé Pepin le Brief, Vous voylà sur le poinct d'estre vn grand Charlemagne, vostre grand bisayeul, si marché tient. Mais regardez à ne vous laisser pas tromper: Ces messieurs d'Espagne, encor qu'ils soyent noz bons amis, & bons Catholiques, ne sont pas marchands à vn mot: & ce n'est pas de ceste heure: car il y a plus de deux mil ans qu'ils s'en meslent, & qu'on leur donne le nom d'estre fins à doubler. Ils vous promettent ceste diuine Infante en mariage, pour la faire Royne *in solidum* avecques vous: mais prenez garde que le Duc de Ferri n'ait remply ses blancs signez sans charge. Il en a vne pleine boîte,

dont il se sert à toutes occurrences , comme d'une forme à tout soulier , & d'une selle à tous chevaux , il les date , ou antidate , avec son vrinal , quand il luy plaist , l'ay peur quelque chose qu'il nous ait proposée , que ce ne soit qu'artifice pour nous amuser quand il a veu que ne voulions entendre à rompre la loy Salique, Si vous avez tant soit peu de nez , vous le sentirez. Car nous sçavons de bonne part que le mariage est desia accordé d'elle , & de son cousin l'Archiduc Ernest, *adde* que ceux de la maison d'Austriche font comme les Juifs , qui ne se marient qu'en leur famille , & s'entretiennent par le cul l'un l'autre , comme hannequins , où hanneltons. Quittez donc ceste vaine esperance de Gynecocratie , & croyez que les petits enfans s'en moquent , & en vont desia à la moustarde. J'en ouy l'autre iour un qui reuenant tout bellement de la tauerne , chantoit ce quatrain.

*La Ligue se trouuant camuse,
Et les Ligueurs fort estonnez,
Se sont aduisez d'une ruse:
C'est, de se faire un Roy sans nez.*

Mais si j'eusse peu le faire attraper par le commissaire Bazin , qui courut apres , il n'eust pas moins eu que le meusnier qui s'est moqué
de

de nos estats. Que diriez vous de ces impudens politiques, qui vous ont mis en figure en vne belle fueille de papier, desia couronné comme vn Roy de carreaux, par anticipation, & en la mesme fueille ont aussi mis la figure de la diuine Infante, couronnée en Royne de France comme vous, vous regardans huzé à huzé l'un l'autre? Et au bas de ladicte peinture, ont mis ces vers que i'ay retenus par cœur parce qu'il y va du vostre.

*Les François Espagnols ont faict vn Roy de France:
 A l'Infante d'Espagne ils ont ce Roy promis:
 Royauté bien petite, & de peu d'importance:
 Car leur France est comprise en l'enclos de Paris.*

*N'apporte à ceste fois pour ce froid mariage,
 O Hymen Dieu nopcier, ton paisible flambeau:
 De ces corps eslongnez on assemble l'image,
 Qui font l'amour des yeux tous deux en vn tableau:
 C'est vne royauté seulement en figure:*

*La feincte, & non l'amour ce mariage a faict:
 C'est bien raison qu'estant Roy de France en peinture,
 D'une Royne on luy face espouser le pourtraict,*

Si Mōsieur d'Orleans en qualité d'Aduocat general, veut faire recherche de ces meschans Imprimeurs politiques, c'est sa charge, & se cougnoist aux caracteres, & ses bons comperes Bichon, N. Niuelle, Chaudiere, Morel, & Thierry, descouuriront la matrice.

Quant à moy ie m'en deportte , car ces here-
tiques sont mesdisants comme diables , &
craindroy qu'ils feissent quelque liure con-
tre moy comme ils ont faiët contre le Docteur
Catholique & Iurisque Chopin , sous
le nom de Turlupin. Messieurs du parquet
y feront leur deuoir, *more & loco solitis*. le me
contente de prescher la parole de Dieu, en-
tretenir mes Bedeaux, & solliciter mes pen-
sions. Tout cecy soit dit par parenthese. Mais
Monfieur de Guise, mon enfant, croyez moy,
& vous croirez vn fol: ne vous arrestez plus
à cela: ce n'est pas viande pour vos oyseaux:
N'en hausséz pas vostre train, ny n'en alongez
pas vostre table pour cela, il y a du foin, il n'y
a que les bestes qui s'y amusent: mais faictes
mieux, obtenez du Sainct pere vne belle croi-
sade contre les Turcs, & allez reconquerir
ce beau Royaume de Ierusalem, qui vous ap-
partient à cause de Godefroy vostre grand
oncle, aussi bien que la Sicile & le Royaume
de Naples: Combié de palmes & de trophées
vous attendent! Combien de sceptres & de
couronnes se preparent pour vous, si vostre
horoscope ne ment, comme vous diés que
n'avez point de fortune bornée! Laissez ce
malotru Royaume de France à qui daignera
s'en charger: il ne vaut pas que vostre esprit
né pour

né pour les empires, & la monarchie vniuerselle du monde habitable, s'humilie à si petits desseins & indignes de vous, & de vostre feu pere, que Dieu absolue, s'il est permis d'ainsi parler des Saints. Et vous Monsieur le Lieutenant (à qui il faut maintenant que ie parle) que penſez vous faire ? Vous estes gros & replet, vous estes pesant & maleſcie: vous auez la teſte aſſez groſſe pour porter vne couronne, mais quoy? vous dites quen'en voulez point, & qu'elle vous chargeroit trop, Les politiques diſent qu'ainsi diſoit le regnard des meures. Vous empeschez ſouz main que vostre nepueu ne ſoit eſleu, vous deſſendez aux deputez qu'on ne touche point cette groſſe corde de la Royaute: Que ferons nous donc? il nous faut vn Roy: lequel, comme diſent les docteurs politiques, *melius ſumitur: quã queritur.* Vous faićtes croire au Roy d'Eſpagne que vous gardez le royaume de France pour luy & pour ſa fille: & ſous ceſte eſperance, vous tirez du bon homme tout ce que les Indes & le Perou luy peuuent enuoyer, il vous entretient vostre plat, il vous enuoye des armées, mais non pas à vostre deuotion, car il ſe garde de vous, & vous deſſiez l'un de l'autre comme aueugles, & vous entendez comme larrons, ce pendant vous auez irrité les

seize , qui vous accusent qu'estes vn marchand de couronnes, & auez mis celle de France au plus offrant : ils en font des liures à vostre preiudice , où ils deschiffrent toutes vos actions : ils disent que vous auez des pratiques sourdes avec le Biarnois , & luy faictes porter des paroles par Ville-roy & Zamet, pour l'endormir , & luy faire entendre qu'estes bõ François , & ne serez iamais Espagnol, & que pouuez luy remettre Paris, & luy rendre tout son Royaume paisible quand il aura esté à la messe, & recogneu nostre saint pere, & sous ceste ruse auez tiré quarante mil escus politiques pour trois mois, qui deuoyent valoir pour quatre , à dix mil escus piece, faisant entendre que le Roy d'Espagne rongneroit vos distributions s'il sçauoit que traitassiez d'accord avec les heretiques. Mais on a descouuert que secrettement vous enuoyez vos agents à Rome & en Espagne , pour empêcher que le Pape ne luy donne absolution s'il la demande , & pour susciter le Roy d'Espagne d'enuoyer nouvelles forces sur la frontiere. Vous pensez estre bien fin , mais vos finesses sont cousuës de fil blanc , en fin tout le monde les voit , car ces politiques ont des dragons sur les champs qui prennent tous vos paquets, & deuinent par art diabolique
tous

tous vos chiffres, aussi bien que ceux du Roy d'Espagne & du Pape, tant subtils puissent-ils estre, si bien qu'ils sçauent toutes vos facientes, & à Rome & à Madric, & en Sauoye & en Allemagne. Vous befflez tout le monde, & tout le monde vous beffle aussi, danger y a que ne deueniez ce que fut le Comte de S. Pol Connestable de Frâce du temps du Roy Loys X l. lequel apres auoir abusé son maistre, & le Duc de Bourgongne, & le Roy d'Angleterre tout vn temps, en fin fut faict Cardinal en Greue. Quant à estre Roy de vostre chef, ne vous y attendez pas, vostre part en est gelee, tous vos aînez s'y opposent, vos cousins competeurs feroient plustost secession *ad partes*, que de l'endurer, les seize ne veulent plus de vous, car ils disent qu'ils vous ont faict ce que vous estes, & vous les pendez, & diminuez leur nombre tant que pouuez, le peuple auoit esperé sur vostre parole que vous desboucleriez la riuiera, & rendriez les chemins & le commerce libre, mais ils voyent au contraire qu'ils sont plus serrez que deuant, & que le pain & le peu de bien qu'ils ont pour viure ne vient pas de vostre bienfait, ny de vostre vaillâce, mais de la liberalité du Biarnois & de son bon naturel, ou de l'avarice des acquiteurs, qui en tirent tout le profit,

profit, Bref, la plus part croit que voulez prolonger tant que pourrez la Lieutenance en laquelle on vous a mis, & viure tousiours en guerre & en trouble, bien à vostre aise, bien serui, bien traicté, bien gardé de Suyffes & d'Archers, qu'il n'y manque que les hoquetons & Sibilot pour estre Roy, pendant que tout le reste du peuple meurt de male rage de faim. Vous voulez garder les gages & estre curateur perpetuel aux biens vacquans, qui empesche & prolonge tant qu'il peut la deliurance des criees de peur de rendre compte. Au reste vous ne pouuez estre Roy par le mariage de l'Infante : vous estes marié & mettrez le doigt au trou, car vous avez cheuauché la vieille, qui se garde bien du bouquon, & puis il faudroit vn autre ramonneur que vous, à ceste garse de trente ans, noire comme poiure & d'appetit ouuert. D'auantage, quand nous vous aurions esleu Roy, vous auriez affaire au Biarnois qui sçait mille tours de Basque, & qui ne dort que tant qu'il veut, & à l'heure qu'il veut, lequel se rendant catholique, comme il vous en menace, tirera de son costé tous les potentats d'Italie & d'Allemagne, & quant & quant le cœur de tous les Gentils-hommes François, dont vous voyez desia la plus part branler au manche,

& minuter leur retraicte avec tant de pauvres villes affligees lasses de la guerre & de la pauureté qui ne demandent autre chose que cette couleur & bonne occasion pour se retirer du pert, & en courir ou colorer leur repérance. Songez-y, Monsieur le Lieutenant, pour la pareille, vous avez beau faire le Roy, & contrepeter le Biarnoïs en Edicts & Declarations, en seaux, en gardes, en grands preuosts & maistres des requestes de vostre hostel. Quand vous deurieriez creuet & vous enfler gros comme vn beuf, comme feït la mere grenouille, vous ne ferez iamais si gros seigneur queluy, encor qu'on die qu'il n'a pas de gresse sur tout son corps pour paistre vne aloüette. Mais sçauiez vous que vous ferez? il vous conseilleroï, si n'estiez bigame, de vous faire Abbé, quiconques sera Roy ne vous refusera pas l'Abbaye de Clugny qui est de vostre maison, vous aymez la soupe grasse, & vous ruez volontiers en cuisine, Vous avez le ventre ample & spatieux, & si ferez couronné, ie dy couronné de la mesme couronne, & vostre couronne faite des mesmes cizeaux que madame vostre sœur disoit auoir pendus à sa ceinture pour faire la couronne monachale de feu Henry de Valois. Vous ne m'en demandez ne foy ne serment, mais ie suis

suis de cet aduis. Je ne parleray point icy de
 Monsieur de Nemours vostre frere *uterin*,
 (les politiques disent *Adulterin*) cestuy-là a
 faict caca en nos paniers, il a ses desseings à
 part, & ressemble Picrocole, qui par discours
 bien raisonnez se faict monarque du monde
 pied à pied, S'il peut gouverner le Roy des
 bestes, comme il a faict la nef de Paris, ie di-
 ray qu'il sçaura plus faire que maistre Mouf-
 che, ces animaux mesconnoissent quelque-
 fois leurs gouuerneurs, mesmement s'ils chan-
 gent d'habit, Il ne sera pas mal parragé, s'il
paruient à ses pretensions, à quoy vous Mon-
sieur le Lieutenant, & Monsieur de Lyon luy
ferez, ie croy, de bons offices. Somme toute
 Messieurs, vous estes trop de chiens à ronger
 vn os, vous estes ialoux & enuieux les vns
 des autres, & ne sçauriez iamais vous accor-
 der, ni viure sans guerre, qui nous mettroit
 en pire estat que deuant, mais ie vous diray,
 faisons comme on faict au consistoire à l'ele-
 ction du saint Pere. Quand deux Cardi-
 naux briguent la papauté, les autres Cardi-
 naux de peur d'encourir la haine de l'vn ou
 de l'autre, choisissent vn d'entreux le plus
 foible de reins & le font pape, faisons en ain-
 si. Vous estes quatre ou cinq brigans au
Royaume, tous grands Princes, & qui n'avez
 pas

pas faute d'appetit , le suis d'aduis que' pas vn de vous ne soit Roy , ie donne donc ma voix à GVILLOT FAGOTIN, marguillier de Gentilly , bon vigneron , & preud'homme , qui chante bien au letrin , & sçait tout son office par cœur , Cela ne sera pas sans exemple en tel temps que celui-cy, tesmoing la harelle de Roüen , où l'on fit Roy vn nommé le Gras, plus mal-aduisé que Guillot. Et voicy où ie fonde mon aduis, i'ay leu quelquefois le grand & diuin philosophe Platon , qui dict que les Royaumes sont heureux , où les philosophes sont Roys , & où les Roys sont philosophes. Or sçay-ie qu'il y a tantost trois ans que ce bon marguillier & sa famille avec ses vaches medite iour & nuict la philosophie en vne sale de nostre college, en laquelle y a plus de deux cents bonnes annees qu'on y a leu & traicté, & disputé publiquement la philosophie , & tout l'Aristote , & toutes sortes de bons liures moraux, Il n'est pas possible qu'ayant ce bon homme resué, sommeillé & dormy tant de iours & de nuicts, entre ces murailles philosophiques, où tant de sçauantes leçons, & disputes ont esté faiçtes , & tant de belles paroles proferées , il n'en ait demeuré quelque chose qui ait entré & penetré dedans son

son cerueau, comme au poëte Hesiodé, quand il eut dormy sur le mont Parnasse. C'est pourquoy ie persiste, & entends qu'il soit Roy comme vn autre.

Comme Monsieur Roze acheuoit ces paroles, il tourdit vn grand murmure entre les deputez, les vns approuuans, les autres reprouuans son opinion, & furent veuz les Princes & Princesses cheuchetter en l'oreille l'vn de l'autre : mesmes fut ouy que Monsieur le Lieutenant dist tout bas au Legat, Ce fol icy gastera tout nostre mistere. Neantmoins ledit Roze voulut continuer son propos, mais quand il veit le bruit recommencer, avec vn claquement general de mains, il se leua en colere, & cria en voix Stentoree, Comment, messieurs, est il pas permis icy de dire ce qu'on pense? Nauray-ie point liberté de parler & conclurre mes arguments, comme a fait Monsieur de Lyon? Je sçay bien quesi i'eusse esté courtizan comme luy, ie n'eusse nommé personne, car il auoit charge du clergé de nommer le Comte du Bouchage frere Ange, pour esperance que ce Prince ayant le changement, changeroit aussi nos miseres en coups du ciel, mais ie vous prie gardez le pour porter l'oriflambe aux batailles, car il luy doit suffire d'auoir
quitté

quitté la besace. A ces mots, chascun se mit de rechef à crier, & siffler : & combien que les heraults, & massiers heurlassent, *qu'on se taise*, n'osans dire, *paix là*, & que monsieur le Lieutenant commandast plusieurs fois de faire silence, il ne fut possible d'appaiser le bruit, tellement que ledict, sieur Recteur, suoit, tempestoit, escumoit, & frapport du pied : & voyant qu'il n'y auoit plus moyen de reprendre son theme, cria le plus haut qu'il peut, Messieurs, messieurs, ie voy bien que nous sommes à la court du Roy Petaut, où chascun est maistre : le le vous quitte : qu'un autre parle : l'ay dict.

Et là dessus se rassied en grommelant, & s'essuyant le front, & luy eschaperent à ce qu'on dict quelques rots odoriferants de l'estomach, qui sentoient le parfun de sa colere avec des parolles en basse note, se plaignant qu'on auoit fraudé l'assignatiõ enuoyée d'Espagne, pour messieurs les Docteurs, & que d'autres en auoyent fait leur profit, mais que ce seroit l'or de Tholozé, qui leur cousteroit bien cher.

En fin la rumeur commençant vn peu à se racoiser, Monsieur du Rieu le ieune, Comte & gardien de Pierre-font, député pour la noblesse de France, habillé d'un petit

capot à l'Espagnolle, & vne haute fraize, se
leua pour parler, & ayant mis deux ou trois
fois la main à la gorge, qui luy demangeoit,
commença ainsi.

H A R A N G V E D U S I E V R
du Rieu, Sieur de Pierre-Font,
pour la noblesse de
l'union.

MEssieurs, ie ne sçay pourquoy on m'a de
puté pour porter la parole en si bon-
ne compagnie, pour toute la noblesse de no-
stre party: Il faut bien dire qu'il y a quelque
chose de diuin en la sainte vnion, puis que
par son moyen, de commissaire d'artillerie
assez malotru, ie suis devenu Gentil-homme
& gouuerneur d'une belle forteresse: voire
que ie me puis esgaler aux plus grands, & suis
vn iour pour monter bien haut, à reculon
ou autrement. I'ay bien occasion de vous
suyure, monsieur le Lieutenant, & faire ser-
uice à la noble assemblée, à bis, ou à blanc,
à tort ou à droit, puis que tous les pauvres
prestres, moines, & gens de bien, deuots ca-
tholiques m'apportent des chandelles, & m'a-
gorent comme vn saint Macabee du temps
passé. C'est pourquoy ie me donne au plus
visté

vifte de diables , que ſi aucun de mon gou-
 uernement ſ'ingere à parler de paix , ie le
 courray comme vn loup gris : Viue la guerre
il n'eſt que d'en auoir de quelque part qu'il
viene. Le voy ie ne ſçay quels deſgouſtez de
noſtre nobleſſe qui parlent de conſeruer la
religion & l'eſtat tout enſemble : & que les
 Eſpagnols perdront à la fin l'vn & l'autre, ſi
 on les laiſſe faire : Quant à moy ie n'entends
 point tout cela : pourueu que ie leue touſ-
 iours les tailles , & qu'on me paye bien mes
 apoinctements , il ne me chaut que deuien-
 dra le Pape ni ſa femme. Le ſuls apres mes
intelligences pour prendre Noyon : ſi i'en
 puis venir à bout, ie feray Eueſque de la ville,
 & des champs , & feray la mouë à ceux de
 Compiègne : Ce pendant ie courray la vache,
 & le manant tant que ie pourray : & n'y aura
 payſan, laboureur, n'y marchand au tour de
 moy , & à dix lieues à la rondé, qui ne paſſe
 par mes mains , & qui ne me paye taille ou
 rançon. Le ſçay de inuentions pour les faire
venir à raiſon : Le leur dōne le frontail de cor-
 des liées en cordeliere : ie les pends par les ef-
 felles , ie leur chaliffe les pieds d'une pelle
 rouge : ie les mets aux fers , & aux ceps : ie les
 enferme en vn four , en vn coſſe percé,
 plein d'eau : ie les pends en chapon roſty : ie

les foirte d'estriuietes : ie les sale, ie les fay ieufner : ie les attache estendus dedans vn van : bref i'ay mille gentils moyens pour tirer la quintessence de leurs bourses : & auoir leur substance pour les rendre belistres à iamais, eux & toute leur race. Que m'en soucie-je, pourueu que i'en aye? Qu'on ne me parle point la dessus du point d'honneur : ie ne sçay que c'est : Il y en a qui se vârent d'estre descendus de ces vieux cheualiers François qui chasserent les Sarrafins d'Espagne, & remirent le Roy Pierre en son Royaume : les autres se disent estre de la race de ceux qui allerent conquerir la terre sainte avec saint Loys : les autres de ceux qui ont remis les Papes en leur siege par plusieurs fois, ou qui ont chassé les Anglois de Frâce, & les Bourguignons de la Picardie : ou qui ont passé les monts aux conquestes de Naples & de Milã, que le Roy d'Espagne a vsurpé sur nous : Il ne me chaut de tous ces tiltres & pancartes, ny d'armoiries, tymbrees ou non tymbrees : ie veux estre vilain de quatre races, pourueu que ie reçoie tousiours les tailles, sans rendre comte : ie n'ay point leu les liures, ny les histoires, & Annales de France : & n'ay que faire de sçauoir s'il est vray qu'il y ait eu des Paladins & Cheualiers de la table ronde, qui

ne

ne faisoient profession que d'honneur, & de
 deffendre leur Roy, & leurs pays : & fussent
 plustost morts que de receuoir vn repro-
 che : ou souffrir qu'on eust faict tort à quel-
 qu'un. l'ay ouyr compter à ma grand mere, en
portât vendre son beurre au marché, qu'il y
 auoit eu autrefois vn Gaston de Foix, vn
 Comte de Dunois, vn la Hire, vn Poton
 vn Capitaine Bayart, & autres qui auoyent
 faict rage pour ce point d'honneur : & pour
 acquerir gloire aux François : mais ie me re-
 commande à leurs bonnes graces, pour ce
 regard : i'ay bonne espee, & bon pistolet &
 n'y a sergent ni Preuost des mareschaux qui
 m'osast adiourner : aduienne qui pourra, il
 me suffist d'estre bon catholique : la iustice
 u'est pas faicte pour le: gentils-hommes cō-
 me moy : ie prendray les vaches, & les poules
 de mon voysin quand il me plaira : ie leu-
 eray les terres, ie les enfermeray avec les mien-
 nes dedans mon clos, & si n'en oseroit grō-
 meler : tout sera à ma bien seance. Je ne souf-
 friray point que mes subiects payēt de taille,
 sinon à moy : & vous conseille Messieurs les
 nobles, d'en faire tout ainsi : aussi bien n'y a il
 que les Trezoriers & financiers qui s'en en-
 graissent, & vsent de la substance du peuple,
 cōme des choux de leur iardin : Par la mort

bieu, si ie trouue ni sergent, ni recepueur, ni
 homme de iustice faisant exploict sur mes
 terres sans m'en demander congé, ie leur fe-
 ray manger leur parchemin. C'est trop endu-
 ré: sommes nous pas libres? Monsieur le Lieu-
 tenant, ne nous auez vous pas donné liberté
 de tout faire: & monsieur le Legat nous a il
 pas mis la bride sur le col, pour prendre tout
 le bié des politiques, tuer & assaciner, parens,
 amis, voisins, pere & mere, pourueu qu'y fa-
 cions nos affaires, & que soyons bons Catho-
 liques, sans iamais parler ni de trefue, ni de
 paix? i'en feray ainsi, & vous prie d'en faire
 de mesme. Mais i'ay encor vne autre chose à
 vous remonstrier, c'est de ne parler plus de
 ceste loy Salique: ie ne sçay que c'est, mais le
 Seigneur Diego, me l'a donnée par memoire,
 avec quelqûes pieces rondes qui me feront
 grand bien. C'est en tout cas, qu'il faut aller
 iaccager ces chaperons fourrez de la court
 de parlement, qui font les galâts, & se messent
 des affaires d'estat, où ils n'ont rien que voir?
Qu'on me les donne vn peu à manier: iamais
Buffy le clerc n'y fit œuure: si monsieur le Le-
 gat me commande seulement de leur aller
 mettre la main sur le collet, il n'y a ni bonnet
 quarré, ni bourlet, que ie ne face voler s'ils
 m'elchaufent trop les oreilles: mesmement
 à ce

à ce monsieur le Maistre , & ce du Vayr qui
mettent les autres en train : Que ni donnez
vous ordre , monsieur le Lieutenant : sçavez
vous pas bien que le president de Nully vous
a dict & nommé par nom & par surnom tous
ceux qui ont opiné pour ceste meschante
loy : que ne les enuoyez vous iectér en la ri-
uiere comme il vous a conseillé ? Et ce beau
Marillac qui faisoit tant de l'eschauffé au cō-
mencement , & n'opinoit que feu & sang, ie
crains à la fin qu'il ne face banqueroute à la
Ligue , si on luy promet d'estre conseiller
d'estat du Biarnois : Gardons nous de ces gēs
qui tournent leur robbe si aysement , & sui-
uent le vent de fortune , quand ils voyent que
leur party va mal. Ha braue Machault : Ha
vaillant Bordeaux : vous estiez dignes d'estre
comme moy , esleuez au plus haut degré
d'honneur de noblesse : Entre les robbes lon-
gues, ie n'ayme que vous , & ce fameux pre-
sident que ie nommeray encor icy par hon-
neur, Monsieur de Nully , qui outre le cou-
rageux commencement & progrez qu'il a
faict à la ligue , de la quelle il peut estre dict le
pere putatif, à bien daigné exposer ses filles,
& prostituer leur reputation au bourdel,
pour faire seruice à messieurs lēs Princes , &
à messieurs ses curez & predicateurs, Diray-

a un
des seiz

ie aussi le faict heroique de ce bon baston,
 qui Tigna si valeureusemēt la ligue de sō pro-
 pre sang, tiré de sa main, laquelle depuis par
 miracle a demeuré estroupiée, tāt ce glorieux
 martyr a voulu souffrir pour la laincte vnion?

adversus
Paris Et toy genereux arc boutāt de l'vnion Loys
 d'Orleans^T: ton catholique Anglois, & ton
 expostulation, & la harangue faicte en faueur
 & à l'hōneur du Legat & des Espagnols me-
 ritoyēt qu'on te mist en la place du president
 Brissou, mais on ne recompense pas les gens
 de bien comme il faut: non plus que ton cō-
 pagnon d'office, pour auoir escrit si curieu-
 semēt les droicts de l'oncle contre le neueu.

Ceux là sont des hōmes iustes, & vertueux
 non pas ces foireux, qui voyant qu'il n'y
 auoit plus rien à grabeles en leur palais de
 ceste ville, & q̄ tous leurs sacs estoeyēt vuides,
 ou pendus au croq, s'en sont allez à Tours,
 & à Chalōs où ils sçauoyent que la mangeoire
 estoit pleine, & les rasteliers garnis. Bref.
 ostez en cinq ou six de toute ceste megnee,
 tout le reste n'en vaut rien, & au diable lē
 meilleur: le ne sçay que ces gens de iustice
m'ont faict, mais ie ne les ayme point. le
mōstray vne fois ma main à vne vieille Ægi-
prienne, qui me dist que i'auoy lē poulce
rōd, & que ie me gardasse de rond, ou demy
 rond.

rond. Je croy qu'elle vouloit dire de ces gens-
là, qui portent le bonnet rond.

En fin messieurs i'ay charge de la noblesse,
de vous remonstrier qu'il faut rabatre l'insolence de ces hochebrides, & aualeurs de frimats, & faire vos affaires pendant que le tēps est beau: Si la loy Salique est entretenuē, ie crain que monsieur le Legat s'en fache, & que l'infante soit en danger d'estre tondue: mais ie m'en rapporte à mōsieur le Lreutenāt qui sçaura bien rompre le coup, & faire la barbe à son nepueu sans razoyr: Au demeurant s'il faut effire vn Roy, ie vous prie vous souuenir de moy, & de mes merites: On m'a faiēt croire qu'il s'en est faiēt autresfois de pires que moy: les Lidiens (ie ne sçay quelles gens ce sont) en firent vn qui menoit la charrue: Les Flamens firent vn Duc qui estoit brasseur de biere: le Normands vn cuysinier, le Parisiens vn escorcheur: Je suis plus que tous ceus-là: Car mon grand pere estoit mareschal en France, ou de Frāce, & s'il à gaigné enfer, ie gagneray paradis: Voyla monsieur de saint Paul maintenant Comte de Rethelois, Mareschal de l'vnion, & Archeuesque de Reims, qui a biē son pere n'agueres demourant en vne cahuette couuerte de chaulme près de Nangy, & qui a

encor ses sœurs marices, l'une avec un taver-
 nier, & l'autre avec un tisseran; Neantmoins le
 voila Payr & Mareschal de France, & qui preste
 argent sur bon gages à monsieur de Guyse
 son maistre, & bien facteur. A ce compte,
 vous pouuez bien me faire Roy : & ferez
 bien, Car ie vous lairray faire tout ce que
 vous voudrez. I'aboliray toutes ces mange-
 ries de iustice, ie supprimeray tous les sergents
 procureurs, chiquaneurs, commissaires, &
 conseillers, excepté ceux qui sont de nos
 amis : mais il ne se parlera plus d'adiourne-
 mens ni de faisie, ny de payer ses debtes :
 vous serez tous comme rats en paille, & me
 suffira que m'appelliez Sire. Vous y aduise-
 rez : pour le moins ie sçay bien que i'en vaut
 bien un autre : & vous en diroy d'avantage
 sinon que ie suis pressé d'aller executer mon
 entreprise sur Noyon, apres que i'auray
 combatu le gouverneur de ceste ville : & sur ce
bazo las manos de vosta merced.

• Apres que le sieur du Rieu eust finis sa con-
 cion militaire, chascun des assistans monstra
 au visage qu'on auoit prins plaisir à son elo-
 quence naturelle, pour un homme qui n'a-
 uoit point de lettres, & qui pourroit faire un
 grand fruct s'il la faisoit longue en ce mon-
 de. La dessus se leua un des deputez, nom-
 mé

mé le sieur d'Angouleme, qui fit entendre
 tout haut qu'il auoit charge de la noblesse
 nouvelle, & de la part des honnestes homes,
 & maistres de l'vnion, de remonstrier quel-
 que chose d'importance, touchant leur qua-
 lité, & qu'il estoit raisonnable qu'il fust ouy
 auant le tiers estat, qui n'estoit composé que
 de manans, requerant Monsieur le Lieute-
 nant, de luy faire donner audience, & inter-
 pellant les gens du Roy de l'vnion, mesme-
 ment l'aduocat general d'Orleans, qui auoit
 autre fois escrit en faueur de la dicte no-
 blesse, d'adherer à son requisitoire, & ce di-
 sant, monta tout debout sur le banq, où il
 estoit assis, & commença à dire. *Monsieur le*
douzième, mais soudain il fut interrompu,
 pour vn grand bruiet de paysants qui estoient
 derriere les deputez, lequel estant vn peu
 cessé, commença de rechef, *Monsieur le dou-*
zième, & incontinent le bruiet se leua plus
 grand que deuant, neantmoins ne laissa pour
 la troisieme fois de dire. *Monsieur le douzième de*
May: & alors se leua le sieur d'Aubray, qui
 auoit charge de parler pour le tiers estat, &
 contesta qu'il n'appartenoit qu'à luy de parler
 de ce iour là des barricades, & qu'on n'auoit
 point accoustumé en France de faire plus de
 trois estats, & empeschoit que le député de
 la

la nouuelle noblesse fust ouye, comme n'estât qu'vne despendance, & vn membre dudict tiers estat. Ledit sieur d'Angoulemeut disputa long temps de sa part, disant que chascun estoit la pour son argent, & recommença plusieurs fois ces trois mots, *Monsieur le douziesme*: & à chasque fois fut interrompu: à la fin comme la rumeur croissoit, & desia s'eschaufoyent les factions pour l'vn, & pour l'autre, iusques à en venir aux coups de poing, l'aduocat d'Orleans remonstra qu'il n'estoit plus temps de s'arrester aux anciennes formes qui n'estoyent que pour les cordonniers ni à toutes ces ceremonies du temps passé, sinon au faict de la religion: & que l'assemblee desdicts estats seroit inutile, si on n'y faisoit toutes choses de nouuelle façon: & quant à luy, qu'il auoit veu les memoires de la noblesse nouuelle, lesquels meritoient bien estre considerez: toutesfois attendu qu'il estoit tard, & que monsieur le Lieutenant estoit à ieun, & l'heure du disner de monsieur le Legat se passoit, il requeroit que ledict sieur d'Angoulemeut mettroit son dire par escrit, & se rayroit s'il pouuoit: *aliàs*, & à frute de ce, qu'on l'enuoyroit au Comte de Choyssi. Ce que monsieur le Lieutenant approuua de la teste: & la rumeur peu à peu cessée:

ceſſée : & ledit d'Angouleuent à peine raffis,
le ſieur d'Aubray député du tiers eſtat, ayant
laiffé ſon eſpee, harangua à peu pres ainſi.

H A R A N G U E D E

*Monſieur d'Aubray, pour
le tiers eſtat.*

PAr noſtre dame, meſſieurs, vous nous
l'auez baillé belle. Il n'eſtoit ia beſoing,
que nos curez nous preſçaſſent qu'il failloit
nous deſbourber, & deſboubonner : A ce
que ie voy par vos diſcours, les pauvres Pa-
riſiens en ont dans les bottes bien auant, &
ſera prou difficile de les deſbourber : Il eſt
des-ormais temps de nous apparcevoir que
le faux Catholicon d'Eſpagne eſt vne dro-
gue qui prend les gés par le nez : & ce n'eſt pas
ſans cauſe que les autres nations nous ap-
pellent Caillettes, puis que comme pauvres
cailles coyffées, & trop credules, les predica-
teurs, & Sorboniſtes, par leurs caillets en-
chanteurs, nous ont faiét donner dans les
rets des tyrans, & nous ont par apres mis en
cage, renfermez dedans nos murailles pour
apprétre à chanter: Il faut cōfeſſer que nous
ſommes pris à ce coup, plus ſerfs, & plus
eſclaues, que les Chreſtiés en Turquie, & les
Iuiſ en Auignon. Nous n'auons plus de vo-
lonté

lonné, ny de voix au chapitre. Nous n'auons plus rien de propre, que nous puissions dire, cela est mien, tout est à vous messieurs, qui nous tenez le pied sur la gorge, & qui remplissez nos maisons de garnisons: Nos priuileges & franchises anciennes sont à vau-l'eau: Nostre hostel de ville que i'ay veu estre l'asseuré refuge du secours des Roys, en leurs vrgentes affaires, est à la boucherie: nostre court de parlement est nulle: nostre Sorbonne est au bourdel, & l'vniuersité deuenüe sauuage. Mais l'extermité de nos miseres est, qu'entre tant de mal-heurs, & de necessitez, il ne nous est pas permis de nous plaindre, ny demander secours: & faut qu'ayants la mort entre les dents, nous disons que nous nous portons bien, & que sommes trop heureux d'estre malheureux, pour si bonne cause. O Paris qui n'est plus Paris, mais vne spelunque de bestes farouches, vne citadelle d'Espagnols, Vuallons, & Napolitains: vn asyle, & source retraicte de voleurs, meurtriers, & assassinateurs: ne veux-tu iamais te ressentir de ta dignité, & te souuenir qui tu as esté, au prix de ce que tu es? ne veux-tu iamais te guerir de ceste frenchie, qui pour vn legitime & gracieux Roy, ta engendré cinquante Royetelets, & cinquante tyrans

tyrans? Te voila aux fers: te voila en l'inquisition d'Espagne, plus intolerable mille fois, & plus dure à supporter aux esprits nez libres & francs, comme sont les François, que les plus ctuelles morts, dont les Espagnols se sçauroyent aduifer: Tu n'as peu supporter vne legere augmentation de tailles, & d'offices: quelques nouueaux edicts qui ne t'importoyent nullement: & tu endures qu'on pille tes maisons, qu'on te rançonne iusques au sang, qu'on emprisonne les senateurs, qu'on chasse & bannisse tes bons citoyens & conseillers: qu'on pende, qu'on massaëre tes principaux magistrats: tu le vois, & tu l'endures: tu ne l'endures pas seulement, mais tu l'approuues, & le louës, & n'oserois, & ne sçaurois faire autrement: Tu n'as peu supporter ton Roy si debonnaire, si facile, si familier, qui s'estoit rendu comme concitoyen, & bourgeois de ta ville, qu'il a enrichie, qu'il a embellie de somptueux bastimens, acereue de forts & superbes ramparts, ornee de priuileges & exemptiõs honorables: Que dy-les peu supporter, c'est bien pis: tu las chassé de la ville, de sa maison, de son liët: Quoy chassé, tu las pourfuyui: quoy pourfuyui? tu las as faciné: canonisé l'assacinateur, & fait des feux de ioye de sa mort: Et tu voys maintenant

nant combien ceste mort t'a proffité : Car elle est cause qu'un autre est monté en sa place, bien plus vigilant, bien plus laborieux, bien plus guerrier, & qui sçaura bien te ser-
 rer de plus près, comme tu as à ton dam^{de} desia experimenté. Le vous prie messieurs, s'il est permis de iecter encor ces derniers abois en liberté, considerons vn peu, quel bien & quel proffit nous est venu de ceste detestable mort, que nos prescheurs nous faisoient croire estre le seul & vnique moyen pour nous rendre heureux. Mais ie ne puis en discourir qu'avec trop de regret de voir les choses en l'estat qu'elle sont, au prix qu'elles estoient lors: chascun auoit encor en ce temps là du bled en son grenier, & du vin en sa caue: chascun auoit sa vaisselle d'argent, & sa tapisserte, & ses meubles: les femmes auoyent encores leur demicint: les reliques estoient entieres: on n'auoit point touché aux ioyaux de la Couronne: Mais maintenât, qui se peut vanter d'auoir de quoy viure pour trois sepmaines, si ce ne sont les voleurs, qui se sont engraissez de la substance du peuple, & qui ont pillé à toutes mains les meubles de presents, & des absents? Auons nous pas consommé peu à peu toutes nos prouisions, vendu nos meubles, fondu nostre vaisselle,
 engagé

engagé iusques à nos habits pour viuoter bien chetiuelement? où sont nos sales, & nos chambres tant bien garnies, tant diaprées, & tapissées? ou sont nos festins, & nos tables friandes? nous voyla reduicts au laiët & au frommage blanc, comme les Suisses: nos banquets sont d'un morceau de vache pour tous mets, bien heureux qui n'a point mangé de chair de cheual & de chien, & bien-heureux qui a tousiours eü de pain d'auoine & s'est peu passer de bouillie de son, vendue au coing des rues, aux lieux qu'on vendoit iadis les friandises de langues, cailletes & pieds de mouton, & n'a pas tenu à Monsieur le, legat & l'ambassadeur Mandose, que n'ayons mangé les os de nos peres, comme font les sauages de la nouuelle Espagne. Peut on se souuenir de toutes ces choses. sans larmes, & sans horreur? & ceux qui en leur conscience sçauent bien qu'ils en sont cause, peuuent-ils en ouïr parler sans rougir, & sans apprehender la punition que Dieu leur reserue, pourtant de maux, dont ils sont auteurs Meismement, quand ils se représenteront les images de tant de pauures bourgeois, qu'ils ont veus par les ruës tomber tous roides morts de faim, les petis enfans nourrir à la mammelle de leurs meres allan-

gouries, tirans pour neant, & ne trouuants que succer: les meilleurs habitans, & les soldats marcher par la ville, appuyez d'un baston pables & foibles, plus blancs & plus ternis qu'images de pierre: ressemblans plus des fantosmes que des hommes: & l'inhumaine responce d'aucuns, mesme des ecclesiastiques qui les accusoyent & menaçoient, au lieu de les secourir ou cōsoler. Fut-il iamais barbarie ou cruauté pareille à celle que nous auons veüe & enduree? fut-il iamais tyrannie & domination pareille à celle que nous voyons & endurons? Où est l'honneur de nostre vniuersité ou sont les colleges? où sont les escholiers, où sont les leçons publiques où l'on accourroit de toutes les parts du monde? où sont les religieux estudiants aux conuents? ils ont pris les armes, les voyla tous soldats desbauchez. Ou sont nos chasses, ou sont nos precieuses reliques? Les vnes sont fonduës & mangees: les autres sont enfouyes en terre de peur des voleurs & sacrileges: où est la reuerence qu'on portoit aux gens d'eglise, & aux sacrez mysteres? chascun maintenant faict vne religion à sa guise: & le seruice diuin ne sert plus qu'à tromper le monde par hypocrisie: les prestres & les predicateurs se sont rendus si venaux, & si mesprizez par leur vie

scan

scandaleuse, qu'on ne se soucie plus d'eux, ny de leurs sermons sinon quand on en a affaire pour prescher quelques faulses nouvelles. Où sont les princes du sang, qui ont tousiours esté personnes sacrees, comme les colônes & appuis de la couronne, & monarchie Françoisse? Où sont les pairs de France, qui deuoyent estre icy les premiers pour ouurir & honorer les estats? Tous ces noms ne sont plus que noms de faquîns, dont on fait littere aux cheuaux de messieurs d'Espagne & de Lorraine. Où est la maiesté & grauité du parlement, iadis tuteur des Roys, & mediateur entre le peuple & le prince? vous l'avez mené en triomphe à la bastille, & trainé l'authorité, & la iustice captiue plus insolement, & plus honteusement que n'eussent fait les Turcs: vous avez chassé les meilleurs, & n'avez retenu que la racaille, passionnee, où de bas courage: encor parmy ceux qui ont demouré, vous ne voulez pas souffrir que quatre ou cinq dient ce qu'ils pensent, & les menacez de leurs donner vn billet, comme à des heretiques, ou politiques. Et neantmoins vous voulez qu'on croye que ce que vous en faictes, n'est que pour la conseruation de la religion, & de l'estat. C'est bien dict: examinons vn peu vos actions, & les depor-

tement du Roy d'Espagne enuers nous : & si
 i'en ments de mot , que iamais Monsieur
 saint Denis-, & Madame sainte Geneuiefue
 patrons de France ne me soyent en ayde. I'ay
 vn peu estudié aux escholes , non pas tant
 que i'eusse desiré , mais depuis i'ay veu du
 pays , & voyagé iusques en Turquie , & par
 toute la Natolie , Esclauonie , iusques à Lar-
 chipelago , & mar-Maiour , & Tripoli de
 Syrie , où i'ay appris le dire de Iesus-Christ,
 nostre Sauueur estre veritable , à *fructibus*
eorum cognoscetis eos : on cognoist à la longue,
 quelles sont les intentions des hommes par
 leurs œuures , & leurs effects. Premièrement
 ie diray avec preface d'honneur , que le Roy
 d'Espagne est vn grand prince , sage , cault &
 aduisé, le plus puissant , & plus grand terrien
 de tous les princes Chrestiens , & le seroit
 encor d'auantage si toutes ses terres & roy-
 aumes se tenoyent, & estoient ioincts à l'ap-
 proche l'vn de l'autre , mais la France qui est
 entre l'Espagne & le pays bas , est cause que
 ses Seigneuries separees , luy coustent plus
 qu'elles ne luy valent : car sur toutes nations
 il redoubte la Françoisse , comme celle qu'il
 congnoist estre plus genereuse, & auoir plus
 de valeur , & impatiente du repos , & de la
 domination estrangere: C'est pourquoy com-
 me

me prudent, preuoyant & bien conſeillé qu'il eſt dès lors qu'il fut contrainct de faire ceste miſerable paix, qui fut ſeellée, & ſignalée de la mort de noſtre bon Roy Henry ſecond, n'oſant ouuertement y contreuenir, ni recommencer la guerre, pendant que la France eſtoit floriffante, vnie, bien d'accord, & de meſme volonté enſemble, il a taſché de ſemer la diuiſion & la diſcorde par-my nous meſmes, & ſi toſt qu'il a veu nos princes ſe meſcontenter, ou ſe bigearrer, ils'eſt ſecrettement iecté à la trauerſe, pour encourager l'vn des partis nourrir & fomenten nos diuiſions, & les rendre immortelles, pour nous amuſer à nous quereller, entrebatte, & entreteuer l'vn l'autre, affin d'eſtre ce pendant laiſſé en paix, & tandis que nous nous affoiblirons, croiſtre, & s'auguementen de noſtre perte & diminution. C'eſt la proceduere qu'il a tenuë depuis qu'il veit meſſieurs les princes de Vendosme, & de Condé mal contents qui attirerent avec eux la maiſon de Montmorency, & de Chaſtilton, pour s'oppoſer aux aduantageux progrez, & aduancements de voſtre pere & de vos oncles, Monsieur le Lieutenant, qui auoyent enuahy & uſurpé toute l'autorité & puiſſance Royale du tēps du petit Roy François leur nepueu : ie ne dy

rien, que toute la France iusques aux plus petis, voire que tout le monde vniuersel ne sache: car toutes les sanglantes tragedies qui ont depuis esté iouës sur ce pitoyable eschaufaut Francois, sont toutes nées & procedées de cès premieres querelles: & non de la diuersité de religion, comme sans raison on faiët iusques icy croire aux simples & idiots: Je suis vieil, & ay veu des affaires du monde autant qu'un autre, voyre i'ay par la grace de Dieu, & de mes amis, esté escheuin & preuost des marchands en ceste ville, du temps qu'on y procedoit par libre election, & qu'on ne forçoit ny violentoit personne pour les voix & suffrages, comme auez faiët, Monsieur le Lieutenant, depuis n'agueres, ayant voulu faire continuer Monsieur Boucher à vostre deuotion: mais il me souuient encores de ces vieux temps, comme si ce n'estoit que d'hier ou d'aujourd'huy. I'ay bonne memoire du commencement de la querelle qui vint entre feu Monsieur vostre pere, & feu Monsieur le connestable laquelle ne proceda que de la ialousie de l'un sur l'autre: estans tous deux grands mignons & fauoris du Roy Henry second, leur maistre: comme nous auons veu messieurs de Ioyeuse & d'Espernon sous le Roy Henri troiesime son

son fils: Leur première dispute fut pour l'estat
de grand maistre, que le Roy donna à Mon-
sieur vostre pere, quand il fit Monsieur de
Montmorency Connestable, qui estoit grand
 maistre auparauant: & qui auoit promessé du
 Roy que ledit estat seroit conserué pour
 son fils. L'autre cause de leur mauuais mes-
 nage, fut le Conté de Dampmartin, que tous
 deux auoyent acheté de diuerses façons, &
 en estans entrez en ptocez, Monsieur le
 Connestable le gaigna par arrest. Ceja les al-
 tera tellement que chascun d'eux răschoit à
 desarçonner son compagnon: & de la vint le
 voyage que fit Monsieur vostre pere en Italie,
 où il ne fit pas grand cas, par ce que Mon-
 sieur le Connestable qui l'y auoit faict en-
 uoyer pour posséder le Roy tout seul plus à
 son ayse, en pescha peut estre, ou retarda les
 affaires: mais il ne demeura gueres sans en
 estre puny: car il fut pris à la iournée saint
 Laurent, pendant l'absence de vostre pere,
 lequel estant de retour, par vn heur à la ve-
 rité fort admirable reprit les villes de Picar-
 die que nous auions perduës, & Calays da-
 uantage: & pour se reuancher des mauuais
 offices qu'il auoit sçeu qu'on luy auoit faict
 en son voyage, fit aussi tenir en longueur la
 prison de Monsieur le Connestable, & n'ou-

bliarien d'artifice pour empêcher & dilayer
 sa deliurance : qui donna occasion à ses ne-
 ueux messieurs de Chastillon, d'implorer le
 secours, & se jeter entre les bras du Roy de
 Nauarre pere de cestui cy, & de Monsieur le
 Prince de Condé son frere, qui auoit espousé
 leur niepce. Voila ces deux grandes maisons
 en factions & partialitez : qui s'aygrirent
 encor par la contention née entre Monsieur
 le Prince de Condé & Monsieur d'Aumale
 vostre oncle pour l'estat de colonel de la ca-
 ualerie legere : il n'estoit encore lors mention
 de religion ny de Huguenots. A peine sçauoit
 on quelle estoit la doctrine de Calvin & de
 Luther, sinon au supplice de ceux qu'on vo-
 yoit brusler opiniastrés : & neantmoins, la ma-
 tiere des guerres, & des inimitiez que nous
 auons veuës, se preparoit deslors, & a duré
 iusques à present : Mais la verité est, que quãd
 messieurs de Chastillon hommes courageux
 & mal endurens, veirent que la faueur de
 vostre maison l'emportoit sur la leur, & qu'il
 n'y auoit moyen de trouuer credit aupres du
 Roy, pour les obstacles que les vostres leur
 donnoient, ils furent conseillez de se retirer
 de la court, & en leur retraicte (fust-ce à bon
 escient, fust-ce par ruse, & prudẽce) se mōstre-
 rent fauoriser les nouueaux Lutheriens, qui
 ne

ne preschoyent encor que dās les caues: & peu à peu se ioignirent de faction & d'intelligence avec eux, plus pour se deffendre & garentir de vostre pere & de vostre oncle, que pour attenter aucun remuement de nouveauté, sinon alors que le Roy à la suscitation de vostre oncle, quiluy en auoit faict escrire par le Pape, prit luy mesmes monsieurs d'Andelot à Crecy, & l'enuoya prisonnier à Melun: Apres cet emprisonnement, & celuy du Vidame de Chartres, & de quelques conseillers de parlement, suruint la violente & miraculeuse mort du Roy, qui esleua vostre maison au souuerain degré de puissance, apres du petit Roy François, & par le contraire, recula & abbatit presque du tout celle de Monsieur le Connestable, & de tous ceux qui luy appartenoyent: & ce fut lors que les siens desesperez des moyens ordinaires, parce que tout bransloit soubs la faueur des vostres, se ioignirent de secrette intelligence avec les Lutheriens çà & là escartez par diuers coings du Royaume: & combien qu'ils eussent encor peu de creance avec eux, qui leur estoient gens incogneus, & n'ayant participé ni à Cene, ni à Synode, ou Consistoire, neantmoins par le moyen de leurs agens, bien entendus es secrets, ils firent ceste me-

notable entreprinse d'Amboyse , & assen-
 blerent de tous les quârtiers du monde , avec
 vn silence merueilleux , vne telle force de
 gens qu'ils furent prests à iour nommé , de
 faire vne cruelle execution sur tous les vo-
 stres, sous ce pretexte de deliurer le Roy de
 la captiuité où vostre pere & vos oncles le
 tenoyent : mais les bonnes gens ne se peurent
 garder des traistres , dont s'ensuiuit la pende-
 rie d'Amboise qui descouurit les autheurs de
 la faction : Et de la s'ensuiuit le mandement
 rigoureux qu'on fit au roy de Nauarre , & la
 prison de Monsieur le Prince de Condé aux
 estats d'Orleans , & beaucoup d'autre tri-
 stes accidents longs à racompter : lesquels
 eussent continué beaucoup pires , si la sou-
 daine mort du petit roy n'en eust destour-
 ne le cours , & rompu le coup qu'on alloit
 assener sur ces premiers Princes du sang
 royal : & sur la famille de Monsieur le Con-
 nestable, & des Chastillons : Il est aysé à iuger
 combien vostre maison fut esbranlée & fra-
 cassée par ceste inopincé mort , & pouuez
 croire, monsieur le Lieutenant, que monsieur
 vostre pere , & messieurs vos oncles iouèrent
 tout vn temps à l'esbahy, comme vous peu-
 stes faire, quand on vous porta la nouuelle
 de la mort de vos deux freres : mais non plus
 que

que vous , il ne perdirent pas courage : & dès lors eurent de bons aduis & consolations du roy d'Espagne, duquel nous parlions tantost, qui durant ces premières dissensions estoit aux escoutes à qui il offriroit sa faueur, & attisoit le feu d'une part & d'autre, pour le faire croistre en la force & grandeur, que nous l'auons veu, & voyons encor maintenant ardre, & consommer toute la Frâce, qui est le but final de ses pretensions: Sur l'esperance donc du support d'un si grand Prince qui n'espargnoit de promettre argent, & hommes, vostre pere sans s'estonner d'une si lourde cheute, voyant le roy de Nauarre remis en son rang de premier Prince du sang, pour la tutelle du petit roy Charles, & monsieur le Connestable remis en sa charge, sceut si dextrement iouer son rollet, qu'il les pratiqua tous deux, & tira à sa cordele, contre leurs propres freres, & contre leurs propres neueux: rapaisant l'un d'une esperance que ien'ose dire, & amadouant l'autre par submillions, & honneurs, qu'il luy deferoit. Si bien que reprenant encor ses erres delaissees, & son ancien aduantage, apres que monsieur, le Prince de Condé fut estargy, qui l'auoit failly belle de deux ou trois iours seulement, il alla avec nombre de gens de guerre, & en
grosse

grosse troupe , se saisir du petit Roy , & de la Royne sa mere à Fontainebleau , & les amena à Melun Et ce fut lors que mondict sieur le Prince, & messieurs de Chastillõ ne se sentants assez forts de leur chef, ny de leurs maisons , pour resister à si puissans ennemis, couverts de l'autorité & puissance Royale , se firent Lutheriens tout à fait , & se declairent chefs & protecteurs des nouveaux heretiques , lesquels ils appellerent à leur secours , & par leur moyen , en guerre ouuerte se saisirent de plusieurs grosses villes de ce Royaumes, sans toutesfois faire aucune mention de leur religion, mais seulement pour la deffense du Roy , & de sa mere , & pour les oster de la captiuité, où monsieur vostre pere les detenoit : Et vous sçavez , Monsieur le Lieutenant, que ces gens là se sont tousiours vantez que ce qu'ils en auoyent fait , auoit esté à la requeste & au mandement de la Royne Mere, de laquelle ils ont publié , & fait imprimer les lettres à eux par elle escrites , à ceste fin : vous n'ignorez pas ce qui se passa en ceste guerre , & comment dès lors le Roy d'Espagne enuoya à vostre pere du secours , mais tel que i'ay honte d'en parler, tous bisognes ramassez , qui iamais ne voulurent combattre à la bataille de Dreux , & se

coururent des chariots du bagages: Toutes-
 fois cela fut vne amorce pour allumer le cou-
 rage des partizans, & leur faire esperer qu'ils
 feroient bien quelque chose d'auantage vne
 autre fois, s'ils venoyent encor à s'entrebatre:
 Mais du depuis, les diuers changement de nos
 affaires donnerent bien à l'Espagnol vn au-
 tre ieu: Car vostre pere mort, & la paix faicte,
 cognoissant neantmoins ces puissantes fa-
 milles animees & aheurtees l'une contre l'au-
 tre, sans espoir de reconciliation, il pratiqua
 Monsieur le Cardinal vostre oncle (qui ne
 dormoit pas de son costé) pour entretenir
 les troubles & diuisions en ce Royaume,
 sous le nom specieux de la religion, de la-
 quelle auparauant on auoit faict peu ou point
 d'estat: Monsieur vostre oncle, comme il estoit
 adroict, ingenieux, & complaisant à qui il
 vouloit, sceut tellement gaigner le cœur de la
 Royne mere, & la Royne mere celuy du Roy
 son fils, qu'il leur persuada que messieurs les
 Princes de bourbon, aydez de ceux de Mont-
 morency, & de Chastillon ne demandoient
 que sa ruine, & n'auroient iamais patience,
 ni cesser, qu'ils ne l'eussent chassée du Roy-
 aume, & renuoyee en Italie chez ses parents:
 Dieu face pardon à la bonne dame: mais pour
 l'apprehension qu'elle en eut, i'ay grand peur
 qu'el

qu'elle a esté cause de beaucoup de maux que nous auons veu de son temps : car sur ce subiect , elle les prit en telle haine , que iamais elle ne cessa qu'elle ne les eust ruinez, comme elle fit l'un à la bataille de Iarnac, & l'autre à la saint Barthelemy, où si tous ceux de Montmorency se fussent trouuez, ils n'en eussent pas eu meilleur marché. A quoy monseigneur vostre oncle tenoit la main fort dextrement , & poussoit vaillamment à la rouë pour mettre le feu en la teste du ieune Roy Charles : sans la mort duquel, il ne faut doubter qu'il n'eust bien eu la raison de l'escorne que Monsieur le Marechal de Montmorency luy auoit faicte en ceste ville , & à monsieur vostre frere, quand il leur fit faire tout en leurs chausses , parce qu'ils portoyent armes defendues sans son passeport : Mais il semble que les morts soudaines de ces trois Roys subsequents l'un apres l'autre , ayent tousiours rompu & desbauché les beaux desseings de vostre maison, & faulué, ou prolongé la vie à vos principaux ennemis. Venons à ce qui est aduenü depuis : Car il est temps de parler de vous & de monsieur vostre frere, qui commenciez dès lors à paroistre aux armées , & marcher sur les pas & traces de vos predecesseurs : vous auiez desia faict paroistre

estre vos vaillances au siege de Poiſtiers, que deſſendistes brauement, contre l'aduis du premier mary de madame la Lieutenande, monsieur de montpezat vostre deuancier, qui vous conseilloit de quitter tout, & vous en aller, puis fustes à la bataille de moncontour; puis à la iournee de sainct Barthelemy, où les compagnons furent prins endormis, & frottez à dire dont venez vous: & encor que monsieur vostre oncle fust à fueilleter son breuiare en Italie, si est-ce que le ieu ne se fit sans son entremise pour en auoir l'aproba-tion du roy d'Espagne, & l'absolution du Pape, touchant le mariage qui seruit de leurre & de trapusse au Huguenots. Par apres vous continuastes vos coups au siege de la ro-chelle, où l'on veit que le roy de Nauarre qui est auiourd'huy, & monsieur vostre frere n'estoyent qu'un cœur & vne ame, & engen-droyent ialousie à tout le monde, pour leur grande priuauté. Mais il faut venir au point: quand vous veistes le roy Charles decedé, qui autrement ne vous aymoit pas beaucoup, & qui auoit plusieurs fois repeté le dire du grand roy François, dont luy mesmes auoit faict ce quatrain maintenant tout vulgaire.

*Le Roy François ne faillit poinct
 Quand il predict que ceux de Guyse
 Mettroient ses enfans en pourpoinct,
 Et tous ses subiects en chemise.*

Quand vous le vistes , dy- ie , decedé sans enfans , & le feu Roy son frere marié avec vostre cousine brehaigne & sterile , vous commençastes , Monsieur vostre frere & vous , à faire des desseings , & proiects que beaucoup de gens disent estre cause de tous nos malheurs : le ne suis pas de ceux qui croient que messieurs vostre pere & oncle eussent dès leurs temps iecté les fondemens de l'edifice , que vostre frere & vous , avez basti depuis : Encores qu'on parle des memoires de Daudid , & de Piles , qui ont pronostiqué mieux que Nostradamus tout ce que nous auons veu depuis leur mort. Et qu'on asseure que Monsieur vostre oncle auoit dressé vn formulaire , de tout l'ordre qu'on y deuoit tenir : Mais ie ne puis croire que luy qui auoit de l'entendement , ce qu'homme pouuoit auoir , eust peu esperer , de faire ses neveux Roys de France , voyant encor trois freres enfans de la maison Royale en droite ligne , tous puissans , & en la fleur de leur aâge , prests à se marier : & ne pouuoit pas diuiner qu'ils mourroyent sans lignée , comme ils ont

ils ont fait parapres : D'ailleurs il voyoit grand nombre de Princes du sang Royal , qui ne s'estoyent point frotté à la robbe des Heretiques : Cela luy deuoit couper toute esperance à ses desirs. Je sçay bien que de son temps il a esté autheur que l'Archediacre de Thoul a escrit, que ceux de la maison de Lorraine estoient descendus de Charle-magne , par les masles, sçauoir de Charles Duc de Lorraine à qui le Royaume appartenoit apres la mort de Louys cinquiesme , Roy de France : & que l'ayant Huë Capet pris à Laon , & mené prisonnier avec sa femme à Orleans , il eust vn. fils masle, duquel il affermoit les Ducs de Lorraine, estre descendus : cela s'est sous main ietté parmy le peuple , dont vous n'estiez pas marris : encore que les histoires communes & veritables tesmoignent assez , qu'il y a eu interruption de masles en la race de Lorraine par deux femmes , & notamment en la femme de Godfroy de Bouillon , nommée Idain. Aussi en fit ledict Archidiacre l'amende honorable par arrest , & s'en desdict comme lasche & poltron.

Mais en fin , il n'y auoit pas apparence que de ce temps là , mondict sieur vostre oncle, peust aspirer à la Royauté , ayant tant d'obstacles , & de testes , ou à combattre , ou à faire

mourir par glaiue , ou par poison : bien est
vray , que dès son commencement il fut am-
bitieux des grandeurs , & du gouuernement
de l'estat plus que nul autre de son aâge , & ne
fay doute qu'il n'ayt desiré posséder les Roys,
& les tenir s'il eust peu , en curatelle : comme
faisoyent anciennnemēt les Maires du Palais,
pour disposer de tout à son appetit , & auan-
cer ou reculer tous ceux qu'il luy eust pleu:
qui est-ce à quoy ordinairement les plus grād
aspirent. Ce pendant y estant à peu pres par-
uenue , comme il a faiēt de son viuant , il vous
auoit assemblé & préparé les materiaux , des-
quels vous auez basty ce superbe desseing,
d'empiēter la couronne: Vous ayant laissé en
main premierement de grands biens: de grāds
estats, les premiers offices & charges du Royau-
me , de grands gouuernemens , force gens
de guerre obligez par biensfaiēts , force ser-
uiteurs : force intelligences avec le Pape &
le Roy d'Espagne , & autres Princes de vos
parents & alliez: & qui plus est , vne grande
opinion enuers le menu peuple que fussiez
bons Catholiques , & ennemis iurez des Hu-
guenots. Vous auez sceu faire fort bien vostre
proffit de ces preparatoires , & des estoſſes
qu'auuez trouuées apres sa mort toutes pre-
stes à mettre en œuure. Quand ie dy vous,
i'entends

i'entends parler de vos freres, & de vos cousins. Apres la mort du Roy Charles , beaucoup de choses vous ont succédé l'une apres l'autre , fort à propos : Premièrement la sterilité du Roy , ou de vostre cousine sa femme : Puis la retraicte & absence du Roy de Nauarre, dont vous fustes en partie cause, pour les deffiances où vous le mettiez : Et par apres la dissention, & diuision du Roy, & de monsieur le Duc, son frere ; de laquelle vous seuls fustes les auteurs , & promoteurs, aygrissant sous main les esprits de l'un contre l'autre , & leur promettant secrettement de les assister. Vne autre chose dont vous vous auez bien sçeu aider, fut l'assistance que firent pour vn temps messieurs les Princes de Conty, & de Soissons au Roy de Nauarre leur cousin germain , quand ils veirent que c'estoit directement à toute leur famille que vous en vouliez , & que vous vous vantiez de supplanter: car la dessus vous pristés le subiect , que iamais n'auiez laissé ni oublié depuis, de faire comprendre par la bulle du Pape, & par les serments & protestations du Roy d'Espagne, de n'approuer iamais les Princes heretiques , ni fils d'heretiques, & trouuastes lors ces beaux noms d'adherents , & fauteurs d'heretiques

Vous feistes des lors vos pratiques avec le Roy d'Espagne plus manifestement, & asseurastes vos condicions, & stipulastes des lors vos pensions, luy promettant le Royaume de Nauarre, & le Bearn pour sa part, avec les villes qui seroyent à sa bienseance en Picardie, & Champagne : & conuinstes avecques luy des moyens, dont vous vseriez, pour empierter l'estat. Et le pretexte qu'y pretendiez, estoit le mauuais gouuernement du Roy, les prodigalitez qu'il faisoit à ses deux mignons, desquels vous tirastes l'yn à vostre cordelle, qui ne s'en trouua pas mieux : vous employastes toute vostre industrie à rendre le pauvre Prince odieux à son peuple : Luy conseilliez de surhausser les tailles, d'inuenter nouveaux impôts, creer nouveaux offices : desquels vous mesmes proffictiez : car on maintint à monsieur vostre frere à Chartres apres les barricades, qu'il auoit receu l'argent du party de trois edicts burseux, fort pernicioeux, dont toutes-fois vous reiectiez la hayne sur ce pauvre Roy, lequel vous faisiez amuser à des deuotions ridicules, cependant que vous briguez la bonne grace de son peuple, & contre son gré preniez la charge & conduite des grandes armées, attirant à vous les chefs & Capitaines de guerre, & courtizans iusques aux simples

ples soldats pour les gaigner : pratiquant les villes , acheptant les gouuernemens , & mettant aux meilleures places des gouuerneurs, & gens à vostre deuotion : Et ce fut lors que vous conceustes tout à fait la Royauté, comme l'appetit vient en mangeant , quand vous veistes le Roy Henry sans esperance de lignée, les premiers Princes tenus pour heretiques ou fauteurs d'heretiques, le consistoire de Rome vous hocher la bride : & le Roy d'Espagne, vous donner l'esperon. Vous n'auiez plus que feu Monsieur qui estoit vn mauuais songe-creux , & qui scauoit bien de quel bois vous vous chauffiez. Il se falloit desfaire de luy : & le testament de Salcede nous en a descouuers les moyens : mais la force n'ayant succedé, le poison fit la besongne. Tous vos seruiteurs predisoient ceste mort plus de trois mois deuant qu'elle fust aduenue. Alors vous ne fistes plus la petite bouche pour dissimuler vostre intention : vous n'allastes plus connillant, ny à cachette : vous vous declarastes tout à bon. Et neantmoins pour auancer vos affaires, vous vouldistes faire croire aux bonnes gens que c'estoit pour le bien public, & pour la deffence de la religion Catholique, qui est vn pretexte que les seditieux , & remueurs de nouueltetez ont

toufiours pris. Dedans ce tet infenfible vous attirastes le bon homme monsieur le Cardinal de Bourbon , Prince fans malice : & le sçeustes si dextrement tourner , & manier , que luy meistes vne folle & indiscrette ambition dedans la teste , pour faire de luy comme le chat de la souris, c'est à dire apres vous en estre ioué, de le manger : vous y attirastes plusieurs seigneurs de ce Royaume, plusieurs Gentils-hommes & Capitaines, plusieurs villes & communautéz : & entre les autres , ceste-cy miserable , qui se laissa engluer , partie de hayne des comportemens du feu Roy , partie de l'impression que luy donniez que la religiõ Catholique s'en alloit perdue, si le Roy mourant sans enfans , la succession du Royaume venoit au Roy de Navarre , qui se disoit premier Prince du sang. Vous forgeastes la dessus vostre premier manifesté , Imprimé à Reims , qui ne portoit vn seul mot de la religion , mais bien demandiez tous les estats & gouuernemens de ce Royaume , estre ostez à ceux qui les possedoyent, qui n'estoyent à vostre deuotion : Ceque vous corrigeastes par vostre second manifesté du conseil de Rosne , qui pour tout brouiller , dist qu'il ne failloit que mettre la religion en auât : & alors vous nous preschastes
d'vn

d'un Sinode à Montauban , & d'une diete en Allemagne, où disiez que tous les Huguenots du monde auoyent comploté de se saisir du Royaume de France, & en chasser tous les prestres. Aucuns vous creurent, & quant à moy qui ne suis pas des plus rusez, i'en eue quelque opinion, & me ioigny de ce party, pour la crainte que i'ay tousiours eue de perdre ma religion : beaucoup de bonnes gens ont fait comme moy , qui ne s'en sont pas mieux trouuez : Les autres , qui ne demandoient que nouveaux remuëments , firent semblant de le croire : plusieurs saffraniers, endebtez, criminels, contumaces, vous suivirent, comme gens qui auoyent besoing de la guerre ciuille. Ayant ainsi ioué vostre partie, & receu force doublons d'Espagne, vous vous mistes aux champs avec vne belle armee: quelques vns disent que cela ne se fit sans le sçeu & consentement de la Royne mere, qui aymoit les troubles pour se rendre necessaire, & estre employee à faire le hola : à quoy elle estoit fort propre : mais toute Italienne, & ruzée quelle fut, si fut elle trompee : Car elle ne croyoit pas du commencement que vos desseings volassent si haut, & ne decouurit la mesche que bien tard apres qu'eustes mis le pied si auant, qu'il n'y auoit

plus moyen de le retirer: n'estant pas vraysemblable, encor qu'elle eust du mescontentement de son fils, qui à la verité se laissoit plus gouverner à d'autres qu'à elle, elle eust voulu le laisser ruiner, & le voir priuer de la Couronne, pour y establir vostre frere, de qui elle ne se fioit que de bonne façon.

L'aide donc que la bonne dame vous fit, n'estoit pas pour perdre son fils, mais pour le ramener à humilité & recognoissance. Ce que pensant auoir faict par vostre moyen, elle vous fit par apres dissiper vostre armee, qui ne vous seruit de rien, sinon pour vous faire cognoistre vos forces, & pour extorquer par violence, cest edict de Iuillet, qui cassoit tous les autres edicts de pacification auparavant faicts, & remettoit encor le feu & le carnage en France contre les Huguenots. Mais vous ne demeurastes pas en si beau chemin: car ayant recogneu que la pluspart des bonnes villes qui vous auoyent promis de s'esleuer pour vous, quand elles vous verroyent aux champs avec vne armee, vous auoyent manqué, & estoient encor retenues de quelque crainte & réuerence du nom des Rois, & de la Majesté Royale: vous pratiquastes sans vous desarmer, dedans toutes les villes ceux des habitans que sçauiez auoir quelque creance & dignité sur le
peuple

peuple : Vous corrompistes les vns par argent, qui vous venoit en abondance d'Espagne : les autres par promesses de biens, offices, benefices, & les autres par impunité des crimes, dont ils estoient poursuiuis en Iustice : Mais principalement vous dressastes vos machines contre ceste miserable ville, où vous n'oubliaistes aucun artifice, iusques aux plus abiectes & honteuses submissions pour rechercher & gagner la simple populace. Vostre frere s'en alla armer en Champagne & Bourgogne, pour surprendre les places du Roy, non celles des Huguenots, dont on ne parloit point en ce pays là sinon à Sedan, où il fit mal ses besongnes. Vous, monsieur le Lieutenant, allastes en Guyenne avec vne puissante armée pour attendre l'occasion de iouër vos ieux : & c'est à mon aduis la raison que n'y fistes pas grand cas, par ce que vouliez temporiser en attendant à frapper vostre coup par deça, comme auez dict tantost. Mais les heretiques de Sainctonge ne laisserent de s'en moquer : car à vostre retour, ils firent vne petite rime en leurs parois qui merite que la sçachiez, & la voicy.

Hausssez vos voutes grand portaux:

Huy de Paris tenez vous hauts:

Si entrera le Duc de gloire:

Qui pour tuer cent Huguenots,

A faiët mourir mille Papaux:

Na-il pas bien gagné à boire?

Le quatrain qui en fut faiët par deçà, est commun, touchant les places que vous priestes.

Oronce est vn oyson, & Theuet vne cane,

Qui en representant la carte Gallicane,

Ont oublié de mettre, ou laissé par mespris,

Les villes & chasteaux que ce grand Duc a pris.

Je ne parleray point de la belle prise que vous fistes du Chasteau de Fronsac, & d'une ieune dame qui estoit dedans, heritiere de la maison de Caumont: Cela ne merite pas d'estre recité en ceste bonne compagnie: encor que le bon homme de la Vauguyon en soit mort de desplaisir, n'ayant peu en avoir iustice contre vous. Aussi n'estoit-ce rien au prix de ce qu'auiez deliberé de faire en ceste ville à vostre retour: dont vous sçauiez que ie sçay quelque chose, & non pas tout: Car ie n'auois poinët sceu que dès lors vous eussiez proiecté de prendre le Roy au Louure, & tuer ou emprisonner tous ses meilleurs & plus signalez seruiteurs, si le Lieutenant du Preuost Hardy ne l'eust reuelé, qui descouurit toutes vos assemblees & entreprises, par
tenans

tenans & aboutiffans: fut cause que le Roy bien aduerty fit saisir le grand & petit chastelet, & l'arsenac & hostel de ville, & renforça ses gardes, pour empescher l'execution de vostre desseing. Vous confesserez que s'il eust fait alors ce qu'il deuoit, & pouuoit, vous & tous vos agents & faciendaires estiez perdus, lesquels on congnoissoit par noms & par surnoms: tout ainsi qu'ils se sont declairez parapres: Mais on y proceda trop mollement par le conseil de ceux qui disoyent, & disent encores aujourd'huy, qu'il ne faut rien aigrir. Depuis vous ne cessastes de pratiquer & solliciter tout le monde quasi à descouuert, & principalement les prescheurs & curez, à qui vous faysiez quelque petite part de vos doublons. Vous enuoyastes vne autre armee en Guienne, dont faisiez estat, & que pensiez qui d'eust resserer, ou prendre le Roy de Navarre: mais de belles: vous allastes precipiter & faire perdre ce ieune Seigneur, presumpueux des esperances que luy donniez, qu'il seroit Roy de Tholoze. Vostre frere auoit d'autres forces sur pieds, qui luy vindrent bien à propos pour repousser les Reistres venans au secours des Huguenots de Guyenne: & fallut que vous mesmes monsieur le Lieutenant, y allastiez en personne: encore
ne

ne sceustes vous les empescher de passer : & s'il n'y eust eu que vous & les vostres qui vous en fussiez meslez, quelque chose qu'en ayez voulu faire croire, ils fussent venus boire nostre vin iusques à nos portes, & vous eussent mis en merueilleux accessoire: Neantmoins vous voulustes vous donner toute la gloire de leur desroute, & la desrober au Roy, & à ses bons seruiteurs, qui en temporisant & s'opposant à leur passage de Seine, y auoyent apporté les plus grands effects. Cela veritablement vous acquist vn grand honneur & faueur enuers les Parisiens, dont la pluspart ne scauoyent pas encor à quoy vous tendiez: mais ceux qui participoyent à vos secrets, & qui lors prindrent le nom de Catholiques zelez, faisoient desia vn Dieu de vostre frere, l'inuoquoyent en leurs afflictions, & auoyent recours à luy quand on les menaçoit du Roy, & de la iustice. Dont il fut rendu si orgueilleux & temeraire qu'il osa venir en ceste ville avec huit cheuaux, contre les desfenses tres-expresses que le Roy luy en auoit faictes : encor qu'on sçache bien qu'il auoit assigné cinq ou six cents hommes de cheual, qui se rendirent à mesme iour près de luy. Le Pape Sixte cinquiesme, sceut bien dire quelle peine cela meritoit, quand il en sceut

sçeut la nouuelle : & n'eust par failli de le faire si telle chose luy fust aduenüë : mais la bonne mere & ses bons conseillers , faiëts de sa main ; & de son humeur , dont nous n'auons encor que trop de reste , sçeurent si dextrement imprimer la crainte en l'esprit foible de ce pauvre Prince qu'il n'osa rien entreprendre de peur d'irriter les Parisiens , & craignant remettre encor les troubles & les miseres de la guerre en son Royaume. Car encor qu'il n'aimast pas les Huguenots plus que vous , si est-ce qu'ayant experimenté leur opiniastreté , & que pour neant on taschoit les vaincre & ranger à raison par la violence de la guerre , qui ruinoit son peuple , il s'estoit resolu de ne tenter plus les voyes de la force : mais par vn plus gracieux remede auoit commencé de les attirer à l'obeissance , & reconnaissance de leurs fautes passées : les priant de sa court & de sa suite , des honneurs , charges , gouuernemens , offices & benefices , dont la plus part d'eux se faschoyent de se veoir excluz : si bien qu'il faut aduouër , que leurs forces s'estoyent plus alenties & diminuees par cinq ou six ans de paix , que par dix ans de guerre ouuerte. Et ne se faisoit plus de nouveaux Huguenots , les vieux se froidissans , & s'ennuyans de la longueur , & la plus

part

part d'eux permettans que leurs enfans se fissent Catholiques, pour participer aux honneurs & aux benefices comme les autres: Mais vous & les vostres impatientes du repos, & qui auiez peu de soin de la religion, pourueu que paruinssiez à vos attentes, ne peustes souffrir ceste tranquillité, qui ne vous estoit pas saine. Vous auiez appris que la pescherie est meilleure quand l'eau est trouble: si bien que n'eustes iamais repos, que n'eussiez veu naistre ceste belle iournee des barricades, qui nous a vous & nous ruinez: Encor qu'il soit assez notoire, & vostre frere ne le nieroit pas s'il estoit viuant, & tous ceux qui estoient de l'entreprise, qui sont icy presents, me le confesseront, que si le Roy eust voulu vser de son pouuoir & de son autorité, nous estions dès ce iour là tous perdus: estant bien certain que vous fustes preuenus & deuancez de trois iours, & que le iour de l'exploit qui se deuoit faire, n'estoit assigné qu'au dimanche: Si bien que le Roy qui sçauoit toute l'entreprise (encor que ceux qui approchoient le plus pres de sa personne, taschassent luy dissuader, & diuertir d'adiouster foy aux rapports qu'on luy en faisoit) eut ses Suisses & les gardes & autres gens de guerre tous prests auant iour, qui auoyent desia pris les places,

carre

carrefours & quantons de la ville, dès le matin au parauant que vostre frere, ni aucun des entrepreneurs fust esueillé : lequel comme sçauiez, ayant sceu à son resueil, ce qui se passoit, se trouua si surpris & esperdu, qu'il n'attendoit rien moins, sinon qu'on le vinst assieger & prendre ou massacrer en l'hostel de Guyse, où il s'estoit resolu se deffendre seulement avec son espee, n'y ayant faict preparatif d'aucunes armes, de peur qu'on y allast fouiller, & pour oster tout soupçon de luy: de mesme, tous les seize, & les plus mutins de la faction se cachèrent dedans les caues, & chez leurs amis & voisins, n'attendans rien que la mort: & n'y eut aucun si hardi qui osast paroistre dedans la ruë, qu'il ne fust plus de huiët ou neuf heures: tellement que le Roy eust peu sans aucune resistance se saisir d'eux & de vostre frere, & remettre absolument son autorité, s'il eust permis que ses gens de guerre eussent ioué des mains, & chargé les premiers qui s'auancerent à faire barricades, & à boucher les passages des ruës: Mais sa timidité, ou plustost sa naturelle bonté, avec les impressions que luy donnoit sa mere, & ses traistres conseillers, l'empeschèrent d'vser de l'aduantage qu'il auoit en main, faisant deffendre à ses gens de guerre de frapper, ny
offen

offenser personne , & se tenir coy sans rien entreprendre, ny faire effort à aucun des habitans : qui fut cause que les mutins reprenans cœur, sur les erres de leur entreprise proiettee, eurent loisir de s'armer, & de renfermer comme entre deux gauffres, ceux qu'ils n'osoyent auparauant regarder au visage. Et vostre frere aussi voyant qu'on tardoit tant à le venir attaquer, & que de toutes parts luy venoyent des gens en armes, que ceux du Roy laissoient librement passer, parce qu'ils n'auoyent point charge de prendre garde à luy, & scachant que ceux de son party commençoient à se recognoistre, & à faire teste aux quartiers, selon l'ordre qu'on auoit auparauant proiecté, de desesperé qu'il estoit, il entra en pleine assurance, & enuoya ses gentils-hommes destinez par les rues & quantons, pour assister & encourager les habitans, se saisir des portes, & des places : de sa part apres s'estre renforcé de bon nombre d'hommes armez, qui auoyent leur rendez-vous à luy, sortit de sa maison sur les dix à vnze heures, pour se faire voir par les rues, & par sa presence donner le signal de la reuolte generale, qui meit incontinent le feu en la teste de tous ses coniuérateurs, lesquels comme forcenez & furieux, se ruerent sur les Suisses
du

du Roy, qu'ils taillèrent en pieces : & les autres gens de guerre se voyants renfermez entre deux barricades, deuant & derriere, sans s'estre osé deffendre, à cause que le Roy leur auoit deffendu, se rendirent à la mercy de vostre frere, qui les fit conduire en seureté hors de la ville, ce qu'il fit non tant par clemence & douceur qui luy fust naturelle que par ruse & cautelle, pour mieux paruenir à son dernier but, qui estoit de se saisir du Roy, lequel il voyoit en armes sur ses gardes en son Louure, mal aisé à forcer si promptement, sans grand massacre. Son artifice donc fut de filer doux, & de contrefaire le piteux, disant qu'il auoit vn extreme regret de ce qui estoit aduenu : ce pendant il visitoit les ruës, pour encourager les habitans, il s'asseuroit des places fortes, il se fit maistre del'arcenac où il auoit bonne intelligence avec Selincourt, pour auoir le canon, les pouldres & boulets à sa deuotion il eniola de belles parolles le pauvre cheualier du guet, qui luy rendit la Bastille par faute de bon appareil. Il ne luy restoit plus que le Louure, le palays estoit à luy: mais ce n'estoit rien fait qui ne tenoit le maistre, lequel auoit vne porte derriere pour se retirer. Ce fut pourquoy pied à pied on auença les barricades, pour gagner la por-

re Neufue, & celle de saint Honoré : mais le pauvre Prince bien aduerty de ce qu'on deliberoit faire, & qu'on n'en vouloit qu'à luy, ne s'osant fier en sa mère, ni au Gouverneur de Paris qui estoit lors, qui l'entretenoyent de parlement & d'accord, prit vne resolution courageuse, & approuuée de beaucoup de gens de bien, qui fut de s'enfuir, & quitter tout. De quoy vostre frere se trouua bien estonné, voyant que la proye qu'il pensoit tenir en ses laqs, luy estoit eschappée. O feste memorable des barricades, que tes feries, & tes octaués sont longues ! Depuis ce temps-là qu'auons nous eu que malheur & pauvreté ? qu'angoisses, peurs, tremeurs, alarmes, desfiances, & toutes sortes de miseres : Ce ne furent plus que ruses, que fineses, dissimulations & faintises d'une part & d'autre : pratiques, menées à qui mieux mieux, & à qui tromperoit son compagnon. Vous commençastes à marcher du pair avec vostre maistre & parce que n'auiez peu l'attrapper par force ouuerte, vous pristés conseil d'y aller par finesse : vous faisiez les tristes & dolents de ce qui estoit arriué, quand vous enuoyez vers luy : mais enuers les estrangers, vous brauiez, & vous vantiez d'estre maistres de tout, & qu'il n'auoit tenu qu'à vous que ne fussiez

Rois :

Roy : & qu'auiez gagné en ceste iournee des barricades , plus que si eussiez gagné trois batailles. De quoy vos lettres , & celles de vos agents font ample foy : vous enuoyastes plusieurs fois diuerſes ſortes d'ambassadeurs vers le Roy tant à Rouen qu'à Chartres , pour faire croire que le peuple de Paris estoit plus à ſa deuotion que iamais , & deſiroit le voir , & le cherir en ſa bonne ville : & ne taſchiez qu'à l'y attirer pour parfaire la beſongne commencée : mais il n'en voulut rien faire , & fit bien : en ſin apres pluſieurs declarations que vous tiraſtes de luy , dont il ne fut chiche , comment il oublioyt , & remettoit tout ce qui s'eſtoit paſſé , où ne vouluſtes iamais qu'on vſaſt du mot de pardonner , vous vous allaſtes enſiler bien lourdement en la promotion des eſtats , où vous vous promettiez faire tout paſſer à voſtre fantaſie , par le moyen des brigues que vous fiſtes à l'eſlection des deputez des prouinces : En quoy on ne veit iamais vne telle impudence , que la voſtre , qui enuoyez de ville en ville faire eſlire des hommes de voſtre faction pour venir auſdicts eſtats , preparez de memoires accommodez à voſtre intention : les vns par force , les autres par corruption d'argent , & les autres par crainte & menaces : Entre autres de ceste ville , vous

enuoyastes le president de Nully, la Chapelle Marteau, Compan, Roland, & l'aduocat d'Orleans qui estoient notoirement les principaux autheurs de la rebellion, & les instruments dont vous vous seruiez le plus, pour tromper le peuple. Qu'est-il besoin de rememorer icy: ce qui se passa a ces estats de Blois, & comme Dieu banda les yeux à ceux de vostre famille, pour s'aller ietter dedans la fosse, qu'il auoyent preparee pour autrui? Alors que pensiez estre au dessus du vent après ceste belle loy fondamentale, par laquelle vous declariez le feu Cardinal de Bourbon premier Prince du sang, & le Roy de Nauarre indigne de iamais succeder à la couronne non plus que ses cousins adherents & fauteurs d'heretiques: voicy vne bourrasque qui enleue ces deux grosses colonnes de la foy, messieurs vos freres, l'vn se disant Lieutenant general, Grand maistre, & Connestable de France, & l'autre Patriarche de l'Eglise Gallicane, & les icte en vn gouffre de mer si profond qu'on ne les à iamais veus ny ouys depuis. Fut-ce pas vn grand coup du ciel, & vn merueilleux iugement de Dieu, que ceux qui pensoient tenir leur maistre à la chesne, & faisoient leur compte de l'amener dedans trois iours par force, ou autrement

ment dedans ceste ville, pour le faire tondre en moyne, & renfermer en vn cloistre, se trouuerent tout à coup eux mesme pris; & renfermez par celuy qu'ils pensoyent prendre? Aucuns ont voulu dire que vous, monsieur le Lieutenant, estant ialous de la grandeur, & haute fortune de monsieur vostre frere, aduertistes le deffunct Roy de l'entreprise qu'on faisoit de l'emmener, & l'admonestiez de se hafter d'y preuenir: Si cela est vray, ie m'en rapporte à vous: mais c'est chose toute vulgaire, que madame d'Aumale vostre cousine fut à Blois exprez pour decouurir tout le mystere au Roy: où elle ne perdit pas ses peines, & dict-on, que son mary & elle eussent dès lors faict banqueroute à la ligue, si on luy eust voulu donner le gouuernement de Picardie, & de Boulongne, & payer ses debtes. Quant à vous ie ne pense pas que ayez eu le cœur si lasche que de trahir vos freres: & on sçait bien qu'estiez conuié à venir, & vous trouuer aux nopces, où l'on vous eust faict de leur liuree: mais soit que vous vous deffiasiez de l'enclouëure, ou que ne voulussiez vous hazarder tous trois ensemble, vous vous tintes à Lyon aux escoutes, pour attendre l'issue & l'execution de l'entreprinse, qui fut tout autre que n'esperiez:

& peu s'en falut que vous mesmes ne fussiez de la farce, si le seigneur Alphonse Corse n'eust esté deuancé : Madame vostre sœur eut la mesme frayeur que vous, qui sçachant la nouuelle, ne se trouua pas asseurée aux faux-bourgs, & se retira en la ville. O que nous serions maintenant à nos aises, si ce Prince eust eu le courage de passer outre, & continuer ses coups : Nous ne verrions pas monsieur de Lyon assis pres de vous, & vous seruir d'arc-boutant, pour faire vos pratiques & les sien-
 nes à Rome, & en Espagne : & pour empes-
 cher par ses sermons, & ses raisons colorées
 de religion, que nous n'ayons la paix, dont
 nous auons tant de besoin : nous n'eussions
 pas veu les furieuses administrations de Mar-
 teau, Nully, Compan, & Roland, qui ont mis
 le peuple au desespoir, si la iustice que la re-
 nommée nous auoit apportée iusques icy a-
 pres leur capture leur eust esté faiëte, comme
 elle deuoit : & toutes les autres grandes villes
 n'eussent pas brulé de feu de rebellion, si
 leurs deputez eussent passé par le mesme fi-
 delium. Mais la douceur de ce bon Roy qui
 n'estoit nullement sanguinaire, se contenta
 de voir son principal ennemy, & competi-
 teur abatu : & s'arresta lors qu'il deuoit plus
 viuement poursuiure son chemin : Toutes-
 fois

*es qual-
 tés
 es chof-
 le
 peuple*

fois si le sieur d'Antragues eust fait ce qu'il
 auoit promis, de la reduction d'Orleans, qu'il
 pensoit guerir, comme il l'auoit gastée, & ne
 se fust point laissé deuancer par sainct Mau-^{authon}
rice, & Roslieux, les choses ne se fussent pas ^{do la}
desbauchées comme elles firent, par faute ^{perdu}
 de donner ordre à ce premier tumulte, où
 vous vinstes sur le commencement de leur
 reuolte, & leur donnastes courage de se re-
 belier & opiniastres à bon escient, & à leur
 exemple vous nous en fistes faire autant: puis
 quasi tout à vn coup, ce feu embrasa toutes
 les bonnes villes de ce Royaume, & y en a
 peu qui se puissent vanter d'en auoir esté
 exemptes, tant vous auiez sçeu dextrement
 pratiquer hommes de toutes parts. Là dessus
 pour nous rendre irreconciliables avec no-
 stre maistre, vous nous luy fistes faire son
 procez, vous nous fistes pendre & brusler
son effigie, vous deffendistes de parler de luy
 sinon en qualité de tyran: vous le fistes ex-
 communier, vous le fistes exercer, detester,
 & maudire par les Curez, par les Prescheurs,
 par les enfans en leurs prieres. Et se peut-il
 dire ou alleguer rien de si horrible & espou-
 uantable, que ce que vous fites faire à Bussy ^{un des}
 le Clerc, petit Procureur, accoustumé d'estre ^{siuiz}
 prosterné à genoux deuant la Cour de Parle-

ment, laquelle il eut le cœur, & la rage d'aller prendre au siege venerable de la iustice souveraine, & la mener captiue & prisonniere en triomphe par les rues, iusque à son fort & tasinere de la Bastille, dont elle n'est sortie que par pieces, avec mille concussions, exactions, & vilenies qu'il a exercees sur les gens de bien ? le laisse les pillages de plusieurs riches maisons, la vente des precieux meubles, les emprisonnemens, & rançonnement des habitans & Gentils-hommes qu'on sçauoit estre pecunieux, & garnis d'argent, lesquels on baptisoit du nom de politiques ou d'adherants, & fauteurs d'heretiques: & sur ce propos fut faicte de ce temps là, vne plaisante rime, que i'estime digne d'estre inserée aux registres, & cayers de nos estats.

*Pour cognoistre les politiques,
Adherants, fauteurs d'heretiques,
Tant soyent-ils cachez & couuerts,
Il ne faut que lire ces vers.
Qui se plainct du temps & des hommes
En ce siecle d'or ou nous sommes.
Qui ne veut donner tout son bien
A ceste cause, il ne vaut rien:
Qui tard l'union à iuree:
Qui a pris sa robe fourree
Au lieu de prendre son harnois:*

Qui ne

*Qui ne diët poinët le Biarnois,
Ains diëte le Roy, & qui le louë:*

*Qui a faiët au seiZe la mouë
Les pensants hors de tout credit:*

Qui en murmure ou en mesdit:

Qui aux quarante faiët la figue.

Qui n'a point la barbe à la ligue:

Qui a veu lettre de delà:

Ne vous fieZ en tout cela.

Qui ne va point cheux les Princesses:

Qui à Pasques n'oit que deux messes:

Qui n'a des chapelets au col,

Merite y auoir vn licol.

Qui se fasche quand on l'appelle

A la porte, à la sentinelle,

A la tranchée, & au rampart,

Il n'est point de la bonne part.

Qui faiët mention de concorde,

Il sent le fagot, ou la corde:

Qui confit en deuotions

Court à toutes processions,

Prieres, & pelerinages,

S'il entremesle en ses suffrages

En Da pacem, en sousspirant,

C'est pour le moins vn adherant:

Combien qu'il face bonne mine

Gardez qu'il ne vous enfarine.

Qui n'ayme point ouyr prescher

Commelet, Gincestre, & Boucher;
 Et qui volotiers ne salue
 Louchard, la Morliere, & la Rue;
 C'est un Mahentre, & un frelu
 Pire qu'un Turc, ou mammelu
 Qui n'honore la Seigneurie
 De Baston, Machaut, Acharie,
 Et qui a dit en quelque endroict,
 Que i'amaïs boyteux n'iroit droict:
 Qui demande par la fenestre
 A ses voisins que ce peut estre
 Aux alarmes, & toque-saincts:
 Qui n'eut point peur à la Toussaincts:
 Qui la bonne feste nommee
 Des barricades, n'a chommee:
 Qui ne parle reueremment
 Du consteau de frere Clement,
 Qui lors que Bichon, ou Niuelle
 Ont imprimé quelque nouvelle
 En doute, & s'enquiert de l'auteur,
 Je gage que cest un fauteur:
 D'autre-encores on remarque
 A une plus certaine marque:
 Sainct Cosme, Oliuier, & Bussy,
 Empoignent m'y ces galants cy:
 Ils en sont: & pourquoy? & pour-ce
 Qu'ils ont d'argent en leur bourse.

J'ay retenu ces vers par cœur, par ce qu'ils
 sont

sont si vulgaires, que les femmes & petits enfans les ont appris, & qu'il ne se peut rien faire de plus naïf pour exprimer nos procédures, & les façons dont nous auens vſé pour trouuer de l'argent. Mais on a oublié d'y mettre l'or de Molan, & le threſor du grand Prieur de Champagne, qui nous ayderent bien a faire voſtre voyage de Tours : qui ne fut pas long, ni de grand eſſect. Car apres auoir mené ie ne ſçay quelle trouppes ramafſée de gens tranſportez d'erreur, & d'amour de nouueauté que leur mettiez en la teſte, pour brauer voſtre maiftre que penſiez prendre à deſpourueu, ou avec eſperance que ceux de Tours feroient quelque tumulte pour le vous liurer, ſi toſt que viſtes qu'on parloit à vous à coups de canon, & que le Roy de Nauarre eſtoit venu aſſiſter & ſecourir ſon frere, ayant vn notable intereſt qu'il ne tombaſt entre vos mains, la frayeur vous faiſit tellement au luſtre des eſcharpes blanches, que ce fut à vous de vous retirer en diligence par des chemins eſgarez, où il n'y auoit point de pierres : & vouluſtes colorer voſtre fuite ſur lā priere que nous vous fiſmes de nous ſecourir contre les courſes de meſſieurs de Longueuille, de la Nouë, & de Giury, apres la honteuſe leuee du ſiege de

Senlis

Senlis estant icy , vous vous deffiastes bien qu'on ne tarderoit gueres à vous suyure de près , ayant deux si puissants dogues à la queuë, & donnastes quelque ordre pour la deffense de Paris , par vn antidote pire que le mal n'eust esté, si on nons eust pris : Et ce fut lors que les Parisiens commencerent a voir des hostes vivants à discretion en leurs maisons , contre tous les anciens priuileges à eux accordez par les deffuncts Roys : Mais ce ne furent que fleurettes, au pris de ce que nous auons souffert depuis : vous laissastes neantmoins prendre à vóstre nez Estampes, & Pontoise, sans les secourir. Et voyant qu'on retournoit à vous , pour vous attirer à la bataille, ou vous resserrer entre nos murailles, vous vistes bien au progrez des affaires du Roy , que les vostres s'en alloient ruinées , & qu'il n'y auoit plus moyen de vous en sauuer, sans vn coup du ciel : qui estoit par la mort de vostre maistre vostre bien facteur, vostre Prince, vostre Roy : le dy vostre Roy : car ie trouue emphase en ce mot, qui emporte vne personne sacree, oincte , & chérie de Dieu, comme mitoyenne entre les Anges & les hommes: Car comment seroit il possible que vn homme seul, foible, nud, desarmé, peust commander à tant de milliers d'hommes, se
faire

faire craindre, fuyure, & obeyr en toutes les voluptez, s'il n'y auoit quelque diuinité, & quelque parcelle de la puiffance de Dieu meflée ? comme on diët que les demons se meflent, & entreiectent dedans les nuës du tonnerre, où ils font ces eſtranges & eſpouuantables feux qui paſſent de bien loing le feu marteriel & elementaire ? Le ne veux pas dire que ce fut vous, qui choiſiſtes particulièrement cemeſchant **QVE L'ENFER CREA**, pour aller faire cet execrable coup, que les furies d'enfer euſſent redouté de faire : mais il eſt aſſez notoire, qu'auparauant qu'il s'acheminast à ceſte maudite entrepriſe, vous le veiſtes, & ie diroy bien les lieux & endroiçts : ſi ie vouloy, vous l'encourageaſtes, vous luy promiſtes Abbayes, Eueſchez, monts & merueilles, & laiſſaſtes faire le reſte à madame voſtre ſœur, aux Ieſuites, & à ſon Prieur, qui paſſoyent bien plus outre, & ne luy promettoyent rien moins, qu'une place en paradis, au deſſus des Apoſtres, s'il aduenoit qu'il y fut martyrizé. Qu'ainſi ne ſoit, & que ne fuſſiez bien aduertie de tout le miſtere, vous faiſiez preſcher le peuple qui parloit de ſe rendre qu'on euſt encor patience, ſept ou huit iours, & qu'auant la fin de la ſepmaine ou verroit quelque grand choſe qui

se qui nous mettroit à nostre ayse. Les prescheurs de Rouen, d'Orleans, & d'Amiens, le prescherent en mesme temps, & en mesmes termes. Puis si tost que vostre moyne endiable fut party, vous fistes arrester & prendre prisonniers en ceste ville, plus de deux cents des principaux citoyens & autres, que pensiez auoir de biens, des amis & du credit avec ceux du party du Roy : comme vne precaution, dont vous vous proposiez seruir, pour acheter le meschant Astarot, en cas qu'il eust esté pris auant le faict, ou apres le faict : Car ayant le gage de tant d'honnestes hommes, vous pensiez qu'on n'eust osé faire mourir cet assassin, sur la menace qu'eussiez faite, de faire mourir en contreschange ceux que teniez prisonniers. Lesquels à la verité, sont bien obligez à ceux qui par vne precipitee collere tuerent à coups d'espee ce meschant, apres son coup faict : & vous mesmes, ne le deuez pas moins remercier : Car si on l'eust laissé viure comme il faillloit, & mis entre les mains de iustice, nous eussions tout le fil de l'entreprise naïsiuement deduit, & y eussiez esté couché en blancs draps, pour vne marque ineffaceable de vostre desloyauté & felonnie. Mais Dieu ne la pas ainsi permis, & ne sçauons encor ce qu'il vous garde.

Car

Car si les exemples du temps passé portent quelque consequence pour iuger des affaires du temps present, iamais on ne veit vassal & subiect qui eust entrepris de chasser son Prince, mourir en son liét: ie ne veux fortifier ceste maxime par beaucoup d'histoires, ny refuter celles que nos prescheurs alleguent, pour deffendre & fortifier cet acte horrible: Je n'en diray que deux, l'une de la Bible, & l'autre des liures Romains: vous pouuez auoir ouy prescher que ceux qui tuerent Absalom, combien qu'il fust esleué en armes contre son pere, son Roy, & son pays: neantmoins furent punis de mort, par le commandement de Dauid, à qui il faisoit la guerre: Si vous auez leu les conflits qui furent faicts entre Galba, Orho, & Vitellius, pour l'Empire de Rome, vous aurez trouué que Vitellius fit mourir plus de six vingts hommes qui se vantoyent d'auoir tué Galba son predecesseur, & auoyent présenté requeste pour en auoir recompense: non, comme diét l'auteur (qui sert auioird'huy d'Euangeliste à plusieurs) pour amitié qu'il portast à Galba, ny honneur qu'il luy voulust faire: mais pour enseigner tous les Princes, d'asseurer leur vie & leur estat present, & faire cougnoistre à ceux qui entreprendroyent d'attenter à leurs

leurs personnes, que l'autre Prince leur successeur (bien qu'ennemy) en quelque façon que ce soit, vengera leur mort. C'est pourquoy monsieur le Lieutenant vous eustes grand tort, de faire demonstration de tant d'allegresse, ayant sceu la nouvelle du cruel accident de celuy, par mort duquel vous entriez au cheüins de la Royauté : vous fistes des feux de ioye ; au lieu qu'en deüiez faire de funebres : vous pristes l'escharpe verte en signe de resiouissance, au lieu que deüiez redoubler la vostre noire, en signe de dueil vous deüiez imiter Dauid, qui fit recueillir les os de Saul, & les fit honorablement ensepulturer : combien que par sa mort, il demeuroit Roy paisible, & perdoit en luy son plus grand ennemy. Ou faire comme Alexandre le Grand, qui fit de si superbes obseques à Darius : Ou Iules Cæsar, qui pleura à chaudes larmes, sçachant la mort de Pompée, son competeur, & capital aduersaire, & fit mourir ceux qui l'auoyent tué. Mais vous au contraire de ces grands personnages, vous riez, & faistes festins, feux de ioye, & toutes sortes de resiouissance quand vous sçauiez la cruelle mort de celuy de qui vous teniez tout ce que vous & vos predecesseurs auiez de bien, d'honneur & d'autorité : & non content de ces communes

munnes alegressies , qui tesmoignoient assez
 combien vous approuviez ce mal-heureux
 acte , vous feistes faire l'effigie du meurtrier,
 pour le monstrier au public , comme d'un
 saint canonizé : & feistes rechercher sa mere
 & ses parents , pour les enrichir d'aumosnes
 publiques : affin que cela fust vn leurre &
 vne amorce à d'autres qui pourroyent entre-
 prendre de faire encor vn pareil coup au
 Roy de Nauarre , sur l'assurance qu'ils pren-
 droient par l'exemple de ce nouveau mar-
 tit, qu'apres leur mort ils seroyent ainsi sancti-
 fiez , & leurs parens bien recompensez : Or
 ie ne veux point examiner plus auant vostre
 conscience , ny vous pronostiquer , ce qui
 vous peut aduenir , pour-ce faict-là : mais il
 faudroit que la parolle de Dieu fust menteu-
 se (ce qui n'est point) si vous ne receuez bien-
 tost le salaire que Dieu promet aux meur-
 driers , & assassinateurs : comme vostre frere à
 faict pour auoir assassiné le feu Admiral , &
 le feu Admiral pour auoir faict assassiner vo-
 stre pere : Mais ie lairray traicter ceste matie-
 re aux Theologiens , pour vous ramenteuoir
 vne lourde faute que feistes sur cet instât. Car
 puis que n'auiez point crainct de declarer
 en tant de lieux que vostre but estoit de re-
 gner , vous auiez lors & sur le coup vne belle

occasion de vous faire eslire Roy, & y fussiez
 mieux parvenu, que ne ferez pas à present,
 que vous briguez de l'estre. Le Cardinal de
 Bourbon, à qui inconsiderement vous defe-
 rastes le tiltre de Roy, estoit prisonnier: Vo-
 stre nepueu, en qui se conferoyent toutes
 les recommandations de son pere, l'estoit
 aussi: & l'un & l'autre ne vous y pouuoit
 nuire, comme vostre nepueu faict à present:
 vous auiez encor les peuples animez, ardens
 & courans à la nouueauté, qui auoyent vne
 grande opinion de vostre vaillance, dont
 vous estes fort descheu depuis; & ne fay
 doute que ne l'eussiez emporté, en hayne du
 legitime successeur, qui notoirement estoit
 Huquenot, Et puis vous auiez les prescheurs
 qui eussent deduiet mille raisons, pour per-
 suader le peuple, que la couronne vous ap-
 partenoit, mieux qu'à luy: L'occasion en
 estoit belle, sur le changement d'une lignée
 en l'autre: & combien que ce soit vne mes-
 me famille, & d'un mesme tige, neantmoins
 la distance de plus de dix degrez (où les do-
 cteurs disent cesser tout lien & droict de con-
 sanguinité) donnoit beau lustre: encore que le
 docteur Balde à escrit que ceste regle *fallit in*
familia Borboniorum. Tant y a que vous auiez
 la force, & la faueur du temps en main, de la
 quelle

quelle ne sceustes pas vours seruir , ains par vne pusillanimité & couardise trop lourde, & grossiere , vous voulustes garder quelque modestie & forme de loy ciuile , donnant le tiltre de Roy à vn pauvre prestre prisonnier: combien qu'en toutes autres choses , vous violiez impudemment toutes les loix du Royaume , & tout le droit diuin des gens, naturel : & ciuil : Vous oubliastes toutes le maximes des grands maistres, en matiere d'entreprise sur les estats d'autrui : mesmement celle de Iules Cæsar , qui disoit souuent pour excuse ces vers d'un Poëte Grec.

S'il faut estre meschant, soy le pour estre Roy:

Mais au reste soy iuste , & vy selon la loy.

Vous eustes peur de prendre le tiltre de Roy , & ne craigniez pas d'en vsurper la puissance , laquelle vous desguifastes d'une qualité toute nouuelle , dont on n'auoit iamais ouy parler en France : & ne sçay qui en fut l'autheur encore qu'on l'attribue au president Brissou ou lanin : mais quiconques inuenta cet expedient , faillit aux termes de grammaire & d'État : On vous pouuoit donner le nom de regent , ou de Lieutenant general du Roy : comme on auoit faict autres fois , quand les Roys estoient prisonniers , ou absents de leur Royaume : Mais Lieutenant de l'État, &

couronne est vn tiltre innouy , & estrange
 qui a trop longue queue, comme vne chi-
 mere contre nature, qui faict peur aux petits
 enfans. Quiconques est le Lieutenant, est Lieu-
 tenant d'un autre, duquel il tient le lieu, qui
 ne peut faire sa fonction, à cause de son ab-
 sence ou autre empeschement? & Lieutenant
 est Lieutenant d'un autre homme: mais de
 dire qu'un homme soit Lieutenant d'une
 chose inanimée, comme l'estat ou la couron-
 ne d'un Roy, c'est chose absurde, & qui ne se
 peut soustenir. Et eust esté plus tolerable
 de dire Lieutenant en l'estat & couronne de
 France, que Lieutenant de l'estat: mais c'est
 peu de chose de faillir à parler, aux prix de
 faillir à faire. Quand vous fustes affublé de
 ceste belle qualité, vous curastes si rudement
 nos bourses, qu'eustes moyen de mettre sus
 vne grosse armée, avec laquelle vous pro-
 mettiez poursuyure, assieger, prendre, & ame-
 ner prisonnier le nouveau successeur à la cou-
 ronne, qui ne se disoit pas Lieutenant, mais
 Roy tout à fait: vous nous auiez desia fait
 garder nos places, & louer des boutiques en
 la rue saint Anthoine, pour le voir passer
 enchesné, quand l'ameneriez de Diepes pri-
 sonnier. Que fistes vous de ceste grande ar-
 mée, grosse de tous vos secours estrangers
 d'Italie

d'Italie, d'Espagne, & d'Allemagne, sinon faire cognoître vostre foiblesse imprudente, & mauuaise conduite : n'ayant osé avec trenté mille hommes en attaquer cinq ou six mil, qui vous firent teste à Arqués, & en fin vous contraignirent de leuer le cul honteusement, & chercher vous mesmes seureté au dela de la riuiere de Somme. Nous fumes bien esbahis, quand au lieu de voir ce nouueau Roy à la Bastille, nous le vismes dedans nos faubourgs, avec son armée, comme vn foudre de guerre, qui deuança nos pensées, & les vostres : Mais vous vinstes à nostre secours lors qu'estions asseurez qu'il ne nous feroit plus de mal. Et faut confesser que sans la resistance que luy fit à la porte de Bussy vn qui luy est au iourd'huy seruiteur, il nous eust pris, auant que fussiez arriué : Depuis cetéps là, vous ne fistes rien memorable en vostre Lieutenance, que l'establissement de vostre conseil, des quarante, & des seize, que vous auez depuis reuoqué, & dissipé tant qu'avez peu : Et cependant que vous vous amasiez à faire l'estat de vostre maison, & que layssiez tremper en prison vostre Roy imaginaire, sans le secourir, ny d'argent, ny de moyens, pour entretenir son estat Royal, le Roy de fait se mit en possession du Ducroy, du

Vandosmois, du Maine, du Perche, & de la meilleure partie de Normandie: tant qu'à la fin, apres qu'il eut en conquerant faict la ronde du tiers de son Royaume, vous fustes contrainct moitié de honte, moitié de desespoir, & par l'importunité qu'on vous fit, luy aller au deuant, lors qu'il assiegeoit Dreux: où il vous fit vn tour de vieil guerrier, pour auoir moyen de vous combattre: Car il auoit son siege, & fit semblant de reculer dedans le Perche, pour vous attirer plus auant, & vous faire passer les riuieres à le suyure: mais si tost qu'il vous vit passé, & engagé en la plaine, il tourna visage droict à vous, & vous donna la bataille que perdistes, plus par faute de courage, & de conduite, que par faute d'hommes, le nombre des vostres passant de beaucoup les siens. Encor en ceste grande affliction ne peustes vous vous tenir de nous donner vne bourde, comme vous estes coustumier, vous & vostre sœur, de nous paistre de mensonges & fausses nouuelles: & nous voulustes faire croire, pour nous consoler en ceste perte, que le Biarnois estoit mort, duquel vous n'auiez osé attendre la veüe, ny la rencontre. Mais nous vismes ce mort bien tost pres de nos portes, & vous mesmes eustes si grand peur de son ombre, que ne pristés

pristes loisir de vous reposer, que ne fussiez passé en Flandres : où vous fistes ce beau marché avec le Duc de Parme, qui depuis nous à cousté si cher, & qui vous à tellement ruy-né d'honneur & de reputation, que ie ne voy pas moyen de vous en pouuoir iamais releuer, Car au lieu de maistre, vous vous allastes rendre valet, & esclau de la nation la plus insolente qui soit soubs le Ciel. Vous vous asserviustes à l'homme le plus fier & ambitieux, qu'eussiez sçeu choisir : comme auez depuis experimenté, quand il vous faisoit naqueter après luy, & attendre à sa porte, auant que vous faire vne responce de peu d'importance. Dequoy les Gentils-hommes François qui vous accompagnoyent, auoyent despit, & desdaing: & vous seul, n'auiez honte de vous rendre vil, & abiect, en deshonorant vostre lignée, & vostre nation, tant estiez transporte d'appetit de vengeance, & d'ambition: Or pendant ces indignitez, & deshonestes submissions que faisiez, au preiudice du nom François, & de vostre qualité, nostre nouveau Roy ne chommoit pas: car il nous boucha nostre riuiera en haut & en bas, par la prise de Mante, & Poyssi, de Corbeil, Melû, & Montereau: puis nous vint oster la plaine de la France, par la prise de saint Denys: Cela

faict, il n'y auoit plus de difficulté que ne fus-
 sions assiegez, comme nous le fusmes incon-
 tinant apres : Que fistes vous pour nous se-
 courir ? Mais plustost que ne fistes vous point
 pour nous perdre, & rendre miserables ? le ne
 veux pas dire ce qu'aucun ont rapporté de
 vous, que disiez communement que la prise
 de ceste ville seroit plus preiudiciable à vo-
 stre ennemy, que profitable : & que son ar-
 mee se perdroit & dissiperoit. en la prenant :
 le ne sçauois croire qu'eussiez pris plaisir
 de voir tomber vostre femme, vos enfans : vo-
 stre frere, & vostre sœur, à la mercy de vos en-
 nemis : Mais si faut-il dire, que le temps que
 vous meistes à nous venir secourir fut si long,
 qu'il cuyda nous mettre plusieurs fois au de-
 sespoir : & croy que si le Roy vous eust de-
 mandé vn terme, pour nous prendre, il n'en
 eust pas demandé d'auantage que luy en don-
 nastes. O que nous eussions esté heureux, si
 nous eussions esté pris dès le lendemain que
 fusmes assiegez ! O que nous serions mainte-
 nant riches, si nous eussions faict ceste petre.
 Mais nous auons brulé à petit feu. Nous
 auons languy, & si ne sommes pas gueris :
 Deslors le soldat victorieux, eust pillé nos
 meubles : mais nous auons de l'argent pour
 les rachepier : & depuis nous auons mangé
 nos

nos meubles , & nostre argent : Il eust forcé quelques femmes & filles, encore eust-il espargné les plus notables , & celles qui eussent peu guarentir leur pudicité par respect , ou par amis : Mais depuis elle se sont mises au bordreau d'elles mesmes , & y sont encores par la force de la necessité , qui est plus violente , & de plus longue infamie , que la force transitoire du soldat , qui se dissimule , & enseuelist incontinent : au lieu que ceste-cy se diuulgue , se continue , & se rend à la fin en coustume effrontée sans retour. Nos reliques seroyent entieres, les anciens ioyaux de la Couronne de nos Rois ne seroyent pas fondus comme ils sont : Nos faux-bourgs seroyent en leur estre , & habitez comme ils estoient , au lieu qu'ils sont ruinez, desers, & abbatus : Nostre ville seroit riche , opulente & peuplée comme elle estoit : nos rentes de l'hostel de ville nous seroyent payées : au lieu que vous en tirez la mouëlle , & le plus cler denier : nos fermes des champs seroyent labourées , & en receurons le reuenu , au lieu qu'elles son abandonnées , desertes , & en friche. Nous n'auroions pas veu mourir cent mille personnes de faim , d'ennuy , & de pauvreté , qui sont morts en trois mois par les ruës , & dans les hospitaux , sans misericorde , & sans secours :

Nous verrions encor nostre vniuersité florissante, & frequentee : au lieu qu'elle est du tout solitaire, ne seruant plus qu'aux païsans, & aux vaches des villages voisins : Nous verrions nostre palais remply de gens d'honneur, de toutes qualitez, & la sale, & la galerie des merciers pleine de peuple à toutes heures : au lieu que n'y voyons plus que gens de loisir, se pourmener au large, & l'herbe verte qui croist là où les hommes auoyent à peine espace de se remuer : les boutiques de nos ruës seroyent garnies d'artizans, au lieu qu'elles sont vuides & fermées : La presse des charrettes, & des coches seroit sur nos ponts : au lieu qu'en huit iours on n'en voit passer vne seule, que celle du Legat. Nos ports de greue, & de l'eschole, seroyent couverts de basteaux, pleins de bleds, de vins, de foin & de bois : nos hales, & nos marchez seroyent foulez de presse de marchands & de viures, au lieu que tout est vuide, & vague, & n'auons plus rien qu'à la mercy des soldats de saint Denis, fort de Gournay, Cheureuse, & Corbeil ! Ha monsieur le Lieutenant, permettez moy que ie m'exclame en cest endroiect par vne petite digression, hors du cours de ma harangue, pour desplorer le pitoyable estat de ceste Royne des villes, de ce microcosme

& abregé du monde! Ha messieurs les deputez de Lyon, Tholozc, Roüen, Amiens, Troyes, & Orleans, regardez à nous: & y prenez exemple: que nos miseres vous fassent sages à nos despens: vous sçavez tous quels nous auons esté, & voyez maintenāt quels nous sommes: Vous sçavez tous en quel gouffre & abyssine de desolation nous auons esté par ce long & miserable siege: & si ne le sçavez, lisez l'histoire de Iosephe, de la guerre des Iuifs, & du siege de Hierusalem mis par Titus, qui represente au naïf celuy de nostre ville. Il n'y a rien au monde qui se rapporte tant l'un à l'autre, comme Hierusalem & Paris, excepté l'yssue & la fin du siege: Hierusalem estoit la plus grande, & plus riche, & peuplee ville du monde: Aussi l'estoit Paris.

*Qui esleuoit son chef sur toutes autres villes,
Autant que le Sapin sur les bruyeres viles.*

Hierusalem ne pouuoit endurer les bons prophetes, qui luy remonstroyent ses erreurs & idolatries: & Paris ne peut souffrir ses pasteurs & curez, qui blasment & accusent ses superstitions, & folles vanitez, & l'ambition de ses Princes: nous faisons la guerre aux Curez de sainct Eustache, & de sainct Mederic, par-ce qu'ils nous remonstrent nos fautes, & nous predisent le malheur qui nous en doit

doit arriuer. Hierusalem fit mourir son Roy, & son oinct de la race de Dauid, & le fit trahir par vn de ses disciples, & de sa nation: Paris a chassé son Prince, son Roy, son oinct naturel, & apres l'a fait assaciner & trahir par vn de ses moines: Les Docteurs de Hierusalem donnoient à entendre au peuple, que leur Roy auoit le diable au corps, au nom duquel il faisoit ses miracles: Nos prescheurs & docteurs ont-ils pas presché que le feu Roy estoit sorcier, & adoroit le diable, au nom duquel il faisoit toutes ses deuotions? & mesmes aucuns ont bien esté si impudens de monstrier en chaire publiquement à leurs auditeurs, des effigies faictes à plaisir, qu'ils iuroient estre l'idole du diable, que le tyran adoroit, ainsi parloyent-ils de leur maistre, & de leur Roy. Ces mesmes Docteurs de Hierusalem prouuoient par l'escriture que Iesus Christ meritoit la mort, & crioient tout haut, *Nos legem habemus, & secundum legem debet mori*: nos predicateurs, & Sorbonistes, ont-ils pas prouué, & approuué par leurs textes appliqués à leur fantasie, qu'il estoit permis, voire loüable, & meritoire de tuer le Roy: & l'ont encor presché apres sa mort? Dedans Hierusalem estoient trois factions qui se faisoient appeller de diuers noms: mais les plus meschans

meschans se disoyent zelateurs , assistez des Idumeens estrangers. Paris à esté agité tout de mesme de trois factions de Lorraine , d'Espagne , & des seize , participans de toutes les deux , sous le mesme nom de zelateurs qui ont leurs Eleazars , & leurs Zacharies , & Aca-ries , & plus de geans qu'il n'y en auoit en Hierusalem. Hierusalem estoit assiegée par Titus , Prince de diuerse religion , allant aux hazards & dangers comme vn simple soldat , & neantmoins si doux & gracieux , qu'il acquit le surnom de delices du genre humain : Paris a esté assiegé par vn Prince de religion differente , mais plus humain & debonnaire , plus hazardeux , & prompt d'aller aux coups , que iamais ne fut Titus : d'auantage , ce Titus ne vouloit rien innouer en la religion des Iuifs : aussi ne faiét ce Prince en la nostre , ains au contraire nous donne esperance de l'embrasser quelque iour , & en peu de temps. Hierusalem souffrit toute l'extremité deuant que se recognoistre , & se recognoissant n'eust plus de pouuoir , & en fut empeschée par les chefs de la faction : Combien auons nous souffert auant que nous cognoistre , & apres nos souffrances , combien auons-nous desiré de pouuoir nous rendre , si n'en eussions esté empeschez , par ceux qui

nous

nous tenoyent sous le ioug ? Hierusalem auoit le fort d'Anthonia , le temple , & le fort de Sion , qui bridoyent le peuple , & l'empeschoyent de bransler , ni de se plaindre : Nous auons le fort de saint Anthoine, le Temple, & le Louure , comme vn fort de Sion , qui nous seruent de camorre , & de mords , pour nous tenir , & ramener à l'appétit des gouuerneurs. Iosephe de mesme nation & religion que les Iuifs , les exhortoit de preuenir l'ire de Dieu , & leur faisoit entendre qu'eux mesmes ruinoient leurs temples , leurs sacrifices , & leur religion , pour laquelle ils disoyent combattre : & neantmoins n'en voulurent rien faire : Nous auons eu parmy nous , beaucoup de bons citoyens François , & Catholiques comme nous , qui nous ont fait pareilles remonstrances , & monsté par bonnes raisons , que nostre opiniastrété , & nos guerres ciuiles ruinoient la religion Catholique , & l'Eglise , & tout l'ordre Ecclesiastique , faisant desbaucher les Prestres, Religieux, & Religieuses , consummant les benefices , & ancantissant le seruice diuin par tout le plat pays , & neantmoins nous persistions comme deuant , sans auoir pitié de tant d'ames desolées , esgarées , & abandonnées de leurs pasteurs , qui languissent sans religion , sans pasture , & sans

admini

administration d'aucun Sacrement. En fin puis que nous conuenons , & nous raportons en tant de rencontres à la cité de Hierusalem, que pouuons nous attendre autre chose, qu'une totale ruine , & desolation entiere comme la sienne, si Dieu par vn miracle extraordinaire ne nous redonne nostre bon sens? Car il est impossible que puissions longuement durer ainsi : estans desia si abatus , & alanguoris de longue maladie que les soursirs que nous tirons , ne sont plus que les sanglots de la mort: Nous sommes serrez , pressez, enuahis, bouclez de toutes parts , & ne prenons l'air , que l'air puant d'entre nos murailles, de nos bouës & esgouts ; Car tout autre air de la liberté des champs nous est deffendu : Apprenez donc , villes libres, apprenez par nostre dommage , à vous gouuerner d'ores en auant d'autre façon : & ne vous laissez plus encheuestrer , comme auons faiët , par les charmes & enchantemens des prescheurs, corrompus de l'argent , & de l'esperance que leur donnent les Princes , qui n'aspirent qu'à vous engager , & rendre si foibles , & si souples, qu'ils puissent iouir de vous , & de vos biens , & de vostre liberté à leur plaisir. Car ce qu'ils vous font entendre , de la religion, n'est qu'un masque , dont ils amusent les
simples,

simples , comme les regnards amusoient les pies de leurs longue queue, pour les attrapper & manger à leur aise. En vistes vous jamais d'autres , de ceux qui ont aspiré à la domination tyrannique sur le peuple , qui n'ayent tousiours pris quelque tiltre specieux de bien public, ou de religion? Et toutesfois quand il a esté question de faire quelque accord, tousiours leur interest particulier a marché devant, & ont laissé le bien du peuple en arriere, comme chose qui ne les touchoit point ou bien s'ils ont esté victorieux, leur fin à tousiours esté de subiuguer & mastiner le peuple duquel ils s'estoyent aydez à paruenir au dessus de leurs desirs? Et m'esbahy, puis que toutes les histoires : tant anciennes que modernes, sont pleines de tels exemples, comment se trouue encor des hommes si pauvres d'entendement, de s'embarre, & s'enuoyer à ce faux leurre : L'histoire des guerres civiles, & de la reuolte qui se fit contre le Roy Loys vnzième est encor recente : Le Duc de Berry son frere, & quelques Princes de France suscitez, & encouragez par le Roy d'Angleterre, & encore plus par le Comte de Charolois, ne prindrent autre couleur de leuer les armes, que le bien & soulagement du peuple, & du Royaume: mais en fin quand il fallut venir à

nir à composition, on ne traita que de luy augmenter son apannage, & donner des offices, & des appointemens à tous ceux qui l'auoient assisté, sans faire mention du public, non plus que du Turc: Si vous prenez plus haut, aux Annales de France, vous verrez les factions de Bourgogne & d'Orleans, auoir tousiours esté colorées du soulagement des tailles, & du mauuais gouuernement des affaires: & neantmoins l'intention des principaux chefs, n'estoit que d'empieter l'autorité au Royaume, & aduantager vne maison sur l'autre, comme l'yssue a tousiours fait foy. Car en fin le Roy d'Angleterre emportoit tousiours quelque lippée pour sa part, & le Duc de Bourgogne ne s'en departoit iamais sans vne ville, ou vne contrée qu'il retenoit pour son butin. Quiconques vouldra prendre loisir de lire ceste histoire, y verra nostre miserable siecle naïfucement représenté: Il y verra nos predicateurs, boutefeux, qui ne laissoient pas de s'en mesler, comme ils font maintenant, encor qu'il ne fust nullement question de religion: ils preschoient contre leur Roy, ils le faisoient excommunier comme ils font maintenant: ils faisoient des propositions à la Sorbonne; contre les bons citoyens, comme ils font maintenant,

& pour de l'argent comme maintenant : On y veoit des massacres , des tueriers de gens innocens, & des fureurs populaires , comme les nostres. Nostre mignon , le feu Duc de Guyse y est représenté en la personne du Duc de Bourgogne, & nostre bon protecteur le Roy d'Espagne, en celle du Roy d'Angleterre. Vous y voyez nostre credulité & simplicité, suiuiés de ruines , de désolations , & de saccagemens & bruslemens des villes , & fauxbourgs tels qu'auons veu , & voyons tous les iours sur nous, & sur noz voisins. Le bien public estoit le charme & enforcelement qui bouchoit l'aureille à nos predecesseurs : mais l'ambition & la vengeance de ces deux grandes maisons en estoit la vraye , & primitive cause, comme la fin le descouurit. Aussi vous ay-ie deduiât que premierement la ialousie & enuie de ces deux maisons de Bourbon & de Lorraine , puis la seule ambition & conuoitise de ceux de Guyse ont esté & sont la seule cause de tous nos maux. Mais la religion Catholique & Romaine est le breuage qui nous infatuë, & endort, comme vne opiate bien sucrée , & qui sert de medicament narcotique , pour stupifier nos membres : esquels pendant que nous dormons , nous ne sentons pas qu'on nous coupe piece à piece,

Piece, l'un apres l'autre, & ne restera que le tronc, qui bien tost perdra tout le sang & la chaleur, & l'ame par trop grande euacuation. En la mesme histoire, trouuez-vous pas aussi comme le type de nos beaux estats icy assemblez ? Ceux qu'on tint à Troyes sont-ils pas tous pareils, auxquels on exhereda le vray & legitime heritier de la couronne, comme excommunié, & reagraué ? Dieu sçait quelles gens il y auoit à ces estats : ne doubtez pas qu'ils ne fussent tous tels que vous autres messieurs, choisis de la lie du peuple, des plus mutins, & seditieux, corrompus par argent, & tous pretendans quelque profit particulier, au change & à la nouueauté, comme vous autres messieurs : Car ie m'assure qu'il n'y a pas vn de vous, qui n'ayt quelque interest special, & qui ne desire que les affaires demeurent en trouble : Il n'y a pas vn qui n'occupe le benefice, ou l'office, ou la maison de son voisin : ou qui n'en ayt pris les meubles, ou leuë le reuenu, ou faict quelque volerie, & meurtre par vengeance, dont il craint estre recherché si la paix se faisoit. A la fin neantmoins, apres tant de meurtres, & de pauurez, si salut-il que tous ces mauuais recognussent le Roy Charles septiesme, & vinsent à ses

combien qu'ils l'eussent auparauant excommunié, & declairé incapable d'estre leur Roy. Comme de mesme qui ne voit, & ne iuge aysement au mauuais train que nous prenons, qu'il nous en faudra faire autant, quoy qu'il tarde, & que nous y serons contraincts en peu de temps, par la force de la necessité qui n'a ni loy ni respect ni vergongne ? Si ie voioy icy des Princes du sang de France, & des pairs de la couronne, qui sont les principaux personnages, sans lesquels on ne peut assembler ny tenir de iustes & legitimes estats : si i'y voioy vn Conestable, vn Chancelier, des Mareschaux de France, qui sont les vrais officiers pour authoriser l'assemblée. Si i'y voioy les presidents des cours souueraines, les procureurs generaux du Roy en ses parlemens, & nombre d'hommes de qualité, & de reputation, cougnus de long temps, pour aymer le bien du peuple, & leur honneur : ha veritablement i'espereroy que ceste congregation nous apporteroit beaucoup de fruit : & me fuisse contenté de dire simplement la charge que i'ay du tiers estat : pour représenter l'intérest que chascun a d'auoir la paix : Mais ie ne voy icy que des estrangers passionnez, abbayās apres nous, & alterez de nostre sang & de nostre substance : le n'y voy
que

que des femmes ambitieuses , & vindicatives : que des prestres corrompus , & desbauchez , & pleins de folles esperances : le n'y voy noblesse qui vaille , que trois ou quatre qui nous eschappent , & qui s'en vont nous abandonner. Tout le reste n'est que ripaille necessiteuse, qui ayme la guerre, & le trouble: parce qu'ils viuent du bien du bon homme: & ne scauroyent viure du leur , ni entretenir leur train en temps de paix : tous les gentils-hommes de noble race & de valeur , sont de l'autre part , aupres de leur Roy , & pour leur pays. L'auroy honte de porter la parolle pour ce qui est icy du tiers estat, si ie n'estoy bien aduoué d'autres gens de bien qui ne se veulent mesler avec ceste canaille, venuë piece à piece des prouinces , comme cordeliers à vn chapitre prouincial. Que faict icy Monsieur le Legat , sinon pour empescher la liberte des suffrages , & encourager ceux qui luy ont promis de faire merueilles , pour les affaires de Rome , & d'Espagne? Luy qui est Italien , & vassal d'un Prince estrange , ne doit auoir icy ni ranc , ni seance. Ce sont icy les affaires des François , qui les touchent de prés, & non celles d'Italie, & d'Espagne. Dont luy viendroit ceste curiosité , sinon pour y proffiter à nostre dommage? Er vous mon-

fleur de Pelué, vous faict-il pas bon voir en
 ceste compagnie, plaider la cause du Roy
 d'Espagne, & les droicts de Lorraine: vous
 di-je, qui estes François, & que nous con-
 gnoissons estre né en France, auoir neant-
 moins renoncé à vostre chrefine, & vostre na-
 tion, pour seruir à vos idoles de Lorraine, &
 aux demons meridionaux? Vous deuiez en-
 cor amener, & faire seoir icy sur les fleurs de
 lis, le Duc de Feria, & Mandoze, & dō Diego,
 pour prendre leur aduis comment la Fran-
 ce se doit gouuerner: Car ils y ont interest,
 & auez tort, Monsieur le Lieutenant, que ne
 les y auez receus, comme impudemment ils
 l'ont demandé. Mais leur presence seroit inu-
 tile, puis qu'ils ont icy leurs agents, & aduo-
 cats, qui ont si dignement parlé pour eux: Et
 puis vous n'oublierez rien à leur communi-
 quer du resultat de nos deliberations: Mais
 ie vous demanderay volontiers, Monsieur le
 Lieutenant, à quelle fin vous auez assemblé
 ces gens de bien icy: Sont-ce icy ces estats
 generaux, où vous nous promettiez donner
 si bon ordre à nos affaires, & nous faire tous
 heureux? Ie ne m'esbahy pas, si auez tant re-
 culé à vous y trouuer, & tant dilayé, & tant
 faict troter de pauvres herres de deputez
 apres vous: car vous vous doubtiez bien
 qu'il

qu'il s'y trouueroit quelque estourdy qui vous diroit vos veritez , & qui vous grate-
roit où il ne vous demange pas : vous voulez
toufiours filer vostre Lieutenance , & conti-
nuer ceste puissance souueraine qu'auiez
v'surpée , pour continuer la guerre , sans la-
quelle vous ne seriez pas si bien traiçté ny si
bien suiui , & obey que vous estes : Mais nous
y voulons mettre fin , & en ce faisant mettre
fin à nos miseres : On ne vous auoit conferé
ceste belle & bien controuuée qualité de
Lieutenant de l'estat (qui sent plus à la veri-
té le stile d'un clerc de palays , ou d'un pe-
dant , que la grauité de la charge) sinon *ad*
tempus , & iusques à ce qu'autrement par les
estats generaux y eust esté pourueu : Telle-
ment qu'il est temps qu'en soyez demis &
depossedé , & qu'aduisions à prendre un
autre gouuernement , & un autre gouuer-
neur : C'est assez vescu en anarchie , & desor-
dre : Voulez vous que pour vostre plaisir , &
pour agrandir vous & les vostres, cōtre droict
& raison nous demeurions à iamais misera-
bles ? Voulez vous acheuer de perdre ce peu
qui reste ? iusques à quand serez vous substan-
té de nostre sang , & de nos entrailles ? quand
serez vous saoul de nous manger , & de nous
voir entretenir , pour vous faire viure à vostre

ayse ? Ne songez vous point qu'avez affaire aux François ? c'est à dire à vne nation belliqueuse, qui est quelque fois facile à seduire: mais qui bien tost retourne à son deuoir, & sur tout ayme ses Roys naturels, & ne s'en peut passer? vous serez tout estonné, que vous vous trouuerez abandonné de toutes les bonnes villes, qui feront leur appoinctement sans vous: vous verrez tantost l'vn, tantost l'autre, de ceux que pensez vos plus familiers, qui traicteront sans vous, & se retireront au port de sauueté, parce qu'ils vous ont cengneu mauvais pilote, qui n'avez sceu gouverner la nauire, dont auiez pris la charge, & l'avez eschoüée bien loing du port. Auez vous donc tant en horreur le nom de paix, que n'y vueillez point du tout entendre ? ceux qui peuuent vaincre, encor la demandent - il Qu'ont donc seruy tant de voyages, d'allées & de venuës qu'avez faiët faire à Monsieur de Ville-roy, & à d'autres, sous ce pretexte de parler d'accord, & d'acheminer les choses à quelque tranquillité ? Vous estes donc vn pipeur, & abuseur qui trompez vos amis, & vos ennemis ? & contre le naturel de vostre nation, vous n'vsez plus que d'artifice & de ruses pour nous tenir tousiours sous voz patz à vostre mercy: vous n'avez iamais voulu faire

faire traicter des affaires publiques, par personnes publiques: mais à catimini par petites gens façonnez de vostre main, & dependans de vous, à qui vous disiez le mot en l'oreille, tout resolu de ne rien faire de ce qui seroit accordé. Per ce moyen vous avez perdu la creance, & bien vueillance du peuple, qui estoit le principal appuy de vostre auctorité, & avez faict calomnier les procedures d'aucuns notables personages qu'y avez employez par forme d'acquit, & pour octroyer quelque chose à ceux qui vous en supplioient. Vous avez eu crainte d'offenser les estrangers qui vous assistent, lesquels toutesfois vous en sçauent peu de gré. Car si vous sçauiez les langages qu'ils tiennent de vous, & en quels termes le Roy d'Espagne escript de vos façons de faire, ie ne pense pas qu'eussiez le cœur si serf, & abieût, pour le caresser & rechercher comme vous faictes. On a veu de leurs lettres surprises, & dechiffrées, par lesquelles il vous nomment *purro*, & quelquefois *bufalo*: & en d'autres, *locho profiado*, & generalement leur Roy se moque de vous, & mande à ses agents de vous entretenir de bayes, & belles parolles sans effet, & prendre garde que ne preniez trop de pied, & d'auctorité. Les Royaux vos aduersaires croient

que vous ne demandez la trefue que pour attendre vos forces , & mieux dresser voſtre partie à Rome & en Eſpagne : & nous diſons que c'eſt pour faire durer la guerre , & mieux faire vos affaires particulieres. Cela eſtant, comment eſperez vous , foible comme vous eſtes , faire croire que vous nous voulez & pouuez ſauuer ? Cela ne ſe peut , ſinon par vne negotiation publique & authentique , qui iuſtifie , & autorize vne droiſte intention. C'eſt choſe que pourriez faire ſous le bon plaifir du Pape , afin de rendre à ſa ſaincteté le reſpect que luy deuez : pourroit-elle trouuer mauuais que vouluſſez entendre à la paix, avec vos voiſins, avec noſtre Roy ? Car quand ne le voudriez recognoiſtre pour tel , encor ne ſçauriez vous nyr qu'il ne ſoit Prince du ſang de France , & Roy de Nauarre , qui a toujours tenu plus grand rang, que vous , & toujours marché par deſſus vous , & tous vos ayſnez. Au contraire, nous voulons croire que le ſainct pere imitant l'exemple de ſes predeceſſeurs vous inuiteroit à ce bon œuvre, ſ'il vous y voyoit enclin , pour eſtindre le feu de la guerre ciuile qui conſomme vn ſi beau fleuron de la Chreſtienté. & ruine la plus forte colonne qui appuye l'Egliſe Chreſtienne, & l'autorité du ſainct ſiege : Et ne ſ'arrete-

ra point sur ce mot d'heretique : car le Pape
 Iean second alla bien luy mesmes trouuer
 l'Empereur de Constantinople, pour le prier
 de faire la paix avec les Arriens, Heretiques
 pires que ceux cy, & remettre toute la que-
 relle en la main de Dieu, qui seroit ce que les
 hommes ne pouuoient faire. Je croy pour
 mon regard, Monsieur le Lieutenant, que
 quand vous prendrez ce chemin sans fard, &
 dissimulation, il ne peut estre que tressieur,
 & vtile au general de la France, & à vous en
 vostre particulier tres-honorable, & à vostre
 grande descharge, & contentement d'esprit:
 Aussi que ce moyen est seul & vnique, &
 ne vous en reste aucun autre pour arrester la
 cheute eminente de tout l'edifice: le vous
 parle franchement de ceste façon sans crain-
 te de billet, ny de proscription: & ne m'es-
 pouuante pas des Rodomontades Espa-
 gnoles, ny des tristes grimaces des seize, qui
 ne sont que coquins, que ie ne daignay ia-
 mais saluër, pour le peu de compte que ie
 fay deux: le suis amy de ma patrie, comme
 bon bourgeois & citoyen de Paris: le suis
 ialoux de la conseruation de ma religion, &
 suis en ce que ie puis seruiteur de vous, &
 de vostre maison. En fin chascun est las de la
 guerre, en laquelle nous voyons bien qu'il
 n'est

n'est plus question de nostre religion : mais de nostre seruitude, & auquel d'entre vous les carcasses de nos oz demoureront: Ne pensez pas trouuer à l'aduenir tant de gens comme auez faict, qui vucillent se perdre de gayeté de cœur, & espouser vn desespoir pour le reste de leur vie, & pour leur posterité. Nous voyons bien que vous mesmes estes aux filets du Roy d'Espagne, & n'en sortirez iamais que miserable & perdu : Vous auez faict comme le cheual, qui pour se deffendre du cerf, lequel il sentoit plus viste, & vigoureux que luy, appella l'homme à son secours: mais l'homme luy mit vn mors en la bouche, le sella, & équippa, puis mōta dessus avec bons esperons, & le mena à la chasse du cerf, & par tout ailleurs, où bon luy sembla, sans vouloir descendre de dessus, ni luy oster la bride & la selle: & par ce moyen le rendit souple à la housline, & à l'esperon, pour s'en seruir à toute besongne, à la charge, & à la charuë, comme le Roy d'Espagne faict de vous: & ne doubtez pas, si par vostre moyen il s'estoit faict maistre du Royaume, qu'il ne se deffist bien tost de vous, par poison, par calomnies, ou autrement. Car cest la façon, dont il vse, & dont il diët communement qu'il faut recompenser ceux qui trahissent leur

leur Prince, & leur pays : tesmoins ceux qui luy liurerent meschamment le Royaume de Portugal : Lesquels luy venants demander la recompense qu'il leur auoit promise deuant qu'il fust en possession, il les renuoya à son conseil qu'il appelle de la conscience, où il leur fut respondu, que s'ils auoyent remis le Portugal entre les mains du Roy d'Espagne, comme luy appartenant, ils n'auoyent fait que ce que deuoient faire de bõs & loyaux subiects : & en auoyent leur retribution & salaire au Ciel : Mais s'ils l'auoyent liuré, croyans qu'il ne luy appartint point, pour l'oster à leur maistre, ils meritoient d'estre pendus comme traistres : Voyla le salaire qui vous attendroit, après que nous auriez liuré à telles gens ; ce que ne sommes pas deliberer de souffrir. Nous sçauons trop bien que les Espagnols & Castillans, & Bourguignons sont nos anciens & mortels ennemis, qui demandent de deux choses l'vne : ou de nous subiuguer, & rendre esclaves s'ils peuvent, pour ioindre l'Espagne, la Frâce, & les pays bas tout en vn tenant : ou s'il ne peuvent (comme à la verité les plus aduisez d'entre eux ne s'y attendent pas) pour le moins nous affoiblir, & mettre si bas, que iamais, ou de long temps nous ne puissions nous releuer

uer, & rebequer contre eux : Car le Roy d'Espagne qui est vn vieil regnard , sçait bien le tort qu'il nous tient, vsurpant contre toute iustice, le Royaume de Naples, la Duché de Milan , & le comté de Roussillon qui nous appartiennent: il cognoist le naturel du François, qui ne sçauroit long temps demourer en paix, sans attaquer ses voisins. Dequoy les Flamens ont faict vn prouerbe, qui dict que quand le François dort, le diable le berse. D'ailleurs, il voit ses estats separez, & quasi tous vsurpez par violence, contre le gré des habitans qui luy sont mal affectionnez. Il se veoit vieil & caduc, & son fils aysné peu vigoureux, & mal sain, & le reste de sa famille estre en deux filles, l'vne desquelles il à mariée avec le Prince le plus ambitieux, & necessiteux, de l'Europe : l'autre qui cherche party, & ne peut faillir d'en trouuer vn grand si apres sa mort, qui ne peut plus gueres tarder, selon le cours de nature, ses estats se partagent, & que l'vn de ses gendres attaque son fils, il sçait que les François ne dormiront pas, & refuseilleront leurs vieilles pretensions. Faict-il pas donc en Prince prudent, & prevoyant, de nous affoiblir par nous mesmes, & nous mettre si au bas que ne luy puissions nuire, voire apres sa mort ? Aussi auez vous

veu comment il s'est comporté aux secours qu'il nous à enuoyez : la pluspart en papier, & en esperances : dont l'attente nous à causé plus de mal que la venuë ne nous a fait de bien : ses doublons, & ses hommes ne sont venus sinon apres auoir long temps tiré la langue, & que n'en pouuions plus : combien qu'il eust peu nous secourir, beaucoup plus tost : il ne nous engraisse pas pour nous vendre, comme les bouchers font leurs porceaux : mais de peur que ne mourions trop tost, nous voulant reseruer à plus grande ruine, il prolonge nostre languissante vie, d'un peu de panade qu'il nous donne à lechedoigt, comme les geoliers nourrissent les criminels pour les reseruer à l'execution du supplice. Que sont deuenus tant du millions de doublons, qu'il se vante auoir despensez pour sauuer nostre estat ? nous n'en voyons poinct parmy le peuple : la plus-part sont entre les mains de nos aduersaires, ou entre les vostres, messieurs les Princes, gouuerneurs, capitaines, & predicateurs, qui les tenez bien enfermez en vos coffres : il n'a resté au peuple que des doubles rouges, ausquels nous auons employez toutes nos chaudières, chaudrons, coquemarts poisses, chenets, & cuuettes, & emploirons nostre artillerie, & nos

clo

cloches, si nostre necessité dure encore peu de temps, les doublons, & les quatrplons de fin or du Perou, sont esuanouis, & ne se voyent plus : C'est sur quoy vn poëte de nostre temps a faiët vn quatrain fort gentil.

*Par toy, superbe Espagne, & l'or de tes doublons
Toute la pauvre France insensez nous troublons:
Et si de tes doublons qui causent tant de troubles,
Il ne nous reste rien à la fin que des doubles.*

Sur ce mesme subiect, vn autre honneste homme n'a pas mal rencontré, quand il à diët,

*Les François simples parauant,
Sont par doublons deuenuez doubles:
Et les doublons tournezz en vent,
Ou bien en cnyure, & rouges doubles.*

De nous persuader mes huy, que ce qu'en faiët ce bon Prince, n'est que pour la conseruation de la religion Catholique, & rien plus: Cela ne se peut: nous sçauons trop qu'elle est son intention par ses agents, & par ses memoires: nous sçauons comment il à vescu, & traicté cy deuant avec les Huguenots des pays bas. Les articles de leurs accords, sont imprimez & publiez de son autorité, par lesquels il leur permet l'exercice de leur religion: Et s'il ne tenoit qu'à cela, il y a long temps qu'il en a offert autât au Duc Maurice, & à

& à messieurs les estats, pour auoir paix avec eux : Il ne voudroit pas faire pis que son pere, que nous auons apris auoir accordé aux protestans d'Allemagne, & aux Luteriens, ce qu'ils ont voulu, pourueu qu'ils le recongneussent pour Prince, & luy payassent ses droicts: S'il ayment tant la religion Catholique, & haïst ceux qui n'en sont point, comment peut il endurer les Iuifs, & les Marranes en ses pays: comment se peut-il accorder avec les Turcs, & les Mahumetans d'Afrique, desquels il achapte la paix bien cherement? Il ne faut plus que ses espions les Iesuites Scopetins, nous viennent vendre ces coquilles de saint Iaques: le ieu est trop decouvert. Le Duc de Feria a fait veoir ses memoires par degrez, & piece à piece: comme s'il auoit apporté d'Afrique, fertile en poysons, & venins, par le commandement de son maistre, vne boîte pleine de diuerses drogues, de diuerses qualitez: L'une qui tue tost, l'autre qui tue tard, l'autre plus prompte en Esté, l'autre qui fait mieux son operation en Hyuer, pour s'en seruir en nostre endroiect selon les occasions & occurrences: ayant charge de nous en donner d'une s'il nous trouue disposez en telle humeur, & d'une autre, s'il nous trouue autrement: De-

vant que nous eussions faict entendre que
 voulions entretenir la loy Salique, (loy qui
 depuis huiet cens ans à maintenu le Royau-
 me de France en sa force & virilité) on nous
 parloit des rares vertus de ceste diuine infan-
 te, pour la faire eslire heritiere de la couron-
 ne: Quand ils ont veu qu'on vouloit garder
 l'ancienne coustume des masles, on nous a
 offert de la donner à vn Prince qu'eslirions
 Roy: & là dessus, les briges estoient pour
 l'Archiduc Arnest, à qui elle est destinée fem-
 me: puis quand ils se sont apperceus que cet
 Arnest n'estoit point harnoys qui nous fust
 duisant, ils ont parlé d'un Prince de France à
 qui on marieroit l'infante, & les feroit-on
 Roys de France *in solidum*: Et pour tout celà,
 se sont trouuez memoires, & mandats à pro-
 pos, signez de la main propre de *yo el Ré*: A
 quoy monsieur le Legat seruoit de courra-
 tier, pour faire valoir la marchandise... Car il
 n'est icy venu à autre fin: comme n'estant
 Cardinal que par la faueur du Roy d'Espa-
 gne, avec protestation de ruiner la France,
 ou la faire tomber en pieces, entre les mains
 de ceux qui l'ont faict ce qu'il est: & sçauons
 qu'il a vn bref special, pour assister à l'ele-
 ction d'un roy de France. Ha Monsieur le Le-
 gat, vous estes descouuert, le voile est leué:

il

il n'y a plus de charmes qui nous empêchent de voir clair : nostre necessité nous a osté la taye des yeux : comme vostre ambition la met aux vostres : vous voiez assez clair en nostre ruine : Mais vous ne voiez goutte en vostre deuoir de pasteur de l'Eglise : vous venez icy pour tirer la laine d'un troupeau : & pour luy oster ses gras pastis, & ses herbages : vostre interest particulier vous aveugle : trouuez bon que nous regardions au nostre. L'interest de vos maistres , qui vous mettent en besongne comme vn journalier à la tasche de la demolition d'une maison , est de s'agrandir de nos pieces, & tenir en repos leurs seigneuries : le nostre est de nous mettre à couuert , & d'accorder nos differents : en ostant les folles vanitez que nous avez mises en la teste , & faisant la paix : Nous voulons sortir à quelque prix que ce soit , de ce mortel labyrinthe. Il n'y a ni paradis bien tapissé & dorez , ni processions , ni confrairies , ni quarantaines , ni predications ordinaires , ou extraordinaires , qui nous donnent rien à manger. Les pardons , stations , indulgences , brefs & bulles de rome , sont toutes viandes creusées , qui ne rassasient que les cerueaux eueutez. Il n'y a ni rodomontade d'Espagne , ni brauacherie Napolitaine , ni mutinerie. Vva-

lonne, ny fort d'Anthonio, ny du temple, ou citadelle, dont on nous menace, qui nous puisse empescher de desirer, & demander la paix. Nous n'aurons plus peur que nos femmes & nos filles soyent violées, ou desbauchées par les gens de guerre: & celles que la nécessité a destournées de l'honneur, se remettront au droit chemin. Nous n'aurons plus ces sangsuës d'exacteurs, & maletostiers: on otera ces lourds impôts qu'on a inuenté à l'hostel de ville sur les meubles & marchandises libres, & sur les viures qui entrent aux bonnes villes, où il se commet mille abus & concussions, dont le profit ne reuiet pas au public, mais à ceux qui maniēt les deniers, & s'en donnent par les iouës: Nous n'aurons plus ces chenilles, qui succent & rongent les plus belles fleurs des iardins de la France: & s'en paignent de diuerses couleurs, & deuiennent en vn moment de petits vers rampants contre terre, grands papillons volans peindrez d'or, & d'azur: on retranchera le nombre effrené des financiers, qui font leur propre des tailles du peuple, s'accommodent du plus net & plus clair denier, & du reste taillent & cousent à leur volonté, pour en distribuer seulement à ceux de qui ils esperent receuoir vne pareille: & inuentent mille termes elegants

gants pour remonſtrer la neceſſité des affaires , & pour refuſer de faire courtoisie à vn homme d'honneur. Nous n'aurons plus tant de gouuerneurs qui font les Roitelets , & ſe vantent d'eſtre aſſez riches, quand ils ont vne toise de riuere à leur commandement : nous ſerons exempts de leurs tyrannies , & exactions : & ne ſerons plus ſubiects aux gardes, & ſentinelles où nous perdons la moiſtié de noſtre temps , conſommons noſtre meilleur aage, & acquerons des catharres, & maladies qui ruinent noſtre ſanté : Nous aurons vn Roy qui donnera ordre à tout , & retiendra tous ces tiranneaux en crainte & en deuoir : qui chaſtiera les violents : punira les refractaires : exterminera les voleurs & pillards : retranchera les ailes aux ambitieux , fera rendre gorge à ces eſponges , & larrons des deniers publics , fera contenir vn chaſcun aux limites de ſa charge , & conſeruera tout le monde en repos & tranquillité. En fin nous voulons vn Roy pour auoir la paix : Mais nous ne voulons pas faire comme les grenouilles , qui ſ'ennuyants de leur Roy paſſible, eſleurent la Cicoygne qu'ils deuora toutes. Nous demandons vn Roy & chef naturel, non artificiel : vn Roy de ſia fait, & non à faire : & n'en voulons point prendre le con-

feil des Espagnols, nos ennemis inueterez,
 qui veulent estre nos tuteurs par force, &
 nous apprendre à croire en Dieu, & en la foy
 Chrestienne, en laquelle ils ne sont baptisez,
 & ne la cognoissent que depuis trois iours:
 Nous ne voulons pour conseillers & mede-
 cins ceux de Lorraine, qui de long temps
 béent apres nostre mort. Le Roy que nous
 demandons est desia faißt par la nature, né au
 vray par terre des fleurs de lis de France: reiet-
 ton droit, & verdoyant du tige de saint
 Loys. Ceux qui parlent d'en faire vn autre,
 se trompent, & ne sçauroyent en venir à bout:
 on peut faire des sceptres & des couronnes,
 mais non pas des Roys pour les porter: on
 peut faire vne maison, mais non pas vn ar-
 bre, ou vn rameau verd: il faut que nature
 le produise par espace de temps du suc, & de
 la mouëlle de la terre, qui entretiēt le tige en
 sa seue & vigueur. On peut faire vne iambe
 de bois, vn bras de fer, & vn nez d'argent:
 mais non pas vne teste: aussi pouuons nous
 faire des Mareschaux à la douzaine, des Pairs,
 des Admiraux, & des secretares & conseil-
 lers d'estat: mais de Roy, point: il faut que
 celuy seul naysse de luy mesme, pour auoir
 vie, & valeur. Le borgne Boucher, pedant
 des plus meschants, & scelerez vous confes-
 sera

feta que son œil, esmaillé d'or d'Espagne, ne
 veoit rien : Aussi vn Roy electif & artificiel
 ne nous scauroit iamais veoir, & seroit non
 seulement aueugle en nos affaires : mais sourd
 insensible & immobile en nos plainctes. C'est
 pourquoy nous ne voulons ouyr parler ni
 d'infante d'Espagne, que nous laissons à son
 pere: ni d'Archiduc Arnest, que nous recom-
 mandons aux Turcs, & au Duc Maurice : ni
 du Duc de Lorraine, ou de son fils aîné, que
 nous lairrons manier au Duc de Bouillon, &
 à ceux de Strasbourg. Ny du Duc Sauoye,
 que nous abandonnons au Sieur d'Ediguie-
 res, qui ne luy ayde guieres : celuy-là se doit
 contenter de nous auoir soustraict le Mar-
 quizat de Saluces par fraude & trahison, en
 danger de le rendre bien tost au double, si
 nous auons vn peu de temps pour prendre
 haleine. Ce pendant il aura ce plaisir de se
 dire Roy de Chipre, & tirer son antiquité de
 Saxe. Mais la France n'est pas vn morceau
 pour sa bouche, quelque bipedale qu'elle
 soit, non plus que Geneue, Genes, Final, Mo-
 naco, & les Figons, qui luy ont tousiours fait
 la figue : Au demourant il fera bonne hoste,
 avec la desdaigneuse altesse de son infante,
 qui seruira plus à le ruiner de despense, & de
 fast sumptueux, qu'à l'agrandir. Quant au

Duc de Nemours, pour qu'il le baron de Teneçaya des memoires, par lesquels il le veut rendre preferable au Duc de Guyse, nous luy conseillons pour le bien qu'il nous a fait de nous auoir aguerris, & fait vaillans à bonnes enseignes, s'il est bien ia, qu'il s'y tienne, & se garde de la beste. Je ne diray rien du Duc de Guyse: Monsieur le Lieutenant parlera pour luy, & le recommandera à sa sœur: Tant y à que tous ces brigants, ou brigueurs de la Royauté, ne sont ni propres, ni suffisants, ni a nostre goust, pour nous commander: Aussi que nous voulons ôbseruer nos loix, & coustumes anciennes: nous ne voulons point en tout de Roy electif, ny par sort, comme les zelateurs de Hierusalem, qui esleurent pour sacrificeur vn villageois, nommé Phantias, contre les bonnes mœurs, & contre l'ancienne loy de Iudée. En vn mot, nous voulons que Monsieur le Lieutenant sache que nous recognoissons pour nostre vray Roy, legitime, naturel, & souuerain seigneur, Henry de Bourbon, cy deuant Roy de Nauarre: C'est luy seul par mille bonnes raisons que nous recongnoissons estre capable de soustenir l'estat de France, & la grandeur de la reputation des François: luy seul qui peut nous releuer de nostre cheute:

qui

qui peut remettre la couronne en sa premiere splendeur, & nous dōner la paix. C'est luy seul, & non autre, qui peut comme vn Hercules naturel né en Gaule, deffaire ces monstres hideux, qui rendent toute la France horrible & espouuantable à ses propres enfans : c'est luy seul & non autre qui exterminera ces petits demis Roys de Bretagne, de Languedoc, de Prouence, de Lyonnois, de Bourgogne, & de Champagne : Qui dissipera ces Ducs de Normandie, de Berry & Solongne, de Reims, & de Soissons : tous ces fantômes s'esuanouiront au lustre de sa presence, quand il se fera siz aux throsne de ses maieurs, & en son liēt de iustice qui l'attend en son palais Royal. Vous n'avez rien, messieurs, vous n'avez rien à present Monsieur le Lieutenant, que luy puissiez obiecter : le pretexte de l'oncle au nepueu, vous est osté par la mort de Monsieur le Cardinal son oncle. Je ne veux parler de luy, ni par flaterie, ni en meditan-
ce : l'un sent l'esclaue, l'autre tient du seditieux : Mais ie puis dire avec verité, comme vous mesmes, & tous ceux qui hantent le monde ne nieront pas, que de tous les Princes, que la France nous monstre marquez à la fleur de lis, & qui touchent la couronne, voire de ceux qui desirent en approcher, il

n'y en a point qui merite tant que luy , ni qui ayt tant de vertus Royales, ni tant d'aduantages sur le commû des hommes. Je ne veux pas dire les defauts des autres : mais s'ils estoient tous proposez sur le tableau de l'election , il se trouueroit de beaucoup le plus capable, & le plus digne d'estre esleu. Vne chose luy manque, que ie diroy bien à l'aureille de quelqu'un, si ie vouloy. Je ne veux pas dire la religion differente de la nostre que luy reprochez tant. Car nous sçauons de bonne part que Dieu luy a touché le cœur, & veut estre enseigné , & desia s'accommode à l'instruction : mesme a faict porter parole au saint Pere de sa prochaine conuersion : dequoy ie fay estat, comme si ie l'auoy desia veüe, tant il s'est tousiours monsté respectueux en ses promesses, & religieux gardien de ses paroles : mais quand ainsi seroit qu'il persisteroit en son opinion , pour cela le faudroit il priver de son droit legitime de succession à la couronne ? Quelles loix , quels chapitres, quelle euangile nous enseigne de deposseder les hommes de leurs biens , & les Roys de leurs Royaumes pour la diuersité de religion ? L'excommunication ne s'estend que sur les ames, & non sur les corps, & les fortunes. Innocent troisieme exaltant le plus superbe-

ment

ment qu'il peut sa puissance Papale, diët que comme Dieu a fait deux grands luminaires au ciel, sçauoir est le Soleil pour le iour, & la Lune pour la nuit : ainsi en a il fait deux en l'Eglise : l'un pour les ames, qui est le Pape, qu'il accompare au Soleil, & l'autre pour les corps, qui est le Roy : ce sont les corps qui iouissent des biens, & non par les ames, l'excommunication donc ne les peut oster : car elle n'est qu'un médicament pour l'ame, pour la guerir, & ramener à santé, & non pas pour la tuer : elle n'est pas pour damner, mais pour faire peur de damnation. Aucuns disent qu'on n'en auroit point de peur si on n'ostoit quelque commodité sensible de la vie, comme les biens, & la conuersation avec les hommes : Mais si cela auoit lieu, il faudroit en excommuniant vn yurongne, luy deffendre le vin, & aux paillards leur oster leurs femmes, & aux ladres leur deffendre de se galer. Saint Paul aux Corinthiens deffend de boire & manger avec les fornicateurs, mesdisants, yurongnes, larrons : mais il ne dit pas qu'il leur faille oster leurs biens, pour leur faire peur, & les faire retirer de leurs vices. Je demanderoiy volontiers, quand on auroit osté le Royaume, & la couronne à vn Roy pour estre excommunié, ou heretique, encor faudroit il en

en eslire , & en mettre vn autre en sa place : car il ne seroit pas raisonnable que le peuple demeurast sans Roy, comme vous autres messieurs y voulez dignement pourueoir : mais s'il aduenoit par apres que ce Roy excommunié & destitué de ses estats, reuint à resipiscence, se conuertist à la vraye foy, & obtint son absolution du mesme Pape , ou d'un autre subsequnt (comme ils sont assez coustumiers de reuoker & deffaire ce que leur predecesseur a fait) comment est-ce que ce pauvre roy despouillé rentreroit en son royaume ? Ceux qui en seroyent sa: s:z, & triénaux possesseurs à iuste tiltre , s'en voudroient ils demettre, & luy quitter les places fortes, & les trezors, & les armées ? Ce sont comptes de vieilles : Il n'y a ni raison, ni apparence de raison en tout cela. Il y a long temps que l'axiome est arresté, que les Papes n'ont aucun pouuoir de iuger des royaumes temporels. Et v a long temps que saint Bernard a dict, *Stetisse quidem iudicandos apostolos lego, sedisse iudicantes nunquam lego.* Les Apostres ont souuent comparu tout debout deuant les iuges pour estre iugez : mais iamais ne se sont s:z en chaire pour iuger. Aussi scauons nous bien, que beaucoup d'Empereurs Arriens, venants à l'Empire par succession,

ou

ou par adoption , n'ont pas esté reiectez ny repouffez de leurs peuples & fubiectz orthodoxes ; ains ont esté receuz & admis en l'autorité Imperiale fans tumulte ne fedition : Et les Chrestiens ont tousiours eu ceste maxime , comme vne marque perpetuelle de leur religion, d'obeir aux roys & Empereurs, tels qu'il plaisoit à Dieu leur dōner, fussent-ils Arriens , ou Payens : se formans à l'exemple de Iesus-Christ, qui voulut obeir aux loix de l'Empereur Tybere : imitans saint Paul, & saint Pierre qui obeirent à Neron , & par expres ont commandé en leurs epistres d'obeir aux roys & Princes : par ce que toute puissance souueraine est de Dieu , & represente l'image de Dieu. C'est bien loing de nos mutins qui les chassent & les massacent : Et de vous Monsieur le Legat qui voulez en faire perdre la race : Vrayement si nous n'auions plus du sang de ceste noble famille royale , ou que nous fussions en vn royaume d'election , comme en Polongne , ou en Hongrie , ie nedy pas qu'il n'y fallust entendre : mais ayants de temps immemorial ceste louable loy , qui est la premiere & la plus ancienne loy de Nature , que le fils succede au pere , & les plus proches parens en degré de consanguinité à leurs plus proches de la

mes

mesme ligne & famille : & ayans vn si braue
 & genereux Prince en ce degré, sans contro-
 uersé ny dispute, qu'il ne soit le vray naturel
 & legitime heritier, & plus habile à succeder
 à la couronne. Il n'y a plus lieu d'election, &
 faut accepter avec ioye & allegresse ce grand
 Roy que Dieu nous enuoye, qui n'a que faire
 de nostre ayde pour l'estre, & qui l'est desia
 sans nous, & le sera encor malgré nous, si
 nous l'en voulons empescher. Or me suis-ie
 destourné de mon propos pour dire quel-
 que chose sur ce qu'on luy obiecte de la reli-
 gion : mais ce n'est pas ce que ie vouloy dire
 qui luy manque, & qui retarde beaucoup l'a-
 uancement de ses affaires. Aussi n'est-ce pas
 ce que les predicateurs, & pedicateurs luy
 reprochent de l'amour des femmes : ie m'as-
 seure que la plus part de la compagnie, &
 principalement Monsieur le Lieutenant, ne
 luy scauroit faire ce reproche sans rougir.
 Car à la verité, ce n'est pas imperfection qui
 puisse empescher les actes de vertu : mais au
 contraire iamais braue guerrier ne fut, qui
 n'aymast les dames ; & qui n'aymast acquerir
 de l'honneur, pour se faire aymer d'elles : c'est
 pourquoy Platon souhaittoit auoir vne ar-
 mée toute composée de gens amoureux, qui
 seroyent innuincibles, & seroyent mille beaux

exploits d'armes, pour plaire à leurs maistresses: aussi les poëtes bons naturalistes, & grâds maistres en la science des mœurs, ont toujours fait le Dieu Mars, amy de Venus. Qu'on considere tous les grands capitaines & monarques du monde, il ne s'en trouuera gueres de sobres en ce mestier. L'Empereur Titus qui est proposé pour le plus vertueux, le plus sage, & le plus doux Prince qui ayt iamais porté sceptre, n'aimoit il pas esperdument la Royne Berenice, sans que iamais toutesfois ses amours luy fissent preiudice, ou apportassent retardement à ses affaires? Il faut conceder au Princes quelques relasches, & recreations d'esprit, apres qu'ils ont trauaillé aux affaires serieuses, qui importent nostre repos, & apres qu'ils se sont lassez aux grandes actions des sieges, des batailles, des castrametations, & logis de leurs armées: il n'est possible que l'ame soit tousiours renduë en ces graues & pesantes administrations, sans quelque refraichissement, & diuersion à autres pensées plus agreables & plus douces. C'est pourquoy le sage mesmes à dit. *Bonum est pauxillum amare sanè: insanè non est bonum.*

Aimer vn peu sagement, n'est que bien:

Mais trop aimer follement, ne vaut rien.

Il ne fut iamais que les peuples ne fissent d'iniques

niques iugements des actions des Princes, &
 ne se messassent tousiours d'interpreter fini-
 strement leurs mœurs & complexions: ne se
 souuenans pas, qu'il n'y a vn seul de ceux qui
 en iugent, qui ne face pis, & qui n'ait beau-
 coup de plus grandes imperfections: Les rois
 pour estre roys ne laissent pas d'estre hom-
 mes, sujets aux mesmes passions que leurs
 sujets: mais il faut confesser que cestuy-cy
 en a moins de vicieuses qu'aucun de ceux
 qui ont passé deuant luy: Et s'il a quelque in-
 clination à aimer les choses belles, il n'ayme
 que les parfaites & les excellentes, comme
 il est excellent en iugement, & à cognoistre
 le prix & valeur de toutes choses: encor ce
 petit destour ou passetemps de plaisir, luy est
 comme vn exercice de vertu, dont il vse le
 plus souuent, au lieu de la chasse & de la ve-
 nerie, sans laisser parmy ses esbats de reco-
 gnoistre les aduenues de son armee, de re-
 marquer l'assiette des villes & places où il
 passe: La nature des personnes qu'il récontre,
 des lieux & des contrées qu'il traierse: & cu-
 rieusement aprend les passages & guez des
 riuieres, & retient les distances des villes &
 bourgades, marque en quels endroicts il se-
 roit commode de camper son armee, quand
 elle y passeroit, & tousiours s'enquiert & ap-
 prend

prend quelque chose du faict de ses ennemis, n'ayant iamais entrepris de tels voyages qu'il n'ayt eu en main vne ou deux entreprises sur quelques places rebelles. Mais il auroit beau à estre continent, sage, temperé, morne, & graue & retiré, vous y trouueriez tousiours que redire : Quand on s'est mis vne fois à haïr vn homme, on interprete en mauuais sens tout ce qu'il faict, & le bien mesmes qu'il faict Il auroit beau s'abstenir de tous plaisirs, & ne faire que prier Dieu, & donner l'aumosne, vous diriez que ce seroit feincte & hypocrisie : S'il est permis de iuger, ainsi des actions d'autruy contre la deffence expresse que Dieu en faict, pourquoy ne me sera il permis de croire que tous ces marranes qui font tant de signes de croix, & se frapent la poitrine avec tant d'esclat à la messe, sont neantmoins Iuifs & Mahumetans, quelque bonne mine qu'ils facent ? Pourquoy ne diray-ie que monsieur de Lyon est Lutherien, comme il a esté autresfois, encor qu'il face sa prunelle toute blanche en la tournant aux voutes de l'Eglise, quand il adore ou feinct d'adorer le Crucifix ? Mais ce n'est pas d'à ceste heure qu'on parle ainsi des Roys, & y a vn vieil proverbe qui dict que Iuppiter mesmes quand il pleut, ne plaist pas à tous les mortels : Les

vns veulent de la pluye pour leurs choux, &
 les autres la craignent pour leurs moissons.
 Or ce que i'ay differé à dire, qui me semble
 luy manquer, est-ce dequoy vous & moy luy
 sommes plus tenus : c'est qu'il nous traite
 trop doucement, & nous choye trop. La cle-
 mence en laquelle il est superlatif & excessif,
 est vne vertu fort louable, & qui porte enfin
 de grands fruiçts & de longue duree, encor
 qu'ils soyent longs, & tardifs à venir. Mais il
 n'appartient qu'aux victorieux d'en vser, & à
 ceux qui n'ont plus personne qui leur resi-
 ste: aucuns l'attribuent à couïardise & timidi-
 té, plustost-qu'à vaillance & generosité: Car
 il semble que ceux qui espargnent leurs en-
 nemis, desirent qu'on leur en face autant, &
 demandent reuanche de leur gracieuseté: ou
 craignent que s'il se monstrent seueres, ils
 ne puissent auoir raison de leurs autres en-
 nemis qui restent à dompter. Aucuns l'apel-
 lent imbecillité de cœur tout à fait: estimans
 que celuy qui n'ose vser de son droict, n'est
 pas encor assuré de vaincre, & craint aucu-
 nement d'estre vaincu: mais les Philosophes
 qui ont traité de ceste matiere à plein fond,
 n'ont pas attribué à vertu, quand ceux qui
 entreprenants de troubler vn estat se sont
 monstrez gracieux & courtois du commen-
 cement

cement de leurs executions : comme la douceur dont vſoit Cæſar enuers les citoyens & genſdarmes Romains deuant qu'il fuſt victorieux, n'eſtoit par clemence, ains flaterie, & courtoisie ambitieufe, par laquelle il vouloit ſe rendre agreable au peuple, & attirer vn chacun à ſon party: & c'eſt ce que dit ce grand maiſtre d'Eſtat, *Imperium occupantibus utilis eſt clementiæ fama* : à ceux qui enuahiffent vn Royaume contre droit, comme à vous monſieur le Lieutenant, la reputation d'eſtre doux & gracieux ſert de beaucoup ; mais ce fut clemence, quand apres auoir vaincu Pompee, & defaiſt tout ce qui luy pouuoit reſiſter, il vint à Rome ſans triomphe, & pardonna à tous ſes capitaux ennemis, les remettant tous en leurs biens, honneurs, & dignitez : dequoy toutesſois tres mal luy en prit : car ceux à qui il auoit pardonné, & faiſt plus de gracieuſetez, furent ceux qui le trahirent & massacrerent miſerablement. Il y à donc difference entre clemence & douceur : La douceur tombe ordinairement aux femmes, & aux hommes de petit courage : mais la clemence n'eſt qu'en celuy qui eſt maiſtre absolu, & qui fait du bien, quand il peut faire tout mal. Concluons donq que noſtre Roy deuroit reſeruer à vſer de ſa clemence, quand il nous au-

roit tous en sa puissance. C'est inclemence voire cruauté, diët Cicéron, de pardonner à ceux qui meritent mourir : & iamais les guerres ciuiles ne prendront fin, si nous voulons continuer à estre gracieux, où la seuerité de iustice est necessaire. La malice des rebelles s'opiniastre, & s'endurcit par la douceur dont on vse enuers eux : parce qu'ils pensent qu'on n'ose les irriter, n'y les mettre à pis faire : le ne fay doute s'il eust chastié chaudement tous ceux qui sont tombez entre ses mains depuis ces troubles, que ne fussions à present tous souz son obeissance. Mais puis qu'il a pleu à Dieu luy former le naturel ainü doux, gracieux, & bening, esperons encore mieux de luy quand il nous verra prosterner à ses pieds, luy offrir nos vies, & nos biens, & luy demander pardon de nos fautes passées, veu que nous prenant armez pour luy resister, & pour l'assaillir, nous reçoit à mercy, & nous laisse la vie, & tout ce que luy demandons. Allons, allons donq, mes amis, tous d'une voix luy demander la paix : il n'y a paix si inique qui ne vaille mieux qu'une tres-iuste guerre. *O quam speciosi pedes nuntiantium pacem : nuntiantium bona & salutem*, dit Isaye. O que ceux ont les pieds beaux, qui portent la paix, & annoncent le salut & la sauueté du peuple ! Que tardons nous

nous à chasser les fâcheux hostes, maupiteux bourgeois, insolents animaux, qui deuorent nostre substance, & nos biens comme sautereilles ? ne sommes-nous point las de fournir à la luxure, & aux voluptez de ces harpies ? Allons monsieur le Legat, retournez à Rome, & emmenez avecques vous vostre porteur de rogatons le Cardinal de Peluë: nous auons plus de besoin de pains benists que de grains benists. Allons Messieurs les agents & ambassadeurs d'Espagne, nous sommes las de vous seruir de gladiateurs à outrance, & nous entretuer pour vous donner du plaisir. Allons messieurs de Lorraine avec vostre hardelê de Princes, nous vous tenons pour fantômes de protection, sangsues du sang des Princes de France, hapelourdes, fustes euantées, reliques de saints qui n'avez ne force ne vertu, & que Monsieur le Lieutenant ne pense pas nous empescher ou retarder par ses menaces: nous luy disons haut & clair, & à vous tous messieurs les cousins & allicz, que nous sommes François, & allons avec les François exposer nostre vie, & ce qui nous reste de bien pour assister nostre Roy, nostre bon Roy, nostre vray Roy, qui vous rangera aussi bien tost à la mesme recognoissance, par force, ou par vn bon conseil, que

Dieu vous inspirera, si en esles dignes. Je sçay bien qu'au partir d'icy vous m'enuoyrez vn billet, ou peut estre m'enuoyrez à la Bastille, ou me ferez assaciner, comme auez faict Sacre-More, sainct Maigrin, & plusieurs autres : mais ie tiendray à partie de grace si me faictes promptement mourir, plustost que me laisser languir plus long temps en ces angoisseuses miseres : Et auant que mourir ie concluray ma trop longue harangue, par vn epilogue poëtique que ie vous adresse, tel que ie l'ay de long temps composé.

*Messieurs les Princes Lorrains,
Vous estes foibles de reins
Pour la Couronne debatre:
Vous vous faictes tousiours battre.*

*Vous esles vailants & forts,
Mais vains sont tous vos efforts:
Nulle force ne s'esgale
A la puissance Royale.*

*Aussi n'est-ce pas raison
Qu'aux enfans de maison
Les seruiteurs menent la guerre
Pour les chasser de leur terre.*

*Grande folie entreprend
Qui à son maistre se prend:
Dieu encontre les rebelles*

Souflient des Roys les querelles.

*Quittez donc au Nauarrois
La Couronne de nos Roys,*

A tort par vous pretendue,

Aussi bien l'a-vous fondue.

Si quelque droict y auiez,

Fondre vous ne la deuiez:

Ou bien il faut qu'on vous donne

Tiltre de Roys sans couronne.

Nos Roys du Ciel ordonnez,

Naissent tousiours couronnez:

Le vray François ne se range

A Royn'y à Prince estrange.

Tous vilains, ou la plussart

Vous ont faiët leur chef de part:

Ce qui vous suit de noblesse,

Est de ceux que le bast blesse.

Mais le vray Roy des François

Pour sa garde d'Escossois

N'est assisté que de Princes,

Et de Barons de prouinces.

Allons doncques, mes amis,

Allons tous à Sainët Denys

Deuotement recognostre

Ce grand Roy pour nostre maistre,

Allons tous dru & epais

Pour luy demander la paix:

Nous irons iusqu'à sa table,

Tant il est Prince accostable.

*Tous les Princes de Bourbon
Ont tousiours cela de bon,
D'estre doux & debonnaires,
Et courageux aux affaires.*

*Mais vous Princes estrangers,
Qui nous mettez aux dangers,
Et nous paisez de fumee
Tenants la guerre allumee.*

*Retournez en vos pays:
Trop au nostre estes hays,
Et comptez de Charlemagne
Aux lisieres d'Allemagne.*

*Prouuez y par vos Romans
Que venez des Carlomans,
Les bonnes gens apres boire
Quelque chose en pourront croire.*

La'y dit.

Cette harangue acheuée, qui fut ouye avec vn grand silence & attention, beaucoup de gens demeurerent bien camus & estonnez, & ne fut de long tēps apres toussi ne craché, ny faiēt aucun bruiēt, comme si les auditeurs eussent esté frappez d'vn coup du Ciel, ou assoupis en vn profond endormissement d'esprit iusques à ce que vn Espagnol *des mutinados* se leua le premier, & dit tout haut, '*Todos los matiaremos, stos vellachos.* Ce disant partit de sa place

sa place, sans faire aucune reuerence à personne. Là dessus chacun se voulut leuer pour s'en aller : Mais l'Admiral de Villars, moderne Roy d'Iuetot supplia les estats au nom des cantons Catholiques, & des ligues des Ca-
 rillonnois, Lipans, Gautiers, & autres communantez zelées, de ne faire point la paix avec les heretiques, qu'il ne demeurast Admiral du Ponent, & du Leuant, & ne fust payé de ses frais avec retention de ses benefices. Aussi de ne point eslire de Roy qui ne fust bon compagnon & amy des cantons : Puis se leuerent Ribaut & Roland, qui supplierent l'assemblée de casser, & abroger la loy *de repetundis* : pource que ceste loy n'estoit ny Catholique ny fondamentale. Ce faïët chacun se leua, avec vne merueilleuse taciturnité : & en sortant, le massier aduertissoit à la porte de retourner au conseil à deux heures de releuee : A quoy, moy qui parle, ne voulu faillir, pour le desir que j'auoy de voir les choses rares & singulieres, & les ceremonies qui s'y feroient, affin d'en aduertir mon maistre, & les Princes d'Italie qui attendent avec beaucoup de desir quelle sera la procedure, & l'ysseu de ces fameux estats tenus contre tout ordre, & façon de faire accoustumee en France. Je reuins donc apres dîner, d'allez

bonne heure au Louure , & me presentant pour entrer en la sale haute , comme i'auoy faict au matin , l'huissier me refusa , par-ce qu'il vit que ie n'estoy marqué à l'L , & n'auoy point de mereau , comme i'en vy plusieurs qui entrerent , beaucoup plus mal en poinct , & plus deschirez que moy : dont ie receu vn peu de desplaisir : Car entre autres i'y vy receuoir des bouchers plus de trois, des tauerniers , potiers d'estain , sergens , & elcorcheurs , que ie cougnoisloy , qui deuoient auoir voix en l'election. Toutestois ma curiosité me fit passer mon desdaing , & pour sçauoir si les Princes & Princesse sans queuë entreroient en la mesme ceremonie qu'au matin , ie voulu attendre leur venue , & en attendant , me my à regarder des tableaux de plate peinture , qui estoient estallez sur les degrez de l'escalier : le ne sçay s'ils y auoyent esté mis expres pour parer le lieu , ou pour les vendre : mais ie puis dire que ie pry vn grand & merueilleux plaisir , à les contempler l'vn apres l'autre : car la main de l'ouurier en estoit excellente , & la besongne fort nette , & naïfue , plaine d'enigmes de diuers sens , qui faisoient tendre tous les esprits à deuiner dessus.

Le premier sur lequel ie iettay l'œil , estoit
la

la figure d'un geant, ayant les deux pieds sur vne rouë mal graissée, dont les gences estoient toutes tortues : & au dessus de sa teste, à vn pied & demy ou enuiron, y auoit vne couronne de fin or figurié, sans aucunes pierreries, par ce que monsieur de Nemours les auoit mangées, & aupres d'icelle, vn sceptre Royal vn peu rongé de souris, & vne espée de iustice rouillée, par faute d'estre portée & mise en vsage : a quoy ledict géant rendoit les bras tant qu'il pouuoit, & se haussait sur les pieds si aduantageusement qu'il n'appuyait sur la rouë que du bout des arceils, neantmoins n'y pouuoit ioindre, par ce qu'il y auoit tout plein de villes, & de bourgs bons & gros entre deux : & à la main droite y auoit vn bras couronné, qui avec vne houssine de fer luy donnoit sur les doigts. Soubs ceste rouë paroissoit comme dessous celle de sainte Catherine, vn monstre à trois testes féminines, qui auoyent leurs noms escrits sortans de leurs bouches, *Ambition, rebellion, feinte religion*. Je ne scauoy de prime face que cela pouuoit signifier, mais ayant regardé de plus pres le visage dudit geant, il me sembla qu'il ressembloit à celuy de monsieur le Lieutenant, & auoit la teste, & le ventre aussi gros que luy, avec tous les lineamens des

par l'inscription que ie vy au dessoubs en ces mots:

Vendidit hic auro patriam, dominumque potentem Imposuit.

Et au dessus d'iceluy tableau y auoit cest autre vers.

Eheu ne tibi sit priuata iniuria tanti.

Qui me fit douter que c'estoit vne des personnes de la Trinité, encor qu'il eust quitté le saint Esprit.

I'en vy vn autre de l'autre costé de l'escalier, qui estoit plus grand & large que les premiers, & meslé de plusieurs diuerses & plaisantes droleries, qui me fit tourner pour le voir: par-ce qu'au dessus estoit escrit: *Description de l'isle de Ruach, augmentée de nouveau depuis le temps de Rabelais.* Au milieu estoit vne dame coyfee en veufue de plusieurs maris, morts, & viuans, qui auoit entre deux selles le cul à terre, & au tour d'elle, y auoit force gens d'Esglise, Moines, Iacobins, & Iesuites, les vns luy apportans des paquets, sellez & bridez & aux autres elle en donnoit de mesme: les autres qui estoient habillez comme curés de grosses parroisses, auoyent des soufflets d'orgues dont ils souffloyent au cul de plusieurs manants, qui se laissoient emporter au vent. D'autres se tenoyent tout debout la gueule
bée

bée, & ouuerte, & lesdits curez leur souffloyent en la bouche, & les nourrissoient de vent, comme d'une viande celeste, propre à guerir les gouteux, graueleurs, & cacochimes : on voyoit au dessous de ladicte figure, comme vne place publique, representant les haies, ou la place Maubert de Paris, où au lieu de pain, & viande, on exposoit en vente des balons, couilles de belier bien enflées, & grosses vessies de porceau, dont on traffiquoit au marché, & se reuendoyent de main en main à bon compte. Il y auoit aussi vne autre viande en papier, dont on faisoit grand cas, & n'en auoit pas qui vouloit, que des reuendeurs portoyent par les rues, & les crioient nouuelles, nouuelles, comme on crie la mort aux rats, & aux souris : ladicte dame en fournissoit le contreporteurs car elles luy fortoient de dessous sa cotte en abondance : & y auoit du plaisir a voir les diuerses grimaces de ceux qui luy fouilloient sous la queue, pour en gouter : le reste du passage dudit tableau estoit de moulins à vent, tournants à vuide, & de girouettes en l'air, avec plusieurs coqs d'Eglise. Et aux quatre coings y auoit les quatre vents fendus en double, dont il sembloit que le Surouest fust le plus gros, & souffloit le plus fort, & enuoyoit les nuës du costé du Nort-nord-est. Au dessous

soubs dudiect tableau estoit escript ce petit quatrain.

*Icy sont les terre nouvelles,
Où la Royne se paist de vent,
Qui vouldra sçauoir des nouvelles,
Mette le nez sous son deuant.*

Pendant que ie me rauissoy en la contemplation de ce troisieme tableau, & au parauant que i'eusse iecté la veuë sur les autres qui suiuyoient, les Princes & Prinçesses susdicte passerent, & falut que ie courusse apres pour entrer à leur suite : mais parce que la presse n'estoit pas grande, l'huissier qui m'auoit desia poullé, me remarqua, & repoullâ plus rudement qu'a la premiere fois : qui me fit prendre resolution de me retirer, & laisser la les estats bien clos & fermez : Cela fut la premiere session, ou i'entendy sur le soir, que on auoit mis en deliberation de quel bois on se chauferoit le Karefme suyuant, & sur quel pied l'vnion marcheroit. I'ay aussi sçeu depuis, que le resultat du conseil portoit-qu'on feroit plusieurs Karefmes en l'an, avec frequentes indictions de ieufnes doubles, qui se tournoyent en continuë, comme les double-tierces: on'y fit aussi des deffenses de vendre des œufs de couleur apres Pasques, parce que les enfans s'en iouïoyent auparauant,

qui

qui estoit de mauuais exemple : on deffendit
 aussi les ieux de Bourgongne , & les quilles
 de maistre Iean Rozeau. Pareillement fut
 aux femmes enioinct de porter de gros culs,
 & d'enger en toute seureté sous iceux sans
 craindre le babil des sages femmes. On mur-
 mura aussi que les carrosses seroyent censu-
 rées , & les mulets bannis de Paris : Aussi fut
 aduisé de conuertir l'hostel de Bourgongne
 en vn College de Iesuites , qui auoyent be-
 soing de recreation , pour la grande quantité
 de sang , dont ils estoient boursoufflez , & leur
 falloit vn Chirurgien pour les phlebotomi-
 zer. Plusieurs autres saintes & louables or-
 donnances furent faictes d'entree de ieu,
 dont on promet medonner la liste : mais sur
 toutes choses , on exaltoit le labeur de mon-
 sieur de Lyon qui forgeoit vne loy fondamen-
 tale , par laquelle seroit porté que quicon-
 ques dedans Paris , ou en ville bridée de l'v-
 nion , parleroit de paix de vint ans , ou de-
 manderoit le commerce libre , & regrette-
 roit le bon temps passé , seroit enuoyé en exil
 à Soyssons , comme heretique , & Maheutre ,
 ou payeroit à la bourse de l'vnion , certaine
 quantité de dales , pour l'entrètenement des
 Docteurs : Quelques vns aussi mirent en auant
 que si le Roy de Nauarre se faisoit Catholi-
 que

que, il falloit que monsieur le Lieutenant se fist Huguenot, & que son feu frere l'auoit bien voulu estre, si on l'y eust voulu receuoir. Quant à l'election d'un Roy tout neuf, on dit qu'elle fut mise sur le bureau, mais que ce ne fut sans dispute: par ce que les vns proposoyent qu'il valoit mieux entrer en republique, comme les anciens Gaulois: les autres demandoient la democratie anarchique: les autres l'oligarchie Athenienne: Aucuns parlerent d'un dictateur perpetuel, & de consuls annaux: qui fut cause que pour la diuersité des opinions, on n'en peut rien resoudre: Toutesfois il y a quelque apparence qu'ils parlerent d'auoir un Roy: Car un nommé Trepelu vigneron de Surefnes, soustint fort & ferme, que le Roy estoit le vray astre, & le vray Soleil qui auoit depuis si long temps regy & esclairé la France, & icelle nourrie, fomentée, & substantée de sa chaleur: Et que si quelquefois le Soleil suruenant apres la gelée de la nuit, faisoit geler les vignes, il ne s'ensuiuoit pas qu'il falust cracher contre luy, & ne s'en seruir plus: ny pour cela laisser de boire chopine, quoy que le vin fust cher. Voyla à peu pres ce que iay peu apprédre, & que ie puis rapporter de ce qui se passa aux estats de Paris, desquels toutesfois on s'attend qu'il sortira des esclats espouuentables:

car on dit que Roys, & Papes s'en mesleront, & que le primat de Lyon ne dort ni iour ni nuit, pour esclorre vn escrit qui fera poser les armes à tout le monde, & contraindra tous les Maheutres de s'enfuir en Angleterre, où par de là. Nous verrons en peu de temps que ce sera. Dieu est sur tout. *Reliqua autem sermonum & vniuersa quæ facta sunt, nonne hæc scripta sunt in libro sermonum dierum regum Iuda?* Pendât lesdicts estats, il se fit quelques petits vers Latins & François, qui couroyent les rues: dont i'ay fait vn recueil, pour les faire voir aux Italiens qui en sont curieux.

EPI

EPISTRE DV SIEVR D'EN-
GOVLEVENT A VN SIEN AMY.

Sur la harangue que le Cardinal de
Pelué fit aux estats de
Paris.

MOn grand amy tu sçauras par ces vers,
Que les estats furent hyer ouuerts:
Ou l'on a faiët maintes belles harangues:
Mais sur tous ceux qui ont le don des langues:
Ce grand Prelat, & Cardinal de Sens
Par son discours nous à rauy les sens:
Veux tu l'ouyr? destoupe tes oreilles,
Diët la chanson, & tu orras merueilles.
Il a parlé du pere Pretion,
Dont Liuius faiët ample mention
En sa decade, où il diët qu'en son âge,
Ce Pretion fut vn grand personnage.
Il a parlé d'exiuit edictum:
Je ne sçay pas s'il fut Grec ou Breton:
De Domino, & du pays du Mayne,
En contenance, & grauié Romaine:
Il a parlé de saint Paul le conuers,
Comme il eut peur, quand il cheut à l'enuers:
Et si a diët qu'il estoit gentil-homme:
Aussi fut-il decapité à Rome.
Il a parlé en François renegat,
De l'Espagnol, du bonnet du Legat,
Et de sacroix, & du Pape Gringore:
De Luxembourg, & Pisani encore.
Quand il parla du lieu qui fut souillé:
On se souuint, comme il fut barbouillé
Dansant la volte: & vne bonne piece,

Diët que ce fut du K K. de sa niepce,
 Vn autre adionste assez bon compaignon,
 Fy de la fausse, il y a de l'oignon.
 Il s'est vanté qu'un iour au consistoire,
 De cinq protestz tous termineꝝ en oyre
 Il s'escrima, & sembloit l'escoutant
 Que Iesus-Christ eust esté protestant:
 Danger y a que quelqu'un ne le mande
 Aux protestans de la terre Alemande.
 Quant au surplus, ce porteur, qui de pres
 Onit le tout, & que i'enuoye expres
 Le dira mieux: ma plume à tant escrire
 Desia se fend, & s'esclate de rire.

A DIEU.

Excuse sur ladicte harangue.

Son eloquence il n'a peu faire voir
 Faute d'un liure où est tout son sçavoir.
 Seigneurs estats, excusez ce bon homme,
 Il a laissé son Calepin à Rome.

Autre sur la mesme harangue.

Les freres ignorants ont eu grande raison
 De vous faire leur chef, Monsieur l'illustrissime:
 Car ceux qui ont ouy vostre belie oraison
 Vous ont bien recogneu pour ignorantissime.

Aux Espagnols sur leurs doublons.

Mon Dieu qu'ils sont beaux & blonds
 Foz doublons,

Faites

Faites en chercher encores
 Demy Mores,
 Parmi voſ ſaulnes ſablons.
 Ou bien vous en retournez
 Baſaneſ:
 Paris quin'eſt voſtre proye
 Vous renuoye
 Avecques cent pieds de nez.

Sur le bruit qui courut qu'on vouloit faire
 vn Patriarche en France, & ſur la
 penderie de quatre des ſeize.

Pere ſainct, France vous eſchape
 Si on y fait vn Anipape:
 Vous la perdreſ. penſez-y bien:
 Tel chaſſe à tout qui ne prend rien.

Les malheureux & politiques
 Quoy qu'ils ſe diſent Catholiques,
 Ne ſeront iamais bons Romains,
 Les Huguenots encore moins.

Le pauvre Paris tant endure
 Qu'impoſſible eſt que plus il dure:
 Penſez-y bien ſi vous voulez:
 On y pend de ſia les ſelez.

De ſeize ils ſont reduits à douze,
 Et faut que le reſte ſe houze
 Pour apres les quatre premiers
 Eſtre perchez comme ramiers.

De Mont-faulcon, & des ſeize de Paris.

A chacun le ſien c'eſt iuſtice:
 A Paris ſeize quarteniers:

*A Mont faucon seize piliers,
C'est à chacun son benefice.*

*D'un trezorier qui fut mis prisonnier
à la Bastille.*

*Qu'est-ce qu'à fait celuy que l'on encoffre?
Des Angelots il auoit en son coffre.
O le meschant? qu'au cachot il soit mis:
Il a logé ceux soy les ennemis.*

Sur l'emprisonnement d'un Aduocat fol.

*Je ne sçay par quelle raison
De droit canon, ou loy ciuile,
On a mis un fol en prison,
Tant d'enragez courants par ville.*

Des feux de la S. Pierre. 1592.

*Le feu de saint Iean me plaist bien,
On chante autour, & on y danse:
De saint Pierre ie n'en dis rien:
Mais ses feus brulent nostre France.*

D'où sont dits les zelez de l'union.

*Dieu gard messieurs les Catholiques,
Sans croire en Dieu ny en son fils:
Qui auez mangé les reliques
Et aualé le Crucifix.*

*On pense que c'est pour voz Zeles
Que l'on vous nomme les Zelez:
Mais vous auez ce nom des asles,
Parce que si bien vous volez.*

*L'esprit maling qui vous manie
Souz couleur de religion
La France a razee & unie:
De la est dicté l'union.*

Sur les doubles croix de la Ligue.

*Mais dicté moy que signifie
Que les Ligueurs ont double croix?
C'est qu'en la Ligue on crucifie
Iesus-Christ encor une fois.*

A Monsieur le Lieutenant sur la
prise de la Pelade.

*La Pelade vous avez prise
Par la breche que vous sçavez:
Gardez là puis que vous l'avez:
Monsieur elle est de bonne prise.*

A Monsieur de la Chappelle
aux Ursins.

*Les aduis des François tous à un se rapportent
Quand on parle de vous la Chapelle aux Ursins:
Vous vous aduisez tard, & n'estes des plus fins,
Qui en la Ligue entrez quand les autres en sortent.*

Au Prescheur Boucher.

*Flambeau de la guerre civile,
Et porte-en-seigne des meschans,
Si tu n'es Euesque de ville,
Tu seras Euesque des champs.*

A l'Aduocat d'Orleans.

*Si pendre te voulois, tu ne ferois que bien,
Puis qu'on ne peut auoir de toy misericorde!*

Responce pour le Duc
de Guyse.

*Le petit Guysart faiët la nique
A tous vos quatrains & sonnets:
Car estant camus & punais
Il ne sent point quand on le pique.*

Sur le vœu d'un nauire d'argent faiët à
nostre Dame de Laurette, par
Marteau, preuost des
Marchands 1590.

*Faire aux saintës quelque vœu en peril de naufrage,
Et puis s'en acquitter quand on est au riuage
C'est chose bien louable, & blasmer ne le vœux:
Mais qui est l'insensé qui veut payer ses vœux
Estant encore en mer au fort de la tempeste?
Theuet ne vit iamais une si grosse beste.*

Reprise sur le mesme subiect.

*Qu'ay-ie dit? ie m'en repens:
Beste n'est celuy qui vouë:
De nostre cuir il se iouë,
Et s'aquitte à noz despens.*

Des Docteurs de l'vnion.

*Les docteurs de feincte vnion
Pensent par leur doctrine fole
Du manteau de Religion
Faire une cape à l'Esp. ignole.*

Epitaphe du Cheualier d'Aumale:

*Celuy qui fuit il eschape souuent
 Mais qui tient bon & se met trop auant,
 Souuent se perd, & est troussé en male
 Je m'en raporte au cheualier d'Aumale:
 Combien qu'il eust aux mains quelque veru;
 S'il eust des pieds aussi bien combatu
 A Sainct Denys, comme à mainte rencontre;
 Nous ne plaindriens icy sa malencontre.*

Autre.

*Celuy qui gist icy fut vn hardy preneur,
 Qui fit sur sainct Denys vne fine entreprise:
 Mais seinct Denys plus fin que cet entrepreneur,
 Le prit, & le tua dedans sa ville prise.*

Autre.

*Sainct Antoine pillé par vn chef des unis,
 Alla comme au plus fort se plaindre à sainct Denys,
 Qui luy a de ce tort la vengeance promise.
 Vn peu de temps apres ce pillard entreprit
 De prendre sainct Denys, mais sainct Denys le prit,
 Et vengea dessus luy l'une & l'autre entreprise.*

Sonnet sur ce que ledict Cheualier d'Au-
 male fut tué pres le logis de
 l'Espee Royale.

*Comme iadis on vit quand le Gregeois orage
 Sur le murs de Neptune eut son foudre éclaté
 Trebucher Polixene, & d'Achille irrité,
 La tombe ensanglanter sur le Troyen riuage:
 Comme Iules Cesar d'ambitieux courage,
 Qui l'estat renuersa de la grande cité*

Ennemy

*Ennemy de Pompee, & de la liberte,
 Cheut percé de cent coups aux pieds de son image.
 Ainsi à saint Denys l'ennemy de ses Roys
 Aupres de leurs tombeaux à rendu les abois:
 Victime trop tardive à leur cendre immolee.
 Croyons plus que iamais, croyons qu'il est un Dieu:
 Voyants de ce rebelle & la peine, & le lieu,
 Mesme qu'il est tombé souz la Royale espee.*

Suite sur le mesme subiect.

*Il est un Dieu punisseur des rebelles:
 Vengeur des Roys, qui leur iustes querelles,
 Prend en sa main, & les va soustenant,
 Tel ne l'a creu, qu'il croit maintenant.
 Ce cheualier que n'aguere on vit estre
 Tant ennemy de l'estat de son maistre:
 Si fier, si rogue, & si audacieux,
 Qui de son chef pensoit toucher aux cieux,
 Est trebuché d'une griefue ruine,
 Où la poussé la vengeance diuine.
 A saint Denis il est mort estendu,
 Tombé aux lacqs par luy mesme tendu.
 De son orgueil est faicte la vengeance
 Pres des tombeaux de ces vieux Roys de France:
 De qui les os reposants en ce lieu
 Semblent benir la iustice de Dieu:
 Qui a voulu pour la foy violee
 Cette victime estre aux Roys immolee:
 Et que le corps fust mangé des souris,
 Tant mignardé des dames de Paris,
 Auparavant qu'en iuste sepulture
 On eust porté son orde pourriture.*

*Pour faire entendre aux plus grands des vnis
Qu' ainsi faisants, ainsi seront punis.*

En latin.

Vt Phrygio cecidit Priameia littore virgo,
Ad busti hostilis marmora, iussa mori.
Vt generi ad statuum non vno Iulius ictu,
Et victor victi corruit ante pedes:
Sic hostis Regum, Regum ad monumenta suorum
Procumbens, merita cæde cruentat humum
Nunc gaudete pij: Nam cum hæc regalibus umbris
Victima dat pœnas, & probat cise Deos.

In eundem.

Nocturno iste dolo Dionysi ceperat urbem:
Sed Captor capta captus in vrbe perit.

Sonnet sur la retraicte du
Duc de Parme.

*Mais où est maintenant ceste puissante armee,
Qui sembloit en venant tous les Dieux menacer:
Et qui se promettoit de rompre & terracer
La noblesse Françoisse avec son Prince armee?
Ce superbe appareil s'en retourne en fumee,
Et ce Duc, qui pensoit tout le monde embrasser,
Et contrainct, sans rien faire, en Flandres rebrosser,
Ayant perdu ses gens, son temps, sa renommee.
HENRY nostre grand Roy, comme un veneur le suit,
Le presse, le talonne, & le regnard s'enfuit,
Le menton contre terre, honteux, despit, & blefme.
Espagnols, apprenez que iamais stranger
N'attaqua le François qu' avec perie & danger,
Le François ne se vaint que par le François mesme*

Sonnet

Sonnet à tous ceux de la Ligue.

*François desnaturez, bastards de ceste France
 Qui ne se peut dompter que par sa propre main,
 DespouilleZ maintenant ce courage inhumain
 Qui vous enfle d'orgueil, & vous pert d'ignorance.
 Petits Princes Lorrains quiteZ vostre esperance:
 Ne suyez plus l'erreur de cet asne Cumain,
 Qui vestu de la peau du grand Lyon Romain,
 Voyant le vray Lyon perd cœur & assurance
 Et vous, Parisiens, où aurez vous recours?
 Il faut bien gré malgré, sans espoir de secours,
 Vous ranger au deuoir, où les loix vous obligent.
 Mais si vous irritez vostre Roy contre vous,
 Vous sereZ chastieZ: Les enfants & les fous
 S'ils ne sont chastiez iamaïs ne se corrigent.*

Des Seigneurs de Vitry & de Villeroy,
 qui ont recogneu
 le Roy,

*L'union s'en va des-vnie,
 Tesmoins Vury & Villeroy,
 A Dieu en soit gloire infinie:
 Louange à eux, honneur au Roy.
 Ce Lieutenant imaginaire:
 Ce grand Colosse enflé de vent,
 Qui pensoit le Roy contrefaire,
 Sera gros Ian comme deuant.
 La Ligue à se perdre commence,
 Dont bien confuZ sont les meschans;
 Estaincte en sera la semence,
 Par hart, ou par glaines trenchans.*

Gens de sang, de sac, & de corde,
 Qui vous faictes nommer Zelcz,
 Criez au Roy misericorde,
 Ou au gibet vous en allez.

Seize, Mont-faulcon vous appelle
 A demain, crient les corbeaux:
 Seize pilliers de sa chappelle
 Vous seront autant de tombeaux.

Au Roy : sur sa trop grande clemence,

C'est bien vne vertu belle entre les plus belles,
 D'estre doux aux vaincus, & pardonner à tous
 Mais gardez vous du trop, mesme enuers les rebelles;
 Car Cesar en mourut grand Prince comme vous.

En latin.

Magna quidem in magno virtus clementia Rege,
 Hostibus est semper parcere velle suis.
 Sed nimia hand tuta est clementia : curia quondam
 Testis Iulæi cæde cruenta ducis.

Sur le mesme subiect.

C'estoit iadis vertu à vn Roy magnanime
 Faire grace & pardon aux plus grands ennemis:
 Mais depuis que Cesar à mort fut ainsi mis,
 De vertu que c'estois c'est maintenant un crime.

En latin.

Ante fuit ducibus magnis clementia virtus:
 Post fuit hæc virtus, extincto Casare, crimen.

Au Roy.

PPrince victorieux, le meilleur des humains:
 Dieu de sa main a mis deux sceptres en tes mains,

Et

Et t'a au throsne assis de tres-longue dures
 Maugré tous les efforts d'Espagne coniuree:
 Les vœux des bons François à la fin sont ouys
 Tu regneras en paix, race de saint Loys:
 Nul ne te peut oster ce que le Ciel te donne:
 Quand tu commanderois sans sceptre & sans couronne,
 Pour cela toutesfois moins Roy tu ne serois,
 C'est la vertu qui sacre & couronne les Roys.

En latin.

Inuicte Princeps, & tui decus sceli:
 Solio in auito te ipsa collocant fata,
 Manuque tradunt gemina sceptræ fœlici:
 Ex hôste Ibero quæ recepta gestabis:
 Hoc vna quondam de tribus soror neuit:
 Quin, si negetur capitis aureum insigne,
 Sacrumque oliuum Regibus datum Gallis,
 Quod præpes alto candida attulit cælo,
 Non id vetabit, more quin patrûm regnes,
 Regem coronat, Regem inaugurat virtus,

F I N.





